

DUKE  
UNIVERSITY  
LIBRARY

*Treasure Room*

SPECIMEN  
CONTROVERSIARVM  
BELGICARVM.

*Seu*

CONFESSIO

ECCLESIARVM REFOR-  
MATARVM IN BELGIO;

Cujus singulis Articulis subjuncti sunt

ARTICVLI DISCREPANTES,  
in quibus nonnulli Ecclesiarum Belgicarum doctores  
hodie à receptâ Doctrinâ dissentire videntur.

*In usum futurae Synodi Nationalis Latine edidit, & collegit,*

FESTVS HOMMIVS.

*Addita est in eundem usum*

HARMONIA SYNODORVM  
BELGICARVM.



LVGDVNI BATAVORVM,  
Ex Officinâ ELZEVIRIANA.  
ANNO MD. C. XVIII.

HIERONYMVS

*Dial. adversus Luciferianos, cap. vii.*

Ingemuit totus orbis [Belgicus] &  
[Ne-] Arianum se esse  
miratus est.



*Illustr. & Præpotent.*

KBR  
84225 2

# BELGICÆ

*Fœderatarum Provinciarum*

## ORDINIBVS

GENERALIBVS,

*Earundemq; Provinciarum*

## GVBERNATORIBVS

Illustrissimis ac Fidelissimis,

*Religionis Reformatæ, & Belgicæ Libertatis  
Assertoribus strenuissimis.*

**I**LLVSTRISSIMI PRINCIPES  
AC DOMINI, Religionis veræ  
in sinceritate ac pace conservationem  
non tantum ad muneris vestri cu-  
ram pertinere, sed etiam Reipublicæ vestræ preci-  
puum esse εὐλον καὶ ἐδραίωμα, optimè Vos intelligere  
reipsa ostenditis. Conservari veram Religionem  
in sinceritate ac pace vix posse, in hac perversitatis  
\* 2 huma-

humanae malitiâ, prudens ac veneranda judicavit Antiquitas, nisi extent in Ecclesijs publicæ consensus in doctrinâ orthodoxâ Formulæ, seu breves & dilucidæ præcipuorum Fidei Articulorum ex verbo DEI declarationes, communi Ecclesiarum consilio & consensu institutæ, quarum approbatione omnes Ecclesiarum doctores consensum suum in doctrinâ orthodoxâ, ejusque traditione, testatum faciant. Habitum hoc semper fuit, jam inde ab Apostolorum temporibus, ad puritatem doctrinæ in Ecclesijs conservandam, nec non ad pacem ac concordiam in iisdem stabiliendam, commodissimum medium, atque etiam adversus hæreses & schismata expeditissimum remedium. Servavit olim huic fini in ipsis Christianæ Ecclesiæ primordijs Symbolum, quod vocatur Apostolorum, vel ab ipsis Apostolis, vel ab ipsorum Discipulis, viris Apostolicis, Ecclesiæ traditum, & per manus ad nos usque propagatum. Postmodum quum variæ in ipsis Ecclesiæ visceribus exorirentur hæreses, earumque autores ἐν πανουργίᾳ πειπαλῆντες, καὶ τὸν λόγον τοῦ Θεοῦ δολεῖντες, ad obtegendas corruptelas suas, ejusdem brevitate abuterentur, coactæ fuerunt Ecclesiæ orthodoxæ ejusdem prolixiores ex verbo DEI repetitionem ac declarationem instituere, ut veri-

P R Æ F A T I O.

*tas cœlestis clariùs illustrari, & fraudulenta omnis hominum hæreticorum πλάνη καὶ ἀπίστη detegi, præcaveri, atque ab Ecclesijs arceri queat. Factum hoc fuit communi Ecclesiarum consilio, Nicææ, Constantinopoli, Ephesi, Chalcedone, alijsque in locis, diversis temporibus, quotiescunque exortium subinde hæreticorum improbitas hanc Ecclesijs necessitatem imposuit. Postulant enim omnino salus atque ædificatio Ecclesiæ, ut excitatæ controversiæ communi Ecclesiarum consilio examinentur, ac decidantur: utque earundem communi consensione propriæ quedam, perspicuæ, & genuino S. Scripturæ sensui congruentes explicationes, & loquendi formæ, constituentur, ne novis quotidie opinionibus ac locutionibus Ecclesiæ turbentur, aut distrahantur. Sinceritas doctrinæ, & pax Ecclesiarum conservari nequaquam possunt, nisi hac ratione novaturientium licentia coercetur, & hæreticorum fraudibus, quibus in Ecclesias irrepere solent, occurratur. Imprimis necesse habuerunt Ecclesiæ, quæ per singularem DEI gratiam ab erroribus, superstitionibus, atque idololatriâ, quibus Antichristus ille magnus Ecclesiam Christianam miserandum in modum conspurcavit, repurgatæ ex Babylone illâ profugerunt, publicâ atque apertâ*

Veritatis Evangelicæ, quam amplectuntur confessione fidei suæ, quam profitentur, atque etiam justissima suæ à Papatu discessionis rationem reddere, calumnijs improborum obviam ire, consensum in doctrina cum reliquis Ecclesijs Reformatis testari, & posteris fidei suæ testimonium relinquerè. Quare uti reliquæ nationum omnium Ecclesiæ Reformatae suas fidei Confessiones has ob causas ediderunt, ita quoque Majores nostri, qui Ecclesias hasce Reformatas per Belgium, plerique etiam sanguine suo, fundarunt, hanc quoque Fidei & Doctrinæ suæ, ob cujus professionem gravissimas ab Hispanica crudelitate persecutiones sustinebant, Confessionem publicam exstare voluerunt. Hujusmodi Confessiones quia conscriptæ sunt ab hominibus qui errare potuerunt, non sunt, nec esse possunt, autoritatis ἀποτίσις καὶ ἀνεξέλεστος (hæc enim prerogativa soli Sacræ & Θεοπνεύματος Scripturæ competit) ad normam Verbi divini semper expendi debent, si quis in ijs errorem se posse ostendere existimet. Hanc tamen in Ecclesijs autoritatem obtinere debent, ut habeantur pro publicis receptæ in Ecclesijs doctrinæ, doctorumque in eadem consensus Formulæ, ac pro sententijs, quæ communi Ecclesiarum approbatione verbo DEI consentire judi-



# P R Æ F A T I O.

judicantur : quibus proinde debeant subscribere omnes, qui in Ecclesijs illis publico docendi munere fungi volent. Nec unquam permittendum est, ut qui semel Confessioni publicæ subscripsit, auctoritate privatâ quidquam in eâ immutet, aut diversum ab eâ doceat. Fieri enim non potest, quin statim contentiones & schismata in Ecclesijs inde exoriantur. Caterùm si quis existimet se in recepta doctrina aliquid observasse, quod sacris literis minus consentaneum arbitretur, communi Ecclesiarum judicio expendendum proponere debet, ut si rationes ejus verbo divino congruere comperiantur, communi consilio mutatio instituatur: sin minus, ut aut Ecclesiæ judicio acquiescat, aut desinat docere in illis Ecclesijs, quarum doctrinam ipse non approbet. Hac usitata ac commodissima ratio est Ecclesias à contentionibus & schismatibus in pace conservandi. Atque hâc ratione Ecclesiæ nostræ altam pacem atque amabilem concordiam inter se coluerunt, tam sub crudelissimis persecutionibus, quam postea cum Vos, Illustrissimi Principes ac Domini, altiores & vindices nactæ sunt, sub gravissimo bello, per annos plus minus quinquaginta. Tentarunt quidem nonnulli, qui vetus Papismi fermentum penitus non expurgaverant, paucis in locis:

locis quædam innovare, & suavem hanc Ecclesiarum harmoniam disturbare, sed imperita istorum audacia legitimis Ecclesiarum nostrarum censuris, & autoritate vestrà maturè repressa fuit. Donec tandem incidimus in infelices & perniciosissimas hæc contentiones ac controversias, quibus status non tantum Ecclesiarum, sed & Reipubl. miserè concussus, conturbatus & tantum non eversus fuit. Causam earum omnes prudentes norunt aliam non fuisse, quam quod nonnulli Ecclesiarum nostrarum Doctores, qui in doctrinâ receptâ quædam desiderare videbantur, viam hanc regiam ingredi noluerint, sed opiniones suas discrepantes contra laudabilem Ecclesiarum ordinem atque usum, antequam cum Ecclesijs rationes suas communicassent, aut Ecclesiæ de illis legitimè cognoscere & judicare potuerint, in vulgus publicè & privatim, concionibus & scriptis suis, sparserint: quin etiam impediverint hætenus tantis viribus, ne legitima aliqua cognitio Ecclesiastica de ijs institueretur. Huic malo ut tandem aliquando remedium adhibeatur idoneum, laudandum est omnibus modis, Illustrissimi Principes ac Domini, decretum vestrum, quo, exemplo piorum principum Christianorum, ex usu Ecclesiarum Reformatarum, at-

que

# P R Æ F A T I O.

que etiam ex consilio saluberrimo Serenissimi Magnæ Britanniae Regis, statuistis, ut de Controversijs hisce nostris in legitima Synodo Nationali harum Ecclesiarum cognoscatur, & legitimum examen ac iudicium secundum divini Verbi normam instituatur. Ordinarium hoc semper fuit in Ecclesiâ DEI adversus istiusmodi mala remedium, maximo cum pacis & Veritatis emolumento à Christianis principibus sæpè adhibitum. Ad hanc Synodum quia prudentissimè judicastis operæpretium fore doctissimos quosque & veritatis ac pacis amantissimos Theologos ex vicinis Regnis & Rebuspublicis invitari, ut tanti momenti negotium quasi communi omnium Reformatarum Ecclesiarum consilio maturiùs expendi, & accuratiùs componi queat, existimavi me illis & toti Synodo utilem navaturum operam, si specimen aliquot Controversiarum, quibus Ecclesiæ nostræ hætenus sunt turbatæ, Latinè exhiberem, ut ex eo aliquâ ex parte cognoscant, quibus de controversijs in hac Synodo potissimùm erit agendum. Ad tollendas enim Controversias, imprimis necessarium est, statum earum sollicitè inquire, & rectè formari, ut deinceps expensis accuratè in timore DEI utriusque partis rationibus, eadem secundum verbi divini normam

★★

debite

# P R Æ F A T I O.

debitè decidantur: Adjunxi etiam harmoniam Canonum Ecclesiasticorū in superioribus Synodis Nationalibus constitutorum, secundum quos hætenus Ecclesiarum nostrarum regimen fuit institutum: ut hac ratione exteri Theologi ad Synodum hanc venturi de Controversijs, Doctrinâ, & Regimine Ecclesiarum, quasi compendio erudiri queant. Hunc laborem meum si Vobis, Illustrissimi Principes & Domini, non displicere intellexero, est quod seriò mihi gratuler. Susceptum fuisse eo tantùm animo, ut Ecclesijs nostris patrijs prodesset, novit ille ὁ θεοπατὴρ ἐν μέσῳ τῶν λυχνιῶν τῶν χρυσοῶν, quem supplex veneror, ut in futura hac Synodo Nationali, quæ quasi Generalis haberi meritò poterit, Spiritu suo Sancto præsideat, eamque ita moderetur, ut per ipsam Ecclesijs nostris pristina pax restituatur, Doctrina orthodoxa in illis magis magisque illustretur ac stabiliatur, & collapsum regimen restauretur, ad divinæ gloriæ propagationem & subditorum vestrorum salutem. Imprimis etiam, ut Vos, Illustrissimi Principes & Domini, potenti dexterâ suâ protegat, optimis consilijs vestris, ac toti gubernationi ubertim benedicat, atque incolumitatem Vobis longævam concedat. Lugd. Bat. VIII. Octob. A°. clō. lō. c. xviii.

Illustriss. Excell. Celsitud. & Dominat. Vestris devinctissimus

FESTVS HOMMIVS.



# LECTORI S.

**D**E Controversijs, quæ in Reformatis, Ecclesijs Belgicis ante paucos annos excitatæ fuerunt, easdemq; Ecclesias miserè hætenus afflixerunt, varij apud exteros non solùm, sed domi quoq; sparguntur rumores. Qui infelicium harum Controversiarum autores sunt, ut facti tam intempestivi & noxij invidiam declinent, in eo toti nunc sunt, ut easdem omni ratione extenuent, persuadeantque omnibus litem tantùm ab ipsis moveri de quibusdam circâ arduum illud de divinâ Prædestinatione dogma subtilitatibus, quæ ad promovendam hominum salutem neutiquam sint necessaria. Prostantur publicè se præter quinque istos, nimis notos, de Prædestinatione, eiq; annexis capitibus, articulos, nihil habere, de quo contendant. Quod hæ controversiæ jam dudum sopitæ non sint, culpam omnem rejiciunt in illos, qui ipsis adversantur, quoniam in articulis, uti prætendunt, ad salutem minus necessarijs, dissentientes tolerare nolint. Alij rationes se habere putant gravissimas,

★★ 2

quibus

quibus adducantur, ut non tantum meritò suspicentur, sed omninò etiam arbitrentur, plausibilem illam de Prædestinatione controversiam, quinque illis Articulis expressam, *περίφρασιν* tantum esse, sub quâ Socinianismum (aliquantulum fortè interpolatum aut incrustatum) in Reformatas hasce Ecclesias introducere conentur. Idque eo magis credunt, quod ex scriptis etiam eorum qui protestationem illam manibus suis obsignarunt, ostendere clarissimè possint in multò pluribus articulis illos à receptâ harum Ecclesiarum doctrinâ discedere, atque ad errores Socinianorum accedere: quod etiam nullâ hactenus ratione permoveri potuerint, ut aperta ac rotundâ declaratione publicè testatum facerent, quid de præcipuis doctrinæ Reformatæ capitibus sentiant, aut quam procul à Socinianorum erroribus absint: quod denique ipsi profiteantur hasce ad promotionem causæ suæ artes adhiberi, *ut apud vulgus non ulterius progrediantur, quam de Articulis vulgò notis: ut pro ingeniorum diversitate quosdam lacte diu alant, alijs solidiorem cibum maturius præbeant, alios rectè & aperte, alios per*

*cunicu-*

*cuniculos aggrediantur : cum quibusdam agant planè, & nihil dissimulatè, seu quodajunt, rotundâ phrasi, apud alios autem receptas loquendi formulas, adhibita commodâ interpretatione in bonum sensum trahant, ut vel nescientes verum discant, nec novitatis specie ab ipso limine repellantur.* Adeò ut circa hæc Controversias tam de earundem statu, quam de veritate hodie concertetur. Quid de eo sit, brevi, volente DEO, Synodus Ecclesiarum Belgicarum Nationalis, ad examinandas tollendâsque hæc Controversias ab Illustr. & Præpotent. ORDINIBVS GENERALIBVS convocata, despiciet & judicabit. Huic me rem nec ingratam nec inutilem facturum judicavi, si ea, quæ aliquando in usum meum privatum ex publicis doctorum Ecclesiarum nostrarum scriptis annotavi, in quibus à receptâ atque in Confessione Ecclesiarum nostrarum expressâ doctrinâ discedere videbantur, publicè communicarem. Descripsi omnia fide optimâ, uti virum bonum decet : de eo si quis fortè dubitaverit, aut infidelitatis me arguere voluerit, paratus semper ero fidem meam palàm commonstrare, quam etiam

deprehendent omnes, qui conferendi laborem sumere volent. Nolui omnia describere, quæ in istis scriptis passim occurrunt à receptâ doctrinâ, uti videtur, discrepantia, ne moles libelli nimium excresceret, sed ista tantum annotavi, quæ mentem ipsorum clarissimè explicare, & ad articulorum discrepantium probationem sufficere videbantur. Subjunxi ista, suis quæque locis, Confessionis nostræ singulis Articulis, ut sententiarum collatio meliùs institui, & discrepantia clariùs perspicì queat, atque cum in finem numeris etiam annotavi, quibus in locis discrepantia inveniri videatur. Confessionem autem cum vetustissimis, tum Gallicis, tum Belgicis editionibus contuli, & si quæ in posterioribus omissa reperiiebantur, quæ in prioribus extabant ea uncinulis, discretionis causâ inclusa, passim addidi in gratiam eorum, quibus otium non est editiones illas diversas conferre. Produxi hic Doctores, non qui in Ecclesijs Germanicis, Gallicis, Britannicis, Helveticis, alijsve docent, aut aliquando docuerunt (hæc enim cura ad nos propriè non pertinet) sed qui in Eccle-

sij

AD LECTOREM.

ſijs Reformatis fœderati noſtri Belgij hodie docent, aut proximè elapſo hoc decennio docuerunt, & qui proinde Doctrinæ ſuæ coram Synodo Nationali Belgicâ rationem reddere tenentur. Præcipuorum nomina in gratiam tuam, benigne Lector, hic ſubjicio.

D. IACOBVS ARMINIVS, SS. Theologiæ Profeſſor in Academiâ Leydenſi, cujus ſcripta ediderunt & defenderunt Remonſtrantes Leydenſes.

D. CONRADVS VORSTIVS, SS. Theologiæ Profeſſor Academiæ Leydenſis.

M. SIMON EPISCOPIVS, SS. Theologiæ Profeſſor in Academiâ Leydenſi.

M. PETRVS BERTIVS, Regens Collegij Theologici in Academiâ Leydenſi.

CASPARVS BARLÆVS, Subregens Collegij Theologici in Academiâ Leydenſi.

ADRIANVS BORRIVS, Paſtor Eccleſiæ Leydenſis.

IOANNES ARNOLDVS, Paſtor Eccleſiæ Leydenſis.

BERNARDVS DVINGLIO, Paſtor Eccleſiæ Leydenſis.

IOANNES W TENBOGARDVS, Paſtor Eccleſiæ Haganæ.

NICOLAVS GREVINCHOVIVS, Paſtor Eccleſiæ Roterodamenſis.

ADOLPHVS VENATOR, Paſtor Eccleſiæ Alcmarianæ.



AD LECTOREM.

HENRICVS SLATIVS , Pastor Ecclesiæ  
Bleyswicensis.

PETRVS CVPVS , Pastor Ecclesiæ Woer-  
danæ.

HENRICVS WELSINGIVS , Pastor Ec-  
clesiæ S. Martensdyckanæ, in diœcesi Ultraje-  
ctinâ, qui edidit Libellum FAVSTI SOCINI, de  
Officio hominis Christiani in hodiernis istis de  
Religione controversijs: cui etiam præfixit Præ-  
fationem suam, quâ Libellum hunc Evangelici  
commendat, ut satis nervosè tractantem id  
quod auctor sibi proposuerat, monetque eos ut  
diligenter hunc Libellum legant, & unicè at-  
tendant, non quis, sed quid dicat: docetque E-  
vangelicos magno cum fructu hunc Libellum  
legere posse, utpote qui ex eo agniture sint, mul-  
ta sibi deesse adhuc ad veram Religionis puri-  
tatem: multa etiam quæ pugnent cum illâ im-  
prudenter adhuc in cœtibus suis retineri.

*V A L E, candidè Lector, & sincerè judica.*

CON-


# C O N F E S S I O <sup>I</sup>

verè Christiana Ecclesiarum Re-  
formatarum BELGICÆ,

*Continens summam doctrinæ de D E O, & de  
æternâ animarum salute.*

## ARTICVLVS I.

### *De Naturâ D E I.*

ORDE credimus, & ore confi-  
temur, unicam, 1. esse & simpli-  
cem, 2. Essentiam spiritualem, 3.  
quam D E V M vocamus, æter-  
num, incomprehensibilem, invisibilem, 4.  
immutabilem, 5. infinitum, 6. qui perfectis-  
simè est sapiens, 7. justus, & bonus, ac fons o-  
mnium bonorum uberrimus.

---

Contra hunc Articulum doceri videtur.

1. *Non esse unicam essentiam divinam, sed esse tres es-  
sentias divinas.*

A V O R S T I O, *Disp. de D E O, pag. 208.* Sunt tres saltem,  
si non plures *diverse res in D E O.* Et contradictio quædam  
videtur esse rem ullam verè existere, quæ non habeat  
suam quandam *propriam essentiam.*

*Apol. Exeg. pag. 38. Pater peculiarem quandam entitatem, seu quasi limitatam & restrictam essentiam habere putandus est. Idem de Filio DEI & Spiritu S. similiter existimandum est.*

II. *Essentiam DEI non esse simplicem, sed compositam ex subjecto & accidentibus.*

A VORSTIO, *Disp. de DEO pag. 208. Hinc porro alia efflorescit ratio, qua docetur, Accidentia etiam quædam in DEO locum habere. Ibidem. Totidem in DEO accidentia sunt, quot decreta de rebus foris efficiendis.*

*Ibidem. pag. 209. Accedunt varia Scripturæ testimonia, quibus asseritur aliud & aliud in DEO esse, videlicet subjectum & accidens. Ibidem. Aliud est ipsum vivum subjectum, aliud vita ipsa in DEO. Non sunt igitur axiomata illa, vulgò pridem recepta, simpliciter & omni modo vera: In DEVM non cadere ullam diversitatem, aut compositionem: Item, Nullum in DEO accidens esse: sed quidquid in ipso est, DEVM ipsum esse.*

*Ibidem. pag. 100. Nihil vetat generatim asserere aliud atque aliud in DEO sive in DEI essentiâ esse, idque per naturæ necessitatem ab æterno. Nihil etiam vetat hætenus in DEO compositionem aliquam statuere.*

*Ibidem. pag. 247. Videtur aliquid in DEO diversitatis inesse; ut aliud sit ipsa DEI substantia vivens; aliud vita seu vis illa, per quam vivit.*

III. *Essentiam divinam non esse merè spiritualem, sed etiam corpoream.*

A VORSTIO, *Disp. de DEO, pag. 201. Si vocabulum Corporis in significatione latiore sumamus, nihil vetat DEO etiam Corpus ascribere.*

*Item. pag. 251. Ipse (DEVS) ex sententiâ Tertulliani suum corpus, id est, suam veram & solidam substantiam habet: eoq; robustum brachium & potens dextera ei sæpe-numerò tribuitur.*



IV. *DEVM non esse invisibilem, sed externâ oculorum glorificatorum inspectione videri posse.*

A V O R S T I O , *Disp. de D E O , pag. 237.* Quod ea loca, quibus D E V M visuri dicimur, de interiore mentis speculatione, non de externâ oculorum inspectione vulgò interpretantur, nescio an S. literis satis consentaneum sit.

*Ibidem. pag. 200.* Quod dicitur nos D E I faciem visuros 1. Ioh. 3. 2. Apocal. 22. 4. id quoad nos de futuro seculo intelligendum est, cum jam non amplius caro & sanguis erimus, sed ἰσχυροί & spirituales. Quamquam alij de visione mentis tantum, non de externâ & verâ contemplatione hæc loca intelligunt.

*Ibidem. pag. 251.* Si quis objiciat, At non habet D E V S formæ pulchritudinem, quia invisibilis. Resp. Imò summa est ejus pulchritudo, sed quæ non potest nisi à beatis Angelis & ἰσχυροῖς hominibus videri. Et non sine causa Moses faciem eius videre cupivit. Exod. 33. Et non minima fœlicitatis nostræ pars in visione D E I statuitur 1. Ioh. 3. 2.

*Apolog. Exeg. cap. 6. pag. 26. 27.* Nec eos facile damnandos esse crediderim, qui loca superius citata (Apocal. 22. Matth. 5. & 18. 1. Ioh. 3. Psalm. 16. & 17.) & alia eodem pertinentia, non de internâ tantum mentis speculatione, sed potissimum de externâ oculorum inspectione, seu verâ faciei contemplatione simpliciter accipere solent. Non mortalibus, quamdiu tales sunt, & in hoc seculo degunt, hæc visio vnquam tribuenda est (quippe qui carnalibus oculis hisce ad lucem illam inaccessam penetrare, D E V mque videre non possunt 1. Tim. 6.) sed solis immortalibus ac beatis, hoc est, ijs tantum, quorum oculi & tota corpora spiritualia fore dicuntur. 1. Corinth. 15.

V. *DEVM non esse immutabilem.*

A V O R S T I O , *Disp. de D E O , pag. 212.* Quinta species mutationis (alteratio) eatenus in D E O locum habere po-

test, quatenus ipse actiones quasdam immanentes exercet juxta liberam voluntatem.

*Ibidem.* Hæc voluntas DEI semper principium cujusdam mutabilitatis est etiam in ipso DEO.

*Ibidem.* Non satis igitur circumspectè loquuntur, qui DEVM, ut essentia, sic etiam voluntate, prorsus immutabilem esse affirmant.

*Ibidem. pag. 213.* Hæc voluntas DEI in DEO non minus quam in Angelis & hominibus ad opposita vertibilis est.

*Ibidem.* Absoluta & simplex immutabilitas hac in parte DEO attribui non potest.

*Ibidem.* Respondeo, hinc (ex infinitate DEI) non probari omnimodam & absolutam essentia immutabilitatem.

*Ibidem. pag. 306.* Quæ sub conditione DEV s vult facere, vel quæ fieri tantum desiderat, vel quæ etiam fortasse indefinita relinquit, in ijs aliquo modo mutabilis est DEI voluntas.

*Ibidem. pag. 312.* Nihil absurdi ex eo sequitur, quod DEV s in tempore quædam præcisè ac definitè velle vel nolle dicitur, quæ fortassis antea non ita præcisè vel voluit vel noluit: quemadmodum nec absurdum est DEVM nunc quædam in specie velle desinere, quæ antea reipsâ voluit.

*Ibidem. pag. 451.* Moses ipsum DEVM à proposito perditioni populi inter alia revocasse dicitur, argumento metnendi mali eventus: quod scilicet hostes DEVM essent calumniaturi, &c. Videtur enim DEV s hunc eventum utpote suâ naturâ possibilem suo modo metuisse & propterea à proposito suo recessisse.

*Ibidem.* DEV s suo modo aliquando metuit, hoc est, merito suspicatur, & prudenter conjicit, hoc vel illud malum oriturum, ex aliquo suo opere, si ipsum fortè procedat; eog<sub>3</sub> opus ipsum jam inceptum deserit aut immutat.

Ab ARMINIO, contra Perk. pag. 195. DEV s vult seriò, ut omnes homines salventur, at compulsus pertinaci & incorrigibili malitiâ nonnullorum vult illos jacturam facere salutis, hoc est, condemnari.

Ab EPISCOPIO, *Disp. de Volunt. DEI, Thes. 7. Volitives aliquæ DEI certo quodam tempore desinunt.*

*Ibidem. Thes. 21. Ineptum & ridiculum est dicere seriam & Veram voluntatem DEI esse nequire, nisi effectum sortiantur.*

IV. *DEI essentiam non esse infinitam seu immensam, neque ubique, sed tantum in cælo, presentem.*

A VORSTIO, *Disp. de DEO, pag. 214. Non caret controversiâ id, quod hic assumitur pro certo, videlicet, Essentiam DEI prorsus & simpliciter immensam esse.*

*Ibidem pag. 132. Excipi potest (ad loca Scripturæ, quæ agunt de Omnipræsentia DEI) nusquam disertè in Scripturâ doceri DEVM substantialiter ubiq; presentem, adeoque simpliciter infinitum esse. Nusquam scriptum legimus, DEI substantiam simpliciter immensam, & totam reipsâ omnibus in locis presentem esse, imò non pauca, quæ contrarium sensum habere videntur, passim occurrunt.*

*Ibidem. pag. 133. DEI Majestas ideò templis manufactis includi non potest, quia substantialiter in altissimo illo cælo, tanquam in solio aut palatio suo resideat: sic tamen ut virtualiter etiam sive κατ' ἐνέργειαν suam in terrâ verferetur.*

*Ibidem. Patet ex Scripturis immensitatem aut ubiquitatem essentia divine probari non posse.*

*Ibidem pag. 234. Essentia divinæ immensitas inter ea quæ simpliciter ἀδύνατα dicuntur, meritò refertur.*

*Ibidem. DEVS non est actu simpliciter infinitus, neque essendo, neque operando.*

*Ibidem pag. 235. DEVS est quidem infinitus diuturnitate; quia sic ordo & natura postulat: sed non propterea est immensa essentia, quia hoc natura potius averfatur.*

*Ibidem. Non sequitur DEVM immediatè illic suâ substantiâ adesse, ubicunque operatur: quia per causas medias, sive phyficas, sive hyperphyficas, puta Angelos &c. operari potest, ut Rex aliquis per suos ministros.*

*Ibidem.* Apparet saltem incertum & dubium esse quod vulgò de substantiali DEI immensitate traditur.

*Ibidem.* Prima probatio nititur ijs Scripturæ locis, quibus affirmari omninò videtur DEVM ratione substantiæ suæ TANTVM in cælo esse, sive in cælesti Paradiso.

*Ibidem. pag. 237.* Simpliciter credamus, quod S. literæ toties inculcant, DEVM revera suâ substantiâ (quæ ut amplissima & maxima, nostrig<sup>3</sup> respectu immensa est) in cælo altissimo, eodemque capacissimo habitare: in terrâ verò ubique virtute & sapientiâ suâ, sive efficaci operatione & providentiâ suâ nobis adesse.

*Ibidem. pag. 238.* Sacræ litteræ DEVM quidem magnum, excelsum, elevatum vocant, sed nunquam absolutè infinitum, aut simpliciter immensum appellant. Nam secundum quid, & comparativè dici posse infinitum non negamus, sicut respectu nostri infinitus est numerus stellarum, & arenæ maris.

*Ibidem. pag. 239.* Sanè de loco & locali præsentia, quin DEO verè & rectè attribui possit, minimè dubitandum videtur.

*Antapo. 1. pag. 127.* Ad locum in genere acceptum ipse DEVS aptissimè referri potest.

*Disp. de DEO, pag. 240.* Quid vetat spirituales quoque DEI essentiam habere suam propriam quantitatem. *Ibidem. pag. 241.* Cum DEVS, etiam quâ DEVS, hoc est, respectu substantiæ suæ magnus esse dicitur, certè aliquam hic quantitatem & cogitari & esse oportet.

AB EPISCOPIO, *Disp. priv. de DEO Thes. 10.* Non credimus absolutè scitu necessaria esse, quæ de immensitatis divinæ modis, & de omnipræsentia essentia controvertuntur.

ASLATIO, *Epist. ad N. 9. Mart. & 30. Iun. 1608.* Constat DEI manum & potentiam ubique esse, siquidem Spiritus sui ubique est: non secus ac Sol ubivis locorum in terris est, non secundum essentiam suam, sed secundum virtutem suam & potentiam. Ut verum dicam, non est cur senten-



sententiam illam improbem. Video namque perfectionem rerum mundanarum in hoc esse, ut *potentia sua ulterius quam essentia extendantur*; quam perfectionem proculdubio à D E O habent, qui istas *ad imaginem suam creavit*. Et quo majores sunt potentia, seque latius extendunt, eò perfectiores & imagini suæ magis conformes sunt: veluti suaveolentes atque medicinales herbae, lapides, flores, &c. Atqui ego quidem existimo D E V M tunc perfectiorem fieri, quando dicitur operari posse, videre, audire, *ubi suâ essentia non est*, quàm cum dicitur *essentia sua praesentiam requiri ad operandum, videndum, aut audiendum*.

VII. D E V M *non omnia & singula certò præscire, sed quaedam verè sperare, expectare, metuere, & suspicari; & quaedam scire per discursum: ac proinde non esse perfectissimè sapientem*.

A V O R S T I O, *Disp. de D E O, pag. 311.* Sapientia D E I per se minimè requirit, ut D E V S *omnia & singula*, quaecunque nunc in mundo fiunt, ab æterno scientiâ visionis absolutâ prænoverit.

*Ibidem.* Nihil vetat etiam in D E O (generatim loquendo) aliquem talem esse *discursum*, quo unum post aliud, & rursus unum propter aliud, aut esse aut fieri velit. Imò sana ratio exigit, ut quia vera præresis in D E O locum habet, respectu eorum omnium quæ sunt aut fiunt extra ipsam, etiam *dianoia* quædam, sed divina & ab omni defectu liberrima, locum in ipso inveniat. *Ibidem. pag. 271.* Videtur omninò quædam *dianoia*, sed merè divina, & nostræ valdè dissimilis esse in D E O.

*Ibidem. pag. 441.* Pleniùs respondere videntur, qui certam quidem in genere universam D E I scientiam esse docent, sed ita tamen ut plures certitudinis causas in visione præsentium, ac præteritorum, quam in *visione futurorum contingentium* agnoscant, atque ita horum *spem atque expectationem* comparativè loquendo aliquatenus incer-

*tam esse statuunt: namque quatenus ipsa opera, quæ futura sperantur, nondum re ipsa existunt: imò quatenus respectu suarum causarum, à quibus proximè sive immediatè pendent, merè contingentia sunt, hoc est, tam non fieri, quam fieri possunt: nec per absolutum aliquod decretum ad alterutram partem præcisè determinata sunt. Quo sanè respectu vera & propriè dicta spes sive expectatio DEO attribui potest.*

*Ibidem.* Quod de spe sive expectatione DEI diximus, idem suo modo de optatione seu desiderio DEI statuendum est.

*Ibidem pag. 451.* DEVS suo modo aliquando *metuit*, hoc est, meritiò *suspicitur* & prudenter *conjicit*, hoc vel illud malum oriturum. *Ibidem.* Quatenus & quo sensu *Spes* in DEVM cadit, eatenus & eodem sensu *metus* seu *timor* eidem attribui potest.

*Ibidem pag. 256.* Absit ut DEO vel hypocrisin, vel temeritatem, atque imprudentiam ejusmodi attribuamus, cujusmodi per *infallibilem omnium futurorum prævisionem* induci omninò videtur.

*Ibidem pag. 275.* Qui *præscientiam* DEI universaliter simul & æqualiter, sive prorsus eodem modo *ad omnia quaecunque fiunt*, tam necessaria quam contingentia, tam mala quam bona, sine delectu *extendunt*, illi arbitrij nostri libertatem, omnemque rerum contingentiam everrunt; imò DEVM ipsum peccati auctorem tandem manifestè constituunt.

Ab EPISCOPIO, *Disp. de pecc. Adami, Thes. 18.* Neque verò *respectus decreti & præscientiæ divinæ* quidquam facere nobis videntur, ad hoc, ut actus liberi, *necessarij etiam* dici possint.

*Disput. privat. de DEO, Thes. 10.* Inter quæ (scitu non necessaria) an referri non debeat operosa illa quæstio *de scientia futurorum contingentium* absolutâ & conditionatâ disquiri permittimus.

## ARTICVLVS II.

*De Cognitione DEI.*

**D**Uobus autem modis DEVM cognoscimus : primò per ipsam creationem, conservationem, & gubernationem universi hujus mundi. Is enim oculis nostris est instar Libri pulcherrimi, in quo creaturæ omnes, à minimis usq; ad maximas, veluti literæ quædam sunt inscriptæ, ex quibus invisibilia DEI conspici & cognosci possunt; nempè *æterna ipsius potentia & divinitas*, ut Apostolus Paulus loquitur, Rom. 1.20.1. Quæ omnia sufficiunt ad homines convincendos & inexcusabiles reddendos. Secundò seipsum multò clarius & manifestius in sacro suo & divino verbo nobis cognoscendum præbet ac patefacit, quantum scilicet nobis in hac vitâ ad ipsius gloriam & ad suorum salutem necessarium est.

---

Contra hunc Articulum doceri videtur.

I. *Nullam omninò haberi posse notitiam de DEO, sine supernaturali revelatione.*

A VORSTIO, *Disp. de DEO*, pag. 128. Non existimamus  
 B innatam

innatam esse nobis aliquam DEI notitiam. *Ibidem.* Etiamnum integræ nationes inveniuntur, quæ nullam Divinitatis opinionem habere videntur.

*Apolog. Exeg. pag. 5.* Semper patefactio aliqua tum naturalis, tum supernaturalis, ipsam DEI notitiam præcedit necessario.

*Paraphr. ad Rom. 1. 20.* Tametsi enim præcipuæ DEI virtutes, puta æterna ipsius potentia, & divina ejusdem voluntas inde à creatione mundi aliquo modo occultæ ac velut invisibiles fuerunt, nunc tamen hæ virtutes ex ijs, quæ per Christum & Apostolos factæ fuerunt, clarè intellectæ perspiciuntur. Vnde fit ut impij & injusti illi nullam impietatis suæ excusationem in medium afferre possint.

*Schol. ad Rom. 1. 20. τὰ γὰρ ἀόρατα.* ] Hæc verba prolepsin continent, quâ Apostolus concedit hætenus quodammodo invisibilia & occulta fuisse, quæ nunc in Evangelio clarè revelata sunt. Itaque comma ponendum est post nomen κόσμος, & prima ista verba sic interpretanda sunt. Quæ enim ipsius invisibilia fuerunt inde à creatione mundi. Phrasin prorsus similem vide Matth. 13. 35.

Τοῖς πηγάσιν] Intelligit omnia ea, quæ tum à Christo, tum ab Apostolis factæ fuerunt ad Evangelij confirmationem. Confer. Act. 2. 22.

Αἱ δὲ αὐτῶν δύο αἰετὶς] His duobus nominibus completitur Apostolus duas primarias Evangelij partes, nempe divina promissa & præcepta. Æterna enim potentia DEI significat illam DEI virtutem, quâ servat ab æternâ morte, quicumque ipsi adhærent. Confer. Ephes. 1. 20. Per Divinitatem autem nihil aliud quam divina voluntas, quæ solidè nobis in Christo patefacta est, significatur. Confer Col. 2. 9. Ephes. 3. 19. Hæc explicatio est Socini contra Wiek. pag. 341. 342. Catech. Racov. pag. 23. 24.

A SIM. EPISCOPIO, *Disp. priv. de cognit. DEI, corol. 2.*  
3. An cognitio DEI sit naturalis? Distinguiamus. An cognitio



gnitio DEI, quæ ex naturâ habetur, sit *naturalis*? *Negamus.*

### ARTICVLVS III.

#### *De Sacrà Scripturâ.*

**C**ONfitemur hoc DEI verbum non fuisse ullâ humanâ voluntate aut allatum aut traditum : sed sanctos DEI viros divino afflato Spiritu illud elocutos esse, ut testatur divus Petrus I. Postea verò DEVS ipse pro immensâ suâ curâ & sollicitudine, quam de suis, suorumque salute gerit, servis suis Prophetis & Apostolis mandavit, ut sua ille oracula scriptis committerent : ipseque adeò duas tabulas Legis, digito suo exaravit : quæ causa est cur ejusmodi scripta sacram & divinam Scripturam appellamus.

Contra hunc Articulum doceri videtur.

I. *Prophetas & Apostolos S. Scriptura Scriptores in scribendo non semper, vel ubique, actos à Spiritu S. sed in nonnullis potuisse errare.*

A VORSTIO, *Libello de Autor. S. Script. Steinf. ed. p. 15.* Quamvis in quibusdam paucis rebus, quæ nullius sunt ponderis ( quum fieri possit, ut alius alio talium rerum veritatem melius tenuerit ) fortasse aliquantum aut etiam, multum diversè alius ab alio scripserint.

*Ibidem. pag. 104.* Fieri posset, ut verissima ea omnia essent, quæ de ipsis historia affirmat, & tamen ipsi nonnunquam hac in parte ( in interpretatione locorum aliquorum V. T. & explicatione argumentorum inde ductorum ) *leuiter errassent.*

P. CYPRIUS affirmavit Ioanni Taurino, esse inter RE-MONSTRANTES, qui dubitent de *ἀποκρίσις* S. Scripturæ.

I. ARMINIUS affirmavit, in publicâ disputatione, Apostolos quædam scripsisse non ex instinctu Spiritus sancti, quod probare conabatur ex 1. Corinth. 7. 12.

#### ARTICVLVS IV.

#### *De Canonicis Libris Vet. & Novi Testamenti.*

COMPLECTIMUR autem sacram Scripturam duobus illis voluminibus Veteris & Novi Testamenti, qui libri CANONICI vocantur, de quibus nulla est controversia. Eorum hic est tum numerus, tum ordo in Ecclesia DEI receptus. *Quinque libri Mo-  
sis, liber Josue, Judicum, Ruth, duo libri Samue-  
lis, duo Regum, duo Chronicorum, qui & Pa-  
ralipomenon vocantur, primus Esdræ, Nehe-  
mias, Esther, Iob: item Psalmi Davidis, tres  
libri Salomonis, nempe Proverbia, Ecclesia-  
stes, & Canticum Canticorum: quatuor Prophe-  
tæ Majo-*

*ta Majores, Esaias, Ieremias, Ezechiel & Daniel: adhæc duodecim etiam Minores Prophetæ. Novi porro Testamenti libri Canonici sunt, Evangelistæ quatuor, divus scilicet Matthæus, Marcus, Lucas, & Johannes: Acta Apostolorum: quatuordecim Epistolæ divi Pauli, & septem reliquorum Apostolorum: Apocalypsis divi Iohannis Apostoli.*

REMONSTRANTES quidam dubitare videntur de Canonicâ autoritate nonnullorû librorum N. Testam. atque imprimis Epistolæ ad Hebræos, cujus autorem nonnemo inter ipsos dixit non videri scriptorem canonicum, quia cap. VII. ineptis utatur argumentationibus.

---

## ARTICVLVS V.

### *De Auctoritate S. Scripturæ.*

**H**OSCE Libros solos recipimus tanquam sacros & Canonicos, quibus fides nostra inniti, confirmari, & stabiliri possit. Et credimus absque ullâ dubitatione ea omnia, quæ in illis continentur: idq; non tam quod Ecclesia illos pro Canonicis recipiat & comprobet, quàm quod Spiritus Sanctus nostris conscientijs testetur, illos à DEO emanasse: & eo etiam quod ipsi hanc suam

autoritatem per se satis testentur ac comprobent: quum & ipsi cæci rerum omnium, quæ in illis prædictæ fuerunt, impletionem & executionem clarè conspicere, & veluti sensibus percipere possint.

Nonnemo inter REMONSTRANTES dixit in quadam collatione, se non credere propterea aliquid verum esse, quod Apostolus Paulus id scribat.

---

## ARTICVLVS VI.

### *De discrimine Librorum Canoniconum & Apocryphorum.*

**D**ifferentiam porrò constituimus inter libros hosce sacros, & eos quos Apocryphos vocant: utpote quod Apocryphos legere quidem Ecclesia possit, & documenta ex ijs desumere in rebus, quæ consentiunt cum libris Canonicis: at nequaquam ea est ipsorum autoritas & firmitudo, ut ex illorum testimonio aliquod dogma de fide & Religione Christiana certò constitui possit: tantum abest, ut aliorum autoritatem infringere vel minuere valeant.

---

## ARTICVLVS VII.

*De Perfectione S. Scripturae.*

**C**Redimus etiam sacrã hanc Scripturam perfectissimè omnem D E I voluntatem complecti, & in illâ abundè ea omnia doceri, quæcunque ab hominibus credi necesse est, ut salutem consequantur. Itaque cum illic exactissimè & fusè descripta sit omnis divini cultus ratio, quam D E V S à fidelibus exigit: nulli hominum ( quamvis Apostolicâ dignitate prædito, ac ne ulli quidem Angelo è cœlo dimisso; ut divus Paulus loquitur) fas est aliter docere, quam jam pridem in sacris Scripturis edocti sumus. Quum enim vetitum sit, ne quis D E I verbo quidquam aut addat, aut detrahat, satis eo ipso declaratur sacram hanc doctrinam omnibus suis numeris & partibus perfectam ac absolutam esse. [Unusquisque itaque diligenter cavere debet, ne quid illi addat aut detrahat, quo sapientia humana cum sapientiâ divinâ commisceri possit.] Ideoque cum hisce divinis Scripturis, atque hac D E I veritate



ritate nulla alia hominum, quantavis sanctitate prædicatorum, scripta, nulla consuetudo, nec multitudo ulla, nec antiquitas, neq; temporum præscriptio, nec personarum successio, neque concilia ulla, nulla denique hominum decreta aut statuta conferenda aut comparanda sunt, utpote quod DEI veritas rebus omnibus antecellat. Omnes enim homines sunt mendaces, [ & illorum sapientia DEO subjici non potest ] sunt ipsâ vanitate vaniores. Idcirco toto animo rejicimus quæcunque cum certissimâ hac regulâ non conveniunt, uti ab Apostolis edocti, quum dicunt: *Probate Spiritus, an ex DEO sint: Et, Si quis venit ad vos, & hanc doctrinam non adfert, ne recipite eum domum, &c.*

---

### ARTICVLVS VIII.

#### *De SS. Trinitate Personarum in unicâ Essentiâ Divinâ.*

**I**UXTA hanc Veritatem, & Verbum hoc DEI, credimus in unicum solum DEVM, qui unica atque æterna est essentia, distincta re ipsa

reipsa, verè, & ab æterno in tres Personas, quarum quæque suas habet proprietates incommunicabiles, nempe in Patrem, Filium, & Spiritum Sanctum. 1. Pater causa & origo & initium est omnium rerum tam visibilium quam invisibilium. Filius est Verbum, Sapientia, & Imago Patris. Spiritus Sanctus est æterna [atque essentialis] potentia & virtus procedens à Patre & à Filio. Ita tamen ut hæc distinctio non efficiat ut DEVS sit veluti in tres partes divisus: quandoquidem Scriptura nos docet, Patrem, & Filium, & Spiritum Sanctum suam quidem singulos habere hypostasim seu subsistentiam proprietatibus suis distinctam: ita tamen ut tres hæc Personæ sint tantum unus & solus DEVS.

2. Certum igitur est Patrem non esse Filium, nec Filium esse Patrem, neque Spiritum Sanctum esse aut Patrem aut Filium. Interim tamen Personæ illæ sic distinctæ, neque sunt divisæ, neque confusæ, neque permixtæ. Neque enim Pater carnem humanam assumpsit, nec Spiritus Sanctus, sed solus Filius. Pater nunquam sine Filio suo fuit, nec sine Spiritu suo Sancto, quia singuli in una

eâdemque essentiâ ejusdem sunt æternitatis. Nullus ex his aut primus aut ultimus est, quia omnes tres vnum sunt in veritate & potentiâ, in bonitate & misericordiâ.

---

Contra hunc Articulum doceri videtur.

- I. *Dogma de Trinitate Personarum in unâ DE I essentiâ, non tantùm sensui communi, sed etiam divinis testimonijs apertè adversari.*

Ab HENR. WELSHINGIO. *Libello de Offic. hom. Christ.* fol. C.3. Evangelici unâ cum Pontificijs, non minus evidenter, quam vehementer errant, quod non Patrem tantum Domini nostri IESV Christi, illum unum DEVM nostrum, cæli terræque Creatorem esse, credunt, sed etiam ipsum IESVM Christum, seu DE I Filium, nec non & Spiritum Sanctum eundem illum unum DEVM esse statuunt. Quod non modo cum ipso sensu communi, ut ipsimet fateri tandem coguntur, manifestè pugnat, sed divinis testimonijs apertè adversatur.

*Ibidem.* fol. C.3. Pugnant hæc inter se, illum DEVM nostrum, cæli terræque Creatorem esse unum tantum numero, & tres esse, quorum unusquisque sit ille DEV S noster. Item. Tres vel etiam duæ personæ esse nequeunt, ubi est una tantum numero sive individua essentia, sed ad plures unâ personas constituendas, plures etiam unâ individua essentia requiruntur.

- II. *Singulas Personas divinas habere propriam suam Essentiam.*

A CORN. VORSTIO, *Disp. de DEO*, pag. 208. Sunt tres saltem, si non plures diversæ res in DEO. Et contradictio quædam videtur esse, rem ullam verè existere, quæ non habeat suam quandam propriam essentiam,

---



## ARTICVLVS IX.

*De SS. Trinitate.*

**H**Æc verò omnia cognoscimus tam ex Sacræ Scripturæ Testimonijs, quam ex Effectis, ijs potissimùm, quæ nos in nobismet ipsis sentimus. Et sacræ quidem Scripturæ Testimonia, quæ nos docent sacram hanc Trinitatem credere, passim in Veteri Testamento occurrunt; quæ non tam numeranda, quam certo iudicio seligenda sunt. Qualia hæc sunt, Geneseos primo dicit *DEVS, Faciamus hominem ad imaginem & similitudinem nostram, &c.* Et mox, *Creavit itaque DEVS hominem ad imaginem & similitudinem suam, marem, inquam, & fœminam creavit eos.* Item, *Ecce Adam tanquam unus nostrum factus est.* Ex eo enim quod dicitur, *Faciamus hominem ad similitudinem nostram,* apparet pluralitatem esse Personarum in Deitate. Quum autem dicitur, *DEVS creavit, &c.* indicatur unitas Divinitatis. Verum quidem est hic non exprimi, quot sint personæ: tamen quod in Veteri Testamento

obscurè traditum est, id in Novo nobis clarè admodùm exponitur. Cum enim Dominus noster IESVS Christus in Iordane baptizaretur, *Patris* vox audita est dicentis, *Hic est Filius meus dilectus*: & *Filius* ipse in aquis est visus: *Spiritus* verò *Sanctus* sub specie columbæ apparuit. [An non igitur tres sunt?] In communi omnium fidelium Baptismo hæc formula à Christo instituta est: *Baptizate omnes gentes in nomine Patris & Filij & Spiritus Sancti*. Sic etiam in Evangelio Lucæ, Angelus Gabriel, Mariam Domini nostri matrem alloquitur: *Spiritus Sanctus superveniet in te, & Virtus Altissimi inumbrabit te, proptereà id quod nascetur ex te sanctum, vocabitur Filius DEI*. [Videmus hic nominari Patrem Altissimum, postea Filium DEI, qui ex Virgine natus est, & Spiritum Sanctum, qui Virginem inumbravit.] Item, *Gratia Domini nostri IESV Christi, & charitas DEI, & communicatio Spiritus Sancti sit vobiscum*. [Atque hic videmus clarè tres nominari.] Item, *Tres sunt qui testificantur in cælo, Pater, Sermo, & Spiritus Sanctus, & hi tres unum sunt*. Quibus omnibus locis plenissimè docemur in  
unico

unico DEO tres esse Personas. I. Etsi autem hæc doctrina omnem humani ingenij captum superet, illam tamen nunc ex verbo DEI firmiter credimus, expectantes donec in cœlo plenè illius cognitione fruamur. Notanda porrò sunt etiam harum trium Personarum singularia officia & effecta, quæ erga nos singulæ exerunt. Pater enim vocatur Creator noster per virtutem ipsius; Filius noster Servator per sanguinem ipsius, Spiritus Sanctus est Sanctificator noster per inhabitationem ipsius in cordibus nostris. Atque hanc de SS. Trinitate doctrinam jam inde ab Apostolorum ætate ad hæc usque tempora semper vera retinuit Ecclesia, & adversus *Judeos*, *Mahumetanos*, aliosque pseudochristianos & hæreticos defendit, quales fuerunt *Marcion*, *Manes*, *Praxeas*, *Sabellius*, *Samosatenus*, [*Arius*] & similes, qui omnes jure meritòque ab orthodoxis Patribus condemnati sunt. Recipimus itaque libenter hic tria illa *Symbola*, nempe *Apostolorum*, *Nicenum* & *Athanasij*, & quæcunque de hoc dogmate juxta illorum Symbolorum sententiam [sacra Concilia] statuerunt.

Contra hunc Articulum doceri videtur.

I. *Nulla extare testimonia in S. Scripturâ, quibus Trinitas Personarum in Deitate probari possit.*

Ab H. WELSINGIO, *Lib. de Off. hom. Christ. fol. C. 4.*  
Perquirant Evangelici Scripturas quamdiu velint, nunquã dogma istud de Trinitate in illis expressum invenient. Sed neque vel apertè vel obscurè id colligi deprehendent. Quinimò ( ut interim de Scripturæ testimonijs dogma istud apertè damnantibus aliquid explicatius dicamus ) planè contrariam sententiam in S. literis consignatam reperient.

---

## ARTICVLVS X.

*De æterna Deitate Filij DEI, Domini nostri IESV Christi.*

CRedimus IESVM CHRISTVM respectu naturæ ipsius divinæ, esse unicum DEI Filium, 1. ab æterno genitum, 2. non factum aut creatum, sic enim esset creatura, sed Patri *ἑμoύστον καὶ σὺναιδόν*, seu ejusdem cum Patre essentię, eique coæternum, characterem, seu veram imaginem, *ὑποστάσις* Patris & splendorem glorię ejus, in omnibus [ & per omnia ] ei æqualem. 3. Est autem is Filius DEI non tantum ab eo tempore, quo naturam nostram

stram

stram humanam induit, sed ab æterno, uti hæc testimonia inter se collata nos docent. Moses ait *DEVM creasse mundum*: At divus Iohannes *per Sermonem, quem DEVM vocat, omnia facta fuisse dicit*. [Et quem D. Ioannes *Sermonem* vocat, eundem D. Paulus *Filium* vocat] *asserens, DEVM per Filium suum secula seu mundum condidisse*. [Præterea docet D. Paulus *DEVM omnia per IESVM Christum creasse*.]

4. Sequitur itaque cum, qui & *DEVS*, & *Sermo*, & *Filius*, & *IESVS* Christus dicitur, jam tum extitisse, quum ab ipso omnia condita fuerunt. Idcirco Michaas Propheta inquit, *Exitus ejus ab initio, à diebus æternitatis*. Item, [*Est primogenitus omnis creaturæ*] &, *Est absque initio dierum, & absque fine vitæ*. [Psalmo secundo, *Filius meus es, ego hodie genui te: Osculamini Filium*.] Est igitur ille verus & æternus *DEVS*, omnipotens ille, quem invocamus, adoramus, & colimus, 5. [omnibus diebus vitæ nostræ.]

---

Contra hunc Articulum doceri videtur.

I. *IESVM Christum non vocari Filium Dei, respectu naturæ ipsius divinæ.*



Ab HENR. WELSINGIO, *De offic. hom. Christ. fol. D. 1.*  
 Sequitur hominem illum E I S V M Nazarenum sine ullâ divi-  
 nâ cujusdam alterius essentia, quam ipse habeat, considera-  
 tione, esse unicum D E I Filium.

*Ibidem. fol. D. 2.* Concludendum est igitur Filium D E I uni-  
 genitum non esse substantiam quandam divinam, ex ipsâ sub-  
 stantiâ D E I genitam, quæ humanam naturam induerit.

A VORSTIO, *Disp. de D E O, pag. 432.* Christus quâ homo  
 est, & quâ Mediator à D E O constitutus, hoc respectu etiam  
 unicus & singularissimus D E I Filius appellari debet.

II. Christum appellari D E I Filium, non quod ab æ-  
 terno à Patre sit genitus, sed propter ejus in tempore  
 ortum seu nativitatem ex Virgine, resurrectionem, &  
 personæ regie seu muneris excellentiam.

A WELSINGIO, *De Offic. hom. Christ. fol. C. 7.* Nihil  
 apud sacros autores legimus, quod nobis persuadere  
 queat, aut saltem innuere, D E V M ex suâ substantiâ  
 generare. Quod enim *Psalm 2. 7.* dicitur, *Ego hodie ge-  
 nui te*, id non ad æternam aliquam generationem (unde sal-  
 tem consequenter illa substantialis, ut sic dicam, gene-  
 ratio elici possit) sed ad eam quæ in tempore, ut loquun-  
 tur, & nominatim respectu Christi, in die Resurrectionis  
 facta est, referri debere, cum alia multa tum præsertim  
 loca illa *Act. 13. 33. Rom. 1. 4.* Satis evidenter ostendunt.

*Ibidem.* Cur I E S V S Christus D E I Filius appelletur,  
 nempe unicus & singularis ille D E I filius, duplex est  
 causa, altera, videlicet, quæ ad ejus ortum & nativitatem  
 pertinet: altera, quæ ejusdem dignitatem, & personæ,  
 quam sustinet, excellentiam respicit, sine ullâ ipsius essentia  
 quæ aliorum filiorum D E I essentiâ præstantior. ab eâve di-  
 versa sit, vel mentione vel consideratione.

*Ibidem. fol. C. 8.* Priorem causam expressit ipse Ange-  
 lus Gabriel, inquiens ipsi virgini, mox I E S V Christi fu-  
 turæ matri, *Luc. 1. SS. Spiritus S. superveniet te, & virtus*  
 altis-

*altissimi inumbrabit te*, ideoq<sup>ue</sup> quod ex te nascetur, vocabitur Filius DEI. Vides modum conceptionis & primæ existentia illius hominis IESV Nazareni causam esse, ut ipse homo IESVS Nazareus, qui Christus est, DEI Filius appelletur, & quidem consequenter singularis sive unicus, & unigenitus DEI Filius, quandoquidem nemo alius unquam talem à DEO sui ipsius originem & generationem habuit. *Ibidem*. Vides hic rursus hominis illius IESV Nazareni, summam post DEVM dignitatem, & regie personæ, quam in ipso DEI populo sustinet, omnium maximam excellentiam causam esse, cur sit ille unicus & singularis DEI Filius.

*Ibidem. fol. D. 1.* Ipse Christus satis apertè docuit, idem esse in ipso, quòd sit Christus, & quod sit Filius DEI, cum *Ioan. 10. 36.* Iudæis ostendens, cur se appellasset DEI Filium, rationem attulit, quod Pater ipsum sanctificasset, & in mundum misisset.

A CONR. VORSTIO. *Lib. de Filiatione Christi, pag. 19.* Nullo pacto fieri potest, ut DEVS aliquem ex suâ substantiâ generet.

*Ibidem. pag. 37.* Aeterna & ineffabilis generatio Filij ex substantia Patris neque sacris literis explicatur.

*Ibidem.* In Christo homine triplex divina Filiatio, seu ex DEO generatio observanda est. Prima pertinet ad hominis Christi ortum. Secunda ad sanctificationem, sive unctionem illam divinam, quâ etiam tum, cum mortalis homo esset, à DEO instructus fuit. Tertia ad gloriosam resurrectionem.

*Ibidem. pag. 44.* De primâ Filiatione inquit Angelus: *Luc. 1. 55.* Propterea quod virtus altissimi te inumbrabit, &c: *Ibidem. pag. 49.* De secundâ Filiatione suâ divinâ ipse Christus disserit *Ioan. 10. 35. 36.* Si illos dixit DEOS &c. quibus verbis significat Christus se propterea meritò vocari Filium DEI, quia sit à Patre suo sanctificatus, hoc est, Spiritum S. copiosè nactus, & cum divino imperio

ac potestate in mundum missus ad servandum genus humanum.

*Ibidem. pag. 59.* De postremâ eâque perfectissimâ Christi hominis Filiatione divinâ differit Apostolus, *Act. 13. 32. 33.* Ubi docet Christum à DEO fuisse resuscitatum à mortuis, atque ita impletum illud *Psal. 2. 7.* Et *pag. 64.* Neque desunt, qui locum *Rom. 1. 4.* ita exponant, ut doceant Christum hominem juxta carnem mortalem, naturâ quidem ex semine Davidis esse factum: juxta Spiritum verò, quo fuit à Patre sanctificatus, Filium DEI esse definitum, seu definitâ aut perfectâ quadam ratione factum, nempe per resurrectionem è mortuis.

### III. *Filium DEI secundum Deitatem suam non esse Patri æqualem.*

A CONR. VORSTIO, *Disp. de DEO, pag. 185.* Scripturæ Patri suam prerogativam semper asserere solent, præsertim ubi conjunctam illius simul & Christi mentionem faciunt. Exempli gratiâ *Ioan. 1. 1.* dicitur cum articulo, *Et sermo erat apud τὸν Θεὸν* videlicet Patrem, qui κατ' ἐξοχὴν solet appellari DEVS. Verùm statim de Christo subjicitur, *Et sermo erat Θεὸς, absque articulo.*

*Ibidem. pag. 179.* In N. T. quoties DEI Patris simul & Christi mentio fit, toties *Pater κατ' ἐξοχὴν* DEVS, Filius autem Dominus appellatur: qui propterea etiam alibi Christus Domini seu Iehovæ, vel Christus DEI appellatur, ut subordinatio ejus ad DEVM Patrem, à quo totus ipse pendet, obiter hac phrasi indicetur.

A WELSINGIO, *de Offic. hom. Christ. fol. C. 5.* Quod si loca penè innumerabilia, in quibus Christus ab illo uno DEO distinguitur, non satis sint ad persuadendum unicuique, *Christum non esse illum unum DEVM*, certè illud satis superque esse debet, quod IESVS Christus illius unius DEI Filius passim appellatur. *Articulus enim in Græco nomini DEI additus unum illum DEVM significandi vim habet.* Quare si Christus unius illius DEI Filius est, nul-

est, nullâ ratione fieri potest, ut ipse Christus sit unus ille DEVS.

Ab ADOL. VENATORE, *contra Paf. Dord. pag. 57. 58. 59.*

Existimo neminem debere constringi, ut in doctrinâ de Deitate IESV Christi, agnoscat vocem ὁμοούσιος, Nam vox hæc primum conficta fuit in Concilio Niceno, in quo Episcopi, qui hanc vocem ibi decreverunt, in duobus apertissimè errarunt. Primum erat quod hi egregij, si Dijs placet, Episcopi decreverant, non licere Ministris verbi divini per omnem vitam suam unquam uxores ducere.

Alterum, quod ut confessioni de hac voce ὁμοούσιος ab ipsis decreta, fidem aliquam facerent, eandem imposuerint sepulchris duorum Episcoporum defunctorum, cum invocatione ad defunctos illos factâ, ut huic confessioni in signum & testimonium veritatis cum ipsis subscribere vellent. Et postero mane reversos ipsos invenisse confessionem hanc, quam obsignatam sepulchro imposuerant, duorum istorum Episcoporum manibus subsignatam. *Niceph. Hist. Eccl. l. 8. c. 23.*

*Ibidem. pag. 61.* Nolo etiam Constantini sententiam improbare, cum existimaret Alexandrum & Arium in pace potuisse manere, & unitatem fidei servare, utrumque in sententiâ suâ persistentem, nec necesse fuisse ut hac de re contenderetur, sed fuisse tantum subtilitates quasdam minimè necessarias, de quibus inter ipsos contendebatur. *Euseb. in vita Constant. lib. 2. cap. 63. & seqq.*

*Theol. mera & vera præfat. pag. 24. 25.* Celeberrimum primum Concilium, quod in Christianitate publicâ, magno cum apparatu, est celebratum, fuit Concilium Nicenum, in quo multi fuerunt abusus, & nulla alia miracula facta, quam hoc sequens, quod describit Nicephorus, lib. 8. c. 23. &c. An poterant Episcopi, qui Symbolum hoc de Deitate IESV, & de articulo de Trinitate ita composuerant & concluderant, hoc uti medio, quod in Scripturis tam rigidè vetatur?



*Theol. mera & vera, pag. 24. 25. Quæst.* An ergo I E S V S unum est cum Patre? *Resp.* Ita ipse loquitur apud Ioannem Evangelistam, cap. 10. v. 30. Ego & pater unum sumus.

*Quæst.* An voluntas I E S V semper una fuit cum voluntate Patris? & an unquam illi repugnavit? *Resp.* Ille semper unus erat voluntate cum Patre. *Quæst.* Cum passurus erat, an tum unus erat cum Patre, & voluntatem suam D E I voluntati subiciebat? *Resp.* Patet id ipsum ex ipsius precatione Marc. 14. 36. *Quæst.* An non omnes quoque fideles unum esse debent cum D E O, & cum I E S V, idem sentire, & eandem habere voluntatem? *Resp.* Omnino hoc necessarium est: &c. *Quæst.* Explica mihi totam seriem, quomodo nos unum cum D E O, & naturæ ipsius participes fiamus? *Resp.* Id ipsum nobis egregiè describit Apostolus Petrus, I. Epist. cap. 1. à v. 2. ad 12.

Ab A R M I N I O *Declar. ad Ord. Holl. p. 64.* Nullo modo tanquam benè dictum excusari potest, Filium D E I *ὁ ὁ θεὸς* esse.

A P T R O C Y P O, *contra Smout. pag. 56.* Non est doctrina hæretica, neque unquam in quoquam damnata, docere Filium D E I non esse *ὁ ὁ θεός*.

A S. E P I S C O P I O, *Disput. privat. 11. corol. 3.* An Filius sit *ὁ ὁ θεός*? Distingui quidem posse, sed propter periculum abstinendum putamus.

Notandum est hic diligenter, quod etiam V O R S T I V S benè docet, *Disput. de Causis deser. Pap. 22. Thes. 10.* eos qui negant Christum respectu essentiae divinae *ὁ ὁ θεὸς* rectè vocari, non posse statuere Christum, quoad absolutam Deitatis essentiam, esse hunc ipsum unum numero D E V M, qui prorsus sit independens.

IV. *Ex opere creationis, quod Filio attribuitur, non posse probari ejus æternam Deitatem.*

A V O R S T I O, *Disput. de D E O, pag. 125.* Quod Zanchius ex eo colligit æternitatem D E I, quod Heb. 1. 2. & 11. 3. dicitur



dicitur ipse *secula condidisse*: non satis solidum est argumentum: cum per absolutam DEI potentiam fieri possit, ut qui ipse aliquando ortus est, per donatam DEI virtutem mundum aliquem ex subiectâ seu præparatâ materiâ constituat, ex quo deinde multa secula ex ordine fluant.

V. IESVM Christum non esse verum & æternum DEVM.

A W E L S I N G I O, *Lib. de Offic. hom. Christ. fol. C. 5.* Ex quo necessariò sequitur, ne ipsum quidem IESVM Christum esse illum DEVM. *Ibidem.* Quare ne ipse quidem IESVS Christus est ille noster unus DEVS. *Ibidem.* Fieri non potest, ut ipse Christus sit unus ille DEVS.

*Ibidem. pag. C. 6.* Et satis hæc in præsentia esse volumus, ad istum insignem Evangelicorum errorem patefaciendum, dum unâ cum Pontificijs, statuunt, non solum IESV Christi Patrem, sed etiam tam DEI Filium, quam Spiritum S. esse illum unum DEVM nostrum, cæli terræque creatorem.

P. C V P V S affirmavit Ioanni Taurino, esse inter Remonstrantes, qui dubitent de æternâ Deitate IESV Christi.

REMONSTRANTES nonnulli palàm professi fuerunt, se in S. Scripturis nullum invenire potuisse argumentum, ex quo æterna Deitas IESV Christi solidè probari possit.

## ARTICVLVS XI.

### *De Personâ, & æterna Deitate Spiritus Sancti.*

C Redimus etiam & confitemur Spiritum Sanctum à Patre & Filio ab æterno procedere: itaque nec factum, nec crea-

tum, nec genitum fuisse, sed ab utroque tantum procedentem, qui ordine tertia est Trinitatis Persona, i. ejusdem essentia, gloria & majestatis cum Patre & Filio. Ideoque & ipse verus & æternus DEVS est. 2.

Contra hunc Articulum doceri videtur.

I. *Spiritum Sanctum non esse Personam, sed tantum vim atque efficaciam quandam DEI.*

Ab HENR. WELSINGIO, *De Offic. hom. Christ. fol. D. 3.* Effet hic aliquid dicendum de Evangelicorum errore, quod Spiritus S. sit Persona. Ibidem. Hinc sequitur eum ne Personam quidem esse, sed vim atque efficaciam DEI, quâ res aliquo modo sanctificantur.

Ab HENR. SLATIO, *Epist. ad N. 9. Mart. A. 1608.* Potentia DEI est Spiritus narium & oris DEI, hoc est, est potentia, quam DEVS de se sparsit, postquam in tempore creare cepit. Cepit autem creare, cum Spiritum edere, hoc est, spirare inciperet. Et hæc quidem potentia essentialis DEI potentia non est, etiamsi procedat ab essentiali potentia; quemadmodum lux Solis origo atque principium est luminis aërij, quo Sol, cu instrumentum, utitur ad omnes suas operationes.

II. *Spiritum Sanctum non esse verum ac æternum DEVM, cum Patre & Filio.*

Ab HENR. WELSINGIO, *Lib. de Off. hom. Christ. fol. C. 6.* Et satis hæc in præsentia esse volumus, ad istum insignem Evangelicorum errorem patefaciendum, dum, unâ cum Pontificijs, statuunt non solum IESV Christi Patrem, sed etiam tam DEI Filium, quam Spiritum Sanctum esse illum unum DEVM nostrum.

Ibidem.

*Ibidem. D. 3. Ex quo consequitur, si Spiritus S. non est divi-  
vine ejus essentia persona, ejus vim atque efficaciam esse.*

---

## ARTICVLVS XII.

*De Creatione Mundi: & de Angelis.*

**C**Redimus Patrem per Verbum suum,  
hoc est, per Filium cœlum, terram, &  
reliquas creaturas omnes ex nihilo creasse,  
cum illi visum fuit opportunum, singulisque  
suum esse, formam, & varia officia tribuisse,  
ut Creatori suo inservirent. Eumque nunc  
illas fovere, sustentare, & regere, secundum  
æternam suam Providentiam, & per immẽ-  
sam virtutem suam. Idque ut illæ quidem  
Homini, Homo verò DEO suo inserviat.  
Creavit etiam Angelos, omnes naturâ bo-  
nos, ut ministri ipsius essent, & electis etiam  
inservirent: quorum tamen nonnulli ab ex-  
cellenti illa naturâ, in qua eos DEVS crea-  
rat, in perditionem æternam deciderunt:  
alii verò singulari DEI gratiâ, in primo illo  
statu suo perstiterunt. Diaboli quidem &  
cacodæmones illi ita corrupti & depravati  
sunt, ut & DEI & omnis boni conjurati sint  
hostes,

hostes, qui Ecclesiæ & singulis ipsius membris tanquam prædones è speculâ omnibus viribus insidiantur, ut imposturis suis ac deceptionibus omnia destruant atque pessundent: [atque adeò quidem ut se adorari ab omnibus velint, quem in finem multa hominibus pollicentur: neque mirum hoc est, cum Diabolus Christum ausus fuerit aggredi, eumq; permovere ut ipsum adoraret.] Idcirco propriâ suâ malitiâ perpetuæ condemnationi addicti, expectant indies horrenda suorum facinorum supplicia ac tormenta. Respuimus itaque atque execramur hoc loco *Saducæorum* errorem, qui Spiritus ullos aut Angelos esse negarunt. Item & *Manichæorum* errorem, qui asserunt Diabolos ex seipsis originem ducere, & ex propriâ suâ naturâ malos esse: non autem corruptos per inobedientiam voluntariam.

---

### ARTICVLVS XIII.

#### *De Providentiâ DEI.*

**C**Redimus DEVM hunc Opt. Max. postquam res omnes creasset, eas minimè fortis

fortis aut fortunæ arbitrio commisisse, sed ipsummet illas ex præscripto sacrosanctæ suæ voluntatis ita assiduè regere & gubernare, ut nihil in hoc mundo absque illius decreto atque ordinatione contingat : 1. quanquam tamen D E V S malorum, quæ in hoc mundo accidunt, neque auctor, neque reus dici possit. 2. Tam latè patet infinita & incomprehensibilis illius tum potentia tum bonitas, ut tunc etiam opera & actiones suas sanctè & justè decernat atq; exequatur, quum & Diabolus & impij injustè agunt. Quæcunque verò ille agit, humanum captum excedentia, de ijs nolumus curiosè & supra nostrum captum inquirere : quinimò secreta & iusta tamen D E I judicia humiliter & reverenter adoramus. Sufficit enim nobis, quod Christi discipuli esse possimus, & caduntaxat discamus, quæ ipso verbo suo nos docet, neque hos fines transilire volumus. Hæc verò doctrina immensam nobis adfert consolationem. Ex illâ enim agnoscimus nihil nobis fortuitò contingere, sed omnia Patris nostri cœlestis voluntate, 3. qui pro nobis verâ paternâ curâ excubat, omnia sibi



subdita habens, ita ut ne pilus quidem capitis nostri (qui omnes ad unum numerati sunt) evelli, nec minimus passerculus humi cadere, sine Patris nostri voluntate, possit, His itaque penitus acquiescimus, agnoscen-  
tes DEVM diabolos & inimicos nostros omnes veluti habenis ita frænatos continere, ut sine ipsius voluntate & bonâ veniâ, nemini nostrum nocere valeant. Atque hoc loco detestandam *Epicuræorum* opinionem rejicimus, qui DEVM otiosum, & nihil agentem, omniaq; fortunæ & casui committentem finxerunt.

---

Contra hunc Articulum doceri videtur.

1. *Multa in hoc mundo contingere, quæ non fiant ex decreto atque ordinatione DEI, seu ex præscripto voluntatis suæ.*

A CON. VORSTIO, *Disp. de DEO, pag. 64.* De voluntate, seu proposito & consilio DEI speciali, non semper ex eventu judicandum est. Multa enim fiunt, quæ DEVS fieri non vult: nec semper fiunt, quæ ipse fieri vult.

*Ibidem. pag. 65.* Legimus DEVM postmodum quædam nolle facere, quæ antea facturum se receperat, imò juraverat: Item velle jam ea facere, adeoque reipsa jam facere, quæ tamen antea minimè se facturum prædixerat. *Item.* Non quidquid DEVS vult ab æterno, in æternum vult. Quædam in tempore reipsa vult, quæ antea sic nominatim atque id specie noluit.

*Ibidem.*

*Ibidem. pag. 306.* DEI voluntas aliquo modo mutabilis est in ijs, quæ sub conditione vult, vel quæ fieri tantum desiderat, vel quæ etiam fortassis *indefinita prorsus relinquit.* Item. Quæ verò *indefinita relinquit, de ijs nulla est DEI certa voluntas.* Ergo cum hæc à nobis fiunt, non potest dici voluntas ipsius mutata, quippe *quæ specialis hic nulla fuit: nulla, inquam, ut fierent vel non fierent præcisè.*

*Ibidem. pag. 307.* Neque enim dubium est, D E V M olim quædam definitè voluisse, quæ jam non ita vult, ac ne vellet quidem potest, quo quidem modo tunc voluit: & contra quædam jam velle, *quæ tunc noluit.*

*Ibidem.* Erratur cum ex decreto D E I colligitur, *omnia omninò in specie quæcunque in mundo accidunt, similiter ab æterno fuisse à D E O definita.*

*Ibidem. pag. 108.* Si *omnia & singula rerum eventa præcisè & ab æterno definita fuissent, nihil opus esset continuâ rerum inspectione & procuratione.*

*Ibidem.* Constat D E V M in tempore *multa facere, quæ antea prædixerat minimè se facturum, & contra multa nunc omittere, quæ antea facturum se prædixerat.* Item. Nec dici potest, *ea tantum, quæ reipsa fiunt, jam olim ab æterno definita esse.* Item. D E V S *definita sibi fuisse seriò testatur etiam ea, quæ reipsa non fiunt.*

*Ibidem. pag. 312.* Nihil absurdi ex eo sequitur, quod D E V S in tempore quædam *præcisè ac definitè velle vel nolle dicitur, quæ fortassis antea non ita præcisè vel voluit vel noluit: quemadmodum nec absurdum est D E V M nunc quædam in specie velle definire, quæ antea reipsa voluit.*

*Parasc. pag. 4.* Quæ D E V S liberè prorsus & contingenter à nobis fieri vult, ea potentius aut efficacius, quam *per modum voti & desiderij velle non potest.*

A IAC. ARMINIO, *Contra Perkins. pag. 120.* Quod D E V S vult ut fiat, hoc efficaciter efficit. Quod vult ut non fiat, hoc efficaciter impedit. Quod *neque vult ut fiat, neque vult ut non fiat, hoc permittit creaturæ.*

*Ibidem. pag. 121.* Ex eventu alicujus rei non potest concludi Deum voluisse ut eveniret.

A SIM. EPISCOPIO, *Disput. de Volunt. DEI. Thes. 4.* Et si malum aliquod per accidens propter sapientissimam DEI directionem boni occasio fieri aut esse possit, tamen malum ipsum ullâ ratione propterea sanctissimum DEVM velle dicendum non est.

*Ibidem. Thes. 21.* Sanctissimo DEO, summa injustitia & hypocrisis tribui deberet, si arcanâ voluntate definiret & ordinaret ut fiant ea, quæ revelatâ prohibet, & fieri non vult.

*Disp. privat. 6. de Vol. DEI, Corol. 5.* De volitionibus DEI non est ex eventu judicandum. Item. An non multa fiant, quæ DEVS fieri non vellet? Affirmamus.

II. DEVM statui auctorem malorum, quæ in mundo accidunt, cum docetur nihil in hoc mundo contingere absque illius decreto atque ordinatione.

A VORSTIO, *Disp. de DEO, pag. 308.* Sequeretur DEVM esse auctorem omnium scelerum, si omnia & singula, quæcunque in mundo fiunt, tam mala quam bona jam olim ab omni æternitate non modo infallibiliter prævisa, sed etiam efficaciter atque absolutè à DEO præfinita sunt.

A IAC. ARMINIO, *Contr. Perk. pag. 109. 110.* Bellarminus objicit sententiæ quorundam Doctorum nostrorum, inde sequi DEVM esse peccati auctorem; DEVM verè peccare; DEVM solum peccare, & peccatum non esse peccatum. Nulla mihi videtur per istam criminationem tuæ doctrinæ (Perkinse) injuria illata esse.

*Artic. perpend. pag. 15.* Doctoribus nostris impingi posse videtur, quod ex ipsorum doctrinâ sequatur, DEVM auctorem esse peccati, quia docent DEVM ordinasse, ut homo peccaret.

III. Multa, etiam respectu decreti divini, in hoc mundo contingenter, seu fortuitò, evenire.

A CON.

A CON. VORSTIO, *Disp. de Deo pag. 308.* Omnia omninò in specie quæcunque in mundo accidunt, ab æterno fuisse a DEO definita facilè refellitur, quia sic nulla esset in universo mundo *contingentia*, nulla quoque arbitrij libertas. *Item.* DEVS definita sibi fuisse serìò testatur, etiam ea qua reipsa non fiunt.

*Ibidem. pag. 64.* Non semper fiunt quæ DEVS fieri vult.

A IAC. ARMINIO, *Respons. ad Art. 31. pag. 94.* Non modo perperam, sed & imperitè dicitur, rem quæ respectu secundarum causarum *contingenter* fit, respectu decreti divini fieri necessariò.

*Ibidem. pag. 95.* Nego quod ossa Christi respectu decreti divini non potuerunt frangi.

*Ibidem.* Nihil itaque arbitror à me peccatum esse, quum dixi, Nihil rerum contingentium, hoc est quæ *contingenter* fiunt, seu factæ sunt, dici posse *necessariò fieri* vel factum esse respectu decreti divini.

*Artic. perpend. pag. 6.* Neque benè dictum, Omnia evenire *necessariò respectu decreti divini.*

*Ibidem. pag. 17.* Adam non est lapsus *ex decreto* neque ex ordinatione DEI. *Item.* Adam non est lapsus *necessariò, neque decreti, neque ordinationis respectu.*

A SIM. EPISCOPIO, *Disp. de Pecc. Adami Thes. 18.* Neque verò *respectus decreti divini* quidquam facere nobis videntur ad hoc, ut actus liberi, *necessarij* etiam dici possint.

## ARTICVLVS XIV.

### *De Hominis Creatione, Lapſu & Corruptione.*

CRedimus DEVM ex limo terræ hominem ad imaginem suam creasse, bonum

num, justum, & sanctum [ atque in omnibus planè perfectum, ] qui proprio arbitrio suam voluntatem ad Dei voluntatem componere & conformem reddere possit. 1. [ Deus itaque eum creavit constantem duabus partibus, corpore & animâ : corpus è terrâ conditum fuit, Spiritum verò & vitam D E V S ei inspiravit: adeò ut in homine tanta conspiciatur excellentia, ut humanum ingenium illi exprimendæ par non sit. Ejusmodi eum fuisse David testatur, ut nihil illi amplius deesset, quam quod D E V S non esset. *Gloria & honore coronatus fuit.* ] Verùm cum in honore esset, nescivit, & excellentiam suam non cognovit [ jumentis similis factus est: ] sed seipsum sciens & volens peccato, & per consequens morti ac maledictioni subjecit: dum Diaboli verbis, & imposturis aurem præbens, mandatum vitæ transgressus est, quod à Domino acceperat, seq; à D E O, verâ ipsius vitâ per peccatum subduxit atque alienavit, & totam ipsius naturam corripit ac vitiavit. Quo factum est ut morti tum corporali, tum spiritali sese obnoxium reddiderit, 2. improbus atque perversus



perversus effectus fuerit, atque in omnibus  
vijs & studijs suis corruptus, & præclara illa  
dona omnia amiserit, quæ à DEO acceperat : adeò ut non nisi exiguæ illorum scintillæ & vestigia exilia illi relicta sint, quæ  
sufficiant ad homines reddendos inexcusabiles, [ sed nequaquam ad nos bonos ac DEO  
probatos efficiendos ] quoniam quidquid in  
nobis est lucis in cæcas tenebras est conver-  
sum, ut & Scriptura ipsa docet, dicens, *Lux  
in tenebris lucet, & tenebræ eam non comprehen-  
derunt.* Ibi enim Iohannes manifestè homi-  
nes tenebras vocat. 3. [ Atque in Psalmo di-  
citur : *Penes te Domine est fons vitæ, & in luce  
tuâ clarè videmus lucem.* ] Idcirco quæcun-  
que de libero hominis arbitrio [ adversus  
hæc ] traduntur, ea nos meritò rejicimus,  
quum homo sit *servus peccati*, nihilque bo-  
ni ex se possit, *nisi datum sit illi de cælo.* 4. Quis  
enim jactare audeat se, quæcunque volue-  
rit, præstare posse, cum Christus ipse dicat,  
*Nemo potest venire ad me, nisi Pater meus, qui  
misit me, traxerit eum?* [ D. Paulus testatur  
naturalem hominem talem esse, qualem  
Adamus in lapsu suo produxit. ] Quis vo-  
luntatem

luntatem suam ostendet, qui intelligat omnes carnis affectus inimicitias esse adversus DEVM? Quis de intelligentiâ suâ gloriabitur, qui sciat *animalem hominem non esse capacem eorum quae sunt Spiritus DEI*? In summâ, quis vel ullam suam cogitationem in medium proferat, qui intelligat *nos non esse idoneos ex nobis ipsis ad cogitandum quidquam, sed quod idonei sumus, id omne ex DEO esse*? 5. [Cogitare minus est quam facere] Certum ergo & firmum manere oportet, quod Apostolus dixit, DEVM esse qui efficit in nobis & ipsum velle, & ipsum efficere, pro gratuitâ suâ benevolentia. 6. Nulla enim intelligentia, nulla voluntas est menti & voluntati DEI conformis, quam Christus in homine non sit operatus: quod & ipse nos docet, dicens, *Sine me nihil potestis facere*. [Christus etiam & hoc dicit, *Qui peccatum facit, servus est peccati*. Ubi ergo est liberum ejus arbitrium?]

---

Contra hunc Articulum doceri videtur.

1. *Hominem non fuisse creatum cum justitiâ originali, sed ante lapsum etiam habuisse proclivitatem ad peccandum.*

A W E L S I N G I O, Lib. de Offic. hom. Christ. fol. E.3. Secundus

us hujus generis Evangelicæ doctrinæ error sit, quod Adamo ante peccatum *justitiam quandam originalem* tribuunt, quam, videlicet, simul atque est creatus, ex DEI gratiâ habuerit.

A I A C. A R M I N I O, *Artic. perpend. pag. 10.* Citra læsionem DEI, Adami, & ipsius veritatis dici potest, Adamum non accepisse neque habuisse in primævo statu *potentiam* proximam *quidvis intelligendi, credendi, faciendi*, quod illi intellectu, creditu, factu *in quovis statu*, ad quem vel suo facto vel DEI dono pervenire potuit, necessarium esse potuit.

*Ibidem. pag. 18.* Inclinatione ad peccandum antea (ante lapsum) *in homine fuit*, licet non ita vehemens æquè & inordinata, ut nunc est.

A R E M O N S T R A N T I B V S, *Coll. Hag. pag. 250.* Dona spiritualia ab humanâ voluntate, in morte spirituali, propriè non separantur, *quum illa nunquam in ea fuerint.*

II. *Adamum etiam ante lapsum morti corporali fuisse obnoxium: neque verò demùm per peccatum ei obnoxium esse factum.*

A W E L S I N G I O, *De Offic. hom. Christ. pag. E. 2.* Primum ejusmodi errorem facimus, quod sicuti vulgò ab Evangelicis, sic etiam ab eorum præcipuis quibusdam Ministris traditur: Adamum ante peccatum fuisse naturâ immortalem, post peccatum verò mortalem factum.

*Ibidem.* Quod etiam ante peccatum Adamus mortalis, & quidem talis à DEO creatus fuerit, multa apertè docent.

*Ibidem. pag. E. 3.* Si naturalem mortalitatem homini peccatum attulisset, essetque ea propria peccati pœna, certè eam Christus, qui peccatum, hoc est, peccati pœnam sustulit, ipsam naturalem mortalitatem abstulisset: quod tamen non fecit.

III. *Intellectum hominis non esse adeò corruptum, quin*

F homo

*homo possit sine Spiritus S. illuminatione intelligere omnia, quæ in Scripturis ad salutem æternam consequendam scitu, creditu, speratu, & factu necessaria traduntur.*

**A SIM. EPISCOPIO**, *Disp. de perspic. S. Scrip. Thes. 1.* Clara & aperta sensuum omnium, qui universis & singulis ad æternam salutem consequendam scitu, creditu, speratu, factu necessarij sunt, per Scripturam propositio, sine labore examinis, sine auxilio operosæ indaginis, immediata suâ luce & evidentia, à quolibet, *modo usu rationis & judicii possit*, intelligi & percipi potest.

*Ibidem. Thes. 3.* Legentes igitur & audientes, quibus perspicua Scriptura est, non eos tantum statuimus, qui peculiari quadam, & immediata luce interius collustrati sunt, aut qui sibi hujusmodi luce & judicio donati ac præditi soli videntur, sed omnes in universum, quicumque & qualescunque tandem esse possint, summæ, mediæ, infusæ fortis homines, in quibus vel dictamen naturalis rationis & judicii aut omnino obliteratum non est, aut saltem non enormiter vitiatum, vel in quibus supina aut voluntaria quædam negligentia, manifesta inadvertentia, præjudicata sententia, aut dedita malitia locum non habet.

*Disp. priv. de persp. S. Scrip. Thes. 3.* Ad hanc intelligentiam (omnium eorum quæ creditu ad salutem necessaria in S. Scriptura traduntur) consequendam, aliud necessarium non est, quam vis apprehendendi & percipiendi sensum illorum verborum, quæ clarè & significanter proponuntur: quæ vis naturalis est, & omnibus ratione præditis communis, in omni statu.

*Ibidem.* Unde nec aliud ullum supernaturale lumen potentia superinfusum, eamque elevans ad hanc intelligentiam eliciendam necessariò requiritur.

*Disp. privat. 46. Corol. 1.* An ulla actio Spiritus Sancti immediata in voluntatem aut mentem necessaria sit, aut in Scripturis promittatur, ad hoc ut quis credere possit verbo extrinsecus proposito? *Negativam* tuebimur.



IV. *Voluntatem hominis irregeneriti non esse servam peccati, sed liberam ad bonum & ad malum volendum.*

A REMONSTRANTIBVS, Coll.Hag.pag.250. In voluntate non potuit ejusmodi infusio (sanctitatis) locum habere, ut quæ natura sua libera est ad volendum bonum vel malum.

*Ibidem.* In morte spirituali non separantur propriè dona spiritualia ab humanâ voluntate.

*Ibidem.* Libertas benè aut malè agendi mansit in homine tanquam pars naturæ, cum quâ creatus fuit.

A WELSINGIO, De Offic. hom. Christ. sol.B. 3. Dogma illud Evangelicorum de servo arbitrio, quo docetur hominis arbitrium in ijs, quæ ad salutem æternam pertinent, nullam prorsus libertatem habere, ejusmodi est, ut ipsum per se omnem Religionem & pietatem possundare possit.

Ab ADOL. VENATORE, Declar.pag.173. Non possum credere homines omnes ab utero matris, corpore & animâ esse vitiatos, in intellectu planè occæcatos, & voluntate ad malum necessariò proclives : qui verum bonum non possint intelligere, aut nihil aliud facere quam malum.

*Ibidem.* pag.174. Non possum credere hominem habere voluntatem, quæ tantum serva sit peccati.

*Ibidem.* pag. 175. Non possum credere hominem nullas habere vires, quibus servari possit : neque cum impotentia aliquâ natum esse.

V. *Hominem irregeneritum ex se esse idoneum ad bonum spirituale cogitandum, volendum, & faciendum.*

A REMONSTRANTIBVS, Coll.Hag.pag.254. Præcedit itaque aliqua actio hominis ipsius vivificationem, agnitio scilicet mortis suæ, ejus dolor & deploratio, desiderium & votum liberationis, fames & sitis vitæ : quæ omnia, sed & alia plura, à Christo requiruntur in eo, quem vivificaturus & regeneraturus est.

*Ibidem.* pag.251. Non omnes irregeneriti sunt ejusdem or-



dinis, quidam sunt positi extra omnem vocationem: alij jam sunt vocati. Priores in Scripturis propriè vocantur mortui in peccatis: *Posteriores verò isti mortui profectò non sunt.*

A WELSINGIO, *De Offic. hom. Christ. Fol. B. 4.* Nunquam verum esse ostendent Evangelici *humanas vires in vitandis peccatis nullas esse: & propter primi hominis peccatum atque inobedientiam, universum humanum genus, ipsius voluntatis libertate in benè agendo; Deoque obediendo privatum esse.*

A VENATORE, *Declar. pag. 174.* Non possum credere hominem in illam impotentiam incidisse, ut non possit clamare, orare, desiderare, supplicare, quærere, se præparare, aut vocatum sequi: Neque possit bonum aliquod magnum aut parvum facere, quod DEO placeat, ut eo DEVS moveatur ad majorem ei gratiam conferendam.

VI. *Gratiam DEI, quâ in homine DEVS operatur, quum intendit eum convertere, non operari in homine ipsum velle seu voluntatis assensum, neque solam, neque ita efficaciter, ut effectus semper consequatur, sed tantum modò, ut hic assensus semper relinquatur libero hominis arbitrio, atq; ab eodem pendeat: adeò ut DEVS gratiâ hac conversionis in multis operetur cum intentione eos convertendi, qui tamen nunquam convertantur. Ac proinde conversionis nostræ causam efficientem non esse solam hanc DEI gratiam, sed liberum quoque voluntatis humanæ arbitrium DEO cooperari, & conversionis nostræ causam esse partialem.*

A REMONSTRANTIBVS, *Coll. Hag. pag. 230.* Agnoscimus quidem irresistibilem quandam vim Spiritus in intellectu, quum DEVS intellectum illuminans, voluntatem suam patefacit: & in corde, quando is corda nostra pulsat, sed gratia ea, quâ voluntas nostra ad bonum determinatur, & Spiritus Sanctus in nobis actum fidei efficit, totumque

tumque opus obedientiæ, quam à nobis D E V S in Euangelio exigit: hanc gratiam vocamus *resistibilem*, quia illi homo *suâ voluntate* potest resistere, & *eiusactum impedire*.

*Ibidem. pag. 191.* Possumus Spiritui Sancto resistere, quum in homine operatur *cum voluntate & proposito ipsum convertendi*.

*Ibidem. pag. 193.* Possumus D E O resistere, *cum nos vult per gratiam suam convertere. Item.* Hæc D E I voluntas nihil aliud est, quam quod D E V S velit *ut homo seipsum convertat*.

*Ibidem. pag. 235.* Gratia D E I non ubique, neque semper resistantiam omnem seperat in omnibus, *in quibus efficaciter vult operari*.

*Ibidem. pag. 241.* Pugnaret cum natura præceptorum divinatorum, veræque obedientiæ, si D E V S *suum ipsius opus* nobis præciperet, aut opus, *ad quod voluntas nostra nihil confert*, nec conferre potest.

*Ibidem. pag. 247.* Negamus omnibus ijs, *quibus Spiritus Sanctus cor vult aperire*, protinus reipsa aperiri. Nam ubicunque Spiritus pulsât, ibi & aperire vult & intrare: sed non ubicunque pulsât, ibi aperitur cor, nec *quocungq; vult intrare* Spiritus, illuc intrat.

*Ibidem. pag. 269.* Dicimus multos *posse venire ad Christum*, qui tamen reipsa non veniant.

*Ibidem. pag. 196:* Fides & conversio non possunt vocari obedientia, si ab alio aliquo solo efficiantur, ita ut homo in eo se habeat merè *passivè*.

*Ibidem. pag. 243.* Gratia D E I homines quidem prævenit, & efficaciter movet, ita tamen ut *ipsi per D E I virtutem & gratiam cooperari* debeant.

*Ibidem. pag. 246.* Ad cordis apertionem requiritur *hominis cooperatio*. Si enim homini à D E O præcipitur, ut in conversione cor suum aperiat, sequitur hanc apertionem à D E O *sine voluntatis humana cooperatione* non effici.

*Ibidem. pag. 254.* Statuimus itaque *hominem esse DEI cooperatorem* in perficiendâ regeneratione suâ.

*Ibidem. pag. 275.* Negamus fidem appellari donum DEI respectu actualis infusionis in corda nostra: sed ita appellatur respectu potestatis perveniendi ad ipsum.

*Ibidem. pag. 276.* Fides & conversio talia sunt dona, quibus DEVS nos donare non vult, nisi *interveniente voluntate nostrâ.*

*Ibidem. pag. 279.* Fides in Christum & conversio reipsa non efficiuntur in homine, *sine interventu voluntatis humane.*

*Ibidem. pag. 260.* Posset quoque & hoc disputari, An non nobilissima sit actio ea circa hominem, quæ sit *per suasionem*; &, An conveniens sit *alia aliqua* circa hominem uti, servatis humanæ naturæ proprietatibus, ac proinde an non satis vehemens foret operatio, si talis esset, *quali utitur Satan.*

*Ibidem. pag. 261.* Nihil esset ex eo absurdi, si eadem vis adhiberetur utrimque, & æquè potens in se, ita tamen ut Diaboli & aliorum operatio esset *resistibilis*, DEI verò *efficax*, quia secundum DEI infinitam sapientiam, *circa tale tempus, tales homines, in tali constitutione & statu administraretur.*

A I A C. ARMINIO, *Artic. perpend. pag. 24.* Vocatio interna etiam contingit *ijs, qui non assentiuntur* vocationi.

*Ibidem. pag. 25.* Necessariò ponenda est *gratia sufficiens*, quæ effectum non sortitur, culpâ ejus cui contingit: secus iustitia DEI in condemnatione infidelium defendi non potest.

*Ibidem.* Efficacitas gratiæ salutaris non consistit in omnipotente actione DEI, quâ sic agit in mente & in corde hominis, ut cui illa actio imprimatur, *non possit non assentiri* DEO vocanti, seu quod idem est, *gratia non est vis irresistibilis.*

*Ibidem. pag. 26.* Qui vocationi DEI obtemperant, illi liberè assentiuntur gratiæ, ab eâ tamen excitati, impulsî, tracti,

tracti, adjuti: & eo ipso momento, quo assentiuntur, poterant non assentiri.

*Ibidem.* Ubi homo sentit gratiam mentem & cor afficientem, liberè assentitur, ita ut possit non assentiri.

A IO AN. ARNOLDO *Contra Til. pag. 337.* Arminij sententia hæc est, gratiam non ita instruere hominem viribus, quin semper maneat in potestate hominis *ys uti vel non uti.*

*Contra Bogerm. pag. 263. & 274.* Positis omnibus operationibus gratiæ, quibus ad conversionem in nobis efficiendam DEVS utitur, manet tamen ipsa conversio ita in nostrâ potestate libera, ut possimus non converti, id est, nosmetipsos convertere vel non convertere.

A NIC. GREVINCHOVIO, *Contra Ames. pag. 198.* Dicimus gratiam in actuali efficacia liberi actus, seu potius effectum à gratiâ intentum, etiam pendere ab influxu arbitrij ex gratiâ operantis, quia gratia licet principalis sit causa, non tamen est totum principium proximum actionis, sed concaussa ejus, postulans concomitantiam nostræ voluntatis, sic ut ab utroque fluat, eoque & dependeat suo modo inflexus actualis.

*Ibidem.* Imò ut confidentius agam, dico effectum gratiæ ordinariâ lege pendere ab actu aliquo arbitrij, ut præviâ conditione sine quâ non.

*Item.* Ut vocatio efficax pendet ab auditu, ita etiam ab arbitrio (à quo & auditus ipse dependet) tanquam ab eo in cujus potestate est audiendo acquirere vel non acquirere ea, sine quibus ordinariè vocatio ad fidem non est efficax.

*Ibidem. pag. 202.* Negamus concursum arbitrij in Paulo esse effectum necessariò gratiam consequentem *vi solius gratiæ* prædeterminantis, ut causæ adæquatæ conuersionis in ijs omnibus, qui hac gratia donantur.

*Ibidem. pag. 203. & 204.* Nostrâ verò sententiam sic paucis accipe; Totius quidem simul complexi (quare scilicet. hæc gratia in Paulo aut Petro potius sit efficax, quam in alio)



alio) *causam* communem dari non posse aliam, præter libertatem voluntatis.

*Ibidem. pag. 204. Voluntas hominis gratiâ præveniente excitata est partialis causa conversionis.*

*Item.* Positis duobus adultis, fieri potest, ut aequalibus auxilijs gratiâ prævenientis hic convertatur, ille non convertatur

*Ibidem. pag. 205. Voluntas pro suâ libertate cooperatur in ipsâ determinatione sui ipsius, & in effectione gratiæ cooperantis, atque ita est concaussa, vel conditio necessaria, sine cujus concursu activo DEVS non influat in illam. Item.* Gratiâ non determinat nisi arbitrio cooperante quâ ratione & modo quid ni dicamus, efficaciam quoque gratiæ quodammodo ab arbitrio penderè quoad eventum?

*Ibidem. pag. 106. Dicimus eo sensu arbitrium determinare gratiam, quod arbitrium liberè præstet concursum suum gratiæ cooperanti; vel quod arbitrium ita cooperetur, ut possit non cooperari, adeoque non cooperando impedire cooperationem gratiæ.*

*Ibidem. pag. 208. Liquet arbitrium & gratiam simul esse causas partiales, partialitate causæ, seu cauſlandi, sic ut neutra conversionem per se sola efficiat eâ virtute quâ influit in effectum.*

*Ibidem. pag. 210. & 211. Si pater & filius ambo unam eandemque navem trahant, & filius quidem agendi virtute sibi à Patre communicatâ; pater autem non modò ut pater, qui filio agendi virtutem dedit, sed etiam ut suasor, motor, atque impulsor filij; adeoque ut autor filio suo navem hanc unâ cum ipso trahendi; hic agnosces, opinor, duas causas partiales unius effecti simultanei, quarum unaquæque totum effectum suâ virtute producit, etsi non totaliter. Item.* Proprium est causæ partialis, virtute suâ, sive à se, sive ab alio acceptâ & motâ, ad eundem actum concurrere cum aliâ causâ, sine quo concursu actus iste non existeret. Sic igitur gratiam & arbitrium jungimus, ut causas partiales.

*Ibidem. pag. 114. Auxilium efficax ordine causalitatis non antece-*



*antecedit efficientiam voluntatis. Item. Auxilium DEI efficax non est in viâ ad influxum arbitrij.*

*Ibidem. pag. 243. Nego ad conversionem peccatoris concurrere motionem DEI praviâ, quâ voluntas sic determinetur ad consensum, ut non possit dissentire.*

*Ibidem. pag. 253. Ego meipsum discerno; quum enim DEO ac prædeterminationi divinæ resistere possem, non restiti tamen: atque in eo quid ni mihi liceat tanquam de meo gloriari? Quod enim potui, DEI quidem miserentis est, quod autem volui, cum possem nolle, id meæ potestatis.*

*Ibidem. pag. 271. Nobis certum est DEVM multorum conversionem & salutem intendere, in quibus eam non assequitur.*

*Ibidem. pag. 272. Non omnes convertuntur, quos DEVS seriò atque ex animo voluit convertere.*

*Ibidem. pag. 279. Concedo in hoc operandi modo DEVM etiam quodammodo à voluntate hominû pendere quoad actum determinationis liberæ.*

*Ibidem. pag. 294. Negamus ad conversionem hominû, ex parte DEI, præter gratiam præuenientem, excitantem, adjuvantem, &c. opus esse gratiâ determinante.*

*Ibidem. pag. 297. Quid enim obstat, quo minus vel sola gratia moralis istos  $\Psi\chi\chi\delta\varsigma$  spirituales reddat?*

A CONR. VORSTIO, *Parasc. ad Piscat. pag. 4. Quæ DEVS liberè prorsus & contingenter à nobis fieri vult, ea potentius aut efficacius, quam per modum voti & desiderij velle non potest.*

A SIM. EPISCOPIO, *Disp. de Dominio DEI, Thes. 15. Dominium DEI eousque non potest extendi, ut DEVS actum illum, quem lege suâ ab homine postulat, per omnipotentiam & vim irresistibilem in eo ipse efficiat, & tanquam actum obedientiæ premio remuneretur.*

*Ibidem. Jure supremi dominij sui dare quidem vitam æternam potest, cui vult, DEVS, & si velit ad officium faciendum creaturam suam flectere potest infinitis modis, sed tanquam premium dare vitam æternam, & tanquam obe-*

dientibus dare ijs, in quibus *per vim irresistibilem* omnia, quæ Lege præscribuntur, effecta sint, id verò *DEVS* pro jure ac dominio suo *facere non potest*.

*Disput. privat. 46. Thes. 11. An circa ipsum effectum & voluntatem etiam versetur actio Spiritus sancti, immediatè ei aliquid imprimendo, non audemus, nec necesse habemus asserere, aut negare. Certum est mentem hâc ratione illustratam faciliè affectum jam obsequendi studio, imò obsequio aliquantum inclinatum, ulterius impellere, eique aspirare vim & ἐνέργειαν, quâ correptus affectus voluntatem deinde movet ad actiones affectui similes exercendas, ita tamen, ut pro libertate suâ in contrariam semper partem ferri possit.*

*Ibidem. corol. 1. An ulla actio Spiritus Sancti immediata in voluntatem necessaria sit, ut quis credere possit verbo? Negativam tuebimur.*

*Disp. priv. 7. de Prædest. Thes. 11. Iniquissimum est ab eo exigere abedientiam, in quo actus ipse obediendi per potentiam efficitur.*

*Ibidem. thes. 12. Quorsum enim postulatur seriò id, quod potenter inseritur, atque inditur anima ejus, à quo postulatur.*

*Ibidem. Disp. 8. thes. 7. Absurdum est statuere *DEVM* aut efficere per potentiam, aut procurare per sapientiam, ut electi ea faciant, quæ ab ipsis, ut ipsi ea faciant, exigit & postulat,*

*Ibidem. Disput. 9. thes. 3. *DEVS* nemini mortalium sufficientem gratiam, cujus beneficio salutem consequi potest, negare absolutâ voluntate constituit.*

## ARTICVLVS XV.

*De Peccato Originali.*

**C**Redimus Adami inobedientiâ 1. peccatum quod vocant Originis in totum genus humanum diffusum esse. 2. Est autem peccatum Originis corruptio totius naturæ, & vitium hæreditarium; 3. quo & ipsi infantes in matris utero polluti sunt: 4. quodque velut noxia quædam radix, genus omne peccatorum in homine producit: estque tam fœdum atque execrabile coram DEO, ut ad universi generis humani condemnationem sufficiat. 5. Neq; verò per Baptismum penitus aboletur aut radicitus evellitur; quandoquidem ex illo tanquam ex infaustâ ac corruptâ scaturigine perpetui rivuli assiduè exoriuntur atque effluunt: quamvis filijs DEI in condemnationem non cedat aut imputetur, sed ex purâ DEI gratiâ & misericordia illis remittatur: non ut huic remissioni confidentes obdormiant, sed ut sensus hujus corruptionis crebriores gemitus in fidelibus excitet, utque eo ardentius optent, ab hoc cor-

pore mortis liberari. Hinc ergo *Pelagianorum* errorem damnamus, qui hoc peccatum originis nihil aliud esse asserunt, quam imitationem. 6.

---

Contra hunc Articulum doceri videtur.

1. *In Adamo posteros ejus non peccasse, neq. inobedientiam in Paradiso à primis parentibus commissam illis imputari.*

Ab HENR. WELSINGIO, *De Offic. hom. Christ. fol. E. 4.* Homines morti obnoxij sunt, non quidem quia inobedientia ista Adami illis imputetur: quid enim iniquius, nisi illi similiter inobedientes fuerint?

*Ibidem.* Reatum mortis per propagationem ipsam, sine ulla ipsius peccati imputatione, ab Adamo traximus, ut in conditionibus servilibus & vectigalibus evenire solet.

Ab ADOL. VENATORE, *Declar. pag. 172.* Non possum credere; DEVM voluisse Adamum & Evam collocare tanquam stirpem totius generis humani: neque posteros eorum omnes, etiam illos, qui post aliquot seculorum myriades ab ipsis essent nascituri, in æternum reos esse malitius, quod duo isti homines perpetrarunt, ac propter id ipsum obnoxios esse igni infernali, ac si ipsi in Paradiso fuissent & peccatum hoc perpetrassent. *Contr. Pastor. Dordr. pag. 106.* Nos in Adamo non peccasse, ex eo colligi potest; quod nemo in se deprehendat conscientie suæ accusationem, quod ante quinquies mille & quingentos annos in Paradiso hoc Adami peccatum perpetraverit. Ego saltem non deprehendi.

11. *Pronitatem ad peccandum, seu corruptionem humane nature non profluxisse ex Adami inobedentiâ, sed continuatis peccandi actibus attrahi.*



A WELSINGIO, *De Offic. hom. Christ. fol. E. 3.* Tertium errorem ejusdem generis statuimus, quod omninò Evangelici docent, *hominis ad peccandum pronitatem ex illo primi hominis peccato profectam esse.*

*Ibidem.* Pronitas ad peccandum, quæ in hominibus conspicitur, non à primo illo peccato, sive ab uno illo *primi hominis* peccandi actu, statim exorta est, *sed continuatè*, post peccatum illud, alijs peccandi actibus peccandi habitum paulatim homines attraxerunt, seque ipsi corruperunt, & sic corruptionis istius semina per propagationem ad posteros transmiserunt.

A VENATORE, *Declar. pag. 172.* Non possum credere propter hunc necessarium & à D E O decretum *Adami lapsum*, omnes homines ab ipsâ conceptione atq; ab utero matris esse maledictioni obnoxios, corpore & anima vitiatos, in intellectu planè occæcatos, & in voluntate necessariò ad malum proclives, adedò ut verum bonum non possint intelligere, & nihil aliud possint quam malum agere. Item. Atq; hi, si Dñs placet, fructus sunt peccati *Adami*, & peccati originis, quod peccatum produxerit, scilicet, æternam impotentiam ad bonum, & inevitabilem mali operationem.

*Ibidem. pag. 175.* Non possum credere, hominem propterea non habere vires, quibus salvus fieri possit, quoniam *Adamus* semel de vetito fructu ante quinquies aut ferè sexies mille annos comederit.

*Ibidem. pag. 179.* Credo nullos parentes dona sufficientia ad salutem pro liberis aut posteris posse amittere.

III. *Pronitatem hanc ad peccandum non esse vitium, seu peccatum proprie dictum, sed ita metonymice appellari, quia sit causa aut effectus peccati.*

A WELSINGIO, *De Offic. hom. Christ. fol. E. 4.* Errant Evangelici, cum statuunt concupiscentiam esse peccatum, quamvis ei nullo pacto assentiatur homo, sed statim & semper reprimat.



A IAC. ARMINIO, *Artic. perpend. pag. 18.* Perpendendum est, an peccatum originis sit *tantum carentia justitiæ originalis*, & sanctimonix primævæ, cum *inclinatione ad peccandum, quæ & antea in homine fuit.*

*Contra Perkins. pag. 170.* Nullum est peccatum quod simul sit *malum culpæ*, & malum pœnæ, seu pœna peccati, & causa alterius peccati, si rectè & rigidè ista considerentur.

A IOAN. ARNOLDO, *Contra Gomarum, pag. 4. 5.* Arminius sentiebat transgressionem legis & *peccatum actuale propriè peccatum appellari*, atque interim rotundè agnoscebat, peccatum, quod causa aliorum peccatorum est, etiam peccatum appellari, quia peccatum hoc in nos venit *ut pœna peccati.* Neque intelligere poterat quomodo illud, quod nobis ut pœna infligitur, *propriè loquendo* possit peccatum esse.

*Contra Tilenum, pag. 388.* Planè verum est quod Arminius docet loco à te citato, perversè dici peccatum originale reum facere mortis, cum peccatum hoc pœna sit actualis peccati Adami: ex quibus verbis sequitur, quod dicis, scilicet Arminium docere, *peccatum originis non esse propriè dictum peccatum.*

*Ibidem. pag. 389.* Arminius negat peccatum originis esse peccatum propriè dictum.

A VENATORE, *Contra Past. Dordr. pag. 109.* Peccatum originis *propriè non est peccatum*, nec condemnationem meretur.

IV. *Infantes non nasci cum vitiositate hereditariâ, per quam non sint idonei ad bonum, & proclives ad omne malum: sed nasci cum iisdem viribus ad bonum, cum quibus Adamus creatus fuit.*

A WELSINGIO, *De Offic. hom. Christ. fol. B. 4.* Nunquam verum esse ostendent Evangelici, ac ne in speciem quidem id uspiam in S. literis indicatum fuisse, docere poterunt, *humanas vires in vitandis peccatis nullas esse*, & propter

propter primi hominis peccatum atque inobedientiam universum humanum genus ipsius *voluntatis libertate in bene agendo*, De oque obediendo, *privatum esse*.

*Ibidem. fol. E. 4.* Evangelici addiderunt effectum primi peccati esse *amissionem liberi arbitrij*; qui ingens est error.

*Ibidem.* Quidquid aliud Theologi vulgò de originali peccato disputant, præter reatum necessariæ perpetuæque mortis, quem per propagationem ipsam sine ullâ ipsius peccati imputatione, ab Adamo traximus, *id omne*, ut apud ipsos inest incertum omninò ac varium, sic *humanæ ingenij signentum* prorsus censendum est.

A VENATORE, *Theol. mera & vera pag. 2.* Omnes infantes sunt simplices, & *stantes in eodem statu*, in quo Adam fuit ante lapsum, antequam Eva serpenti auscultasset, qui suadebat illis, ut comederent de veritâ arbore scientiæ boni & mali.

*Contra Pastor. Dordr. pag. 172.* Non possum credere propter hunc necessarium & à Deo decretum lapsum Adami omnes homines ab ipsâ conceptione atq; ab utero matris esse maledictioni obnoxios, corpore & animâ vitiatos, in intellectu plane occacatos, in voluntate necessariò ad malum proclives, adeò ut verum bonum non possint intelligere, & nihil aliud possint quam malum operari.

*Ibidem. pag. 175.* Non possum credere hominem propterea non habere vires ad salutem sufficientes, quod Adamus semel de vetito fructu, ante quinquies aut penè sexies mille annos comederit; nec etiam hominem cum tali impotentia natum esse.

V. *Peccatum originis non esse causam sufficientem ad universi generis humani condemnationem.*

A I A C. A R M I N I O, *Respons. ad 9. quæst. pag. 174.* Perversè dicitur peccatum originale reum mortis facere.

*Artic. perpend. pag. 18.* Perpendendum est an peccatum originis homines faciat reos iræ DEI.

*Respons. ad 31. Artic. pag. 168.* Subjeci & hoc disquiri posse, an

se, *an* DEVS propter innatum nobis peccatum originale irasceretur.

Ab ADR. BORRIO, *Resp. Armin. ad 31. Artic. pag. 117.* Necesse est omnes salvos fore, qui actualia peccata nulla ipsi perpetrarunt, quales sunt infantes omnes, *sine discrimine.* Quia DEVS universum genus humanum in reconciliationis gratiam assumpsit, & cum Adamo, omnibusq; ejus posteris in eo fœdus gratiæ inivit: quumque infantes fœdus illud transgressi non sint, non videntur condemnationi obnoxij. Et cum DEVS ipsi Adamo, qui in propriâ personâ peccavit, & voluntate suâ libera, peccatum illud condonaverit, nulla est ratio cur DEVS hoc peccatum infantibus imputare voluerit. Nam sic DEVS videbitur cum infantibus rigidius agere quam cum ipsis Diabolis.

A VENATORE, *Contr. Past. Dordr. pag. 98.* Admodum absurdum mihi videtur statuere, quamvis peccatum Adami ante sex millia annorum perpetratum sit, tamen hoc non obstante, innocentes ipsos infantes nondum tres dies natos, imò in matris utero adhuc existentes, in æternum gravissimæ pænæ infernali obnoxios esse.

*Ibidem. pag. 101.* Non video quomodo conveniat fini creationis, DEI bonitati, justitiæ, & misericordiæ, & veritati verbi ipsius, ut DEVS creaturam propter parentum peccatum, & propter peccatum alienum, nasci vellet obnoxiam tanta miseriæ, ut præstaret, imò longè præstaret nunquam fuisse, nunc non esse, nec unquam futurum, quam ita esse: adeo ut igne infernali propter Adami peccatum solum æternum sit punienda.

*Ibidem. pag. 112.* Innatum peccatum punitur pænâ temporali, sed actuale insuper etiam æternâ. Item. Concessi homines propter peccatum Adami carere donis illis, quod non habeant arborem vitæ, qui in Paradiso erat, & quod ipsi nunc sit moriendum.

*Declarat. pag. 172.* Non possum credere omnes homines ab ipsa conceptione atque ab utero matris obnoxios esse maledictioni.

A IOAN. W TENBOG ARDO, *Defens. decr. pag. 192.* Hanc consequentiam solidè vellem videre refutatam, infantes morientes sine peccatis actualibus (posito hoc, quod verum sit eos in Adamo peccasse) non rigidius à D E O tractari, quàm ipsos diabolos, *si tantum propter peccatum originale in Adamo perpetratum condemnarentur.* Diaboli enim condemnantur propter actualia sua peccata, isti verò minimè.

A IOAN. ARNOLDO, *contra Tilenum, pag. 388.* Planè verum est, quod Arminius docet loco à te citato, perversè dici peccatum originale reum facere mortis.

VI. *Adamum lapsu suo tantum speculum, exemplum, & antecessorem fuisse lapsum reliquorum hominum.*

A V E N A T O R E, *Declarat. pag. 176.* Cum D E V S prævideret lapsum hominis, *cujus Adamus speculum & quasi typus fuit,* aliud fædus erexit.

*Contr. Past. Dordrac. pag. 100.* Adamum fuisse speculum & primum peccatorem, atque inde malam consuetudinem & inclinationem ad peccandum fuisse attractam, concedere possem.

*Ibidem. pag. 110.* Cæterùm an Adamus ideo particeps factus est peccati Evæ, quia ab illâ post peccatum natus fuerit? Minimè. Illa enim post ipsum creata fuit, imò ex ipsius costâ. Ergo erat exemplum. Eodem etiam modo Adam suis liberis, atque illi iterum suis posteris, exemplum & antecessor ad peccandum fuit. Et quoniam ipse primus fuit, hinc fit ut per ipsum natura sit corrupta. *Ibidem.* Quod omnes nos in peccatis concipiamur & nascamur, *non est quod omnes cū peccato originali nascamur,* sed quod illi à quibus nascimur, in plerisque ipsorum operibus, etiam in concipiendo, gignendo, & pariendo, non sint sine peccatis: ut jam non dicamus, *nos postea in ipsorum operibus multa mala, & peccatis inquinata exempla videre,* quæ sint humanæ fragilitatis atque infirmitatis testimonia. Item. Videmus enim quàm efficacia sint exempla parentum in liberis, præceptorum in discipulis, & magistratuum in subditis. Et



Quantum boni potest exemplum bonum, ad mandatorum DEI observationem, tantum mali contra potest exemplum malum ad abstrahendum ab observatione illâ.

---

## ARTICVLVS XVI.

### *De Prædestinatione divinâ.*

**C** Redimus DEVM, postquam tota Adami soboles, sic in perditionem & exitium primi hominis culpâ. præcipitata fuit, seipsum talem demonstrasse ac præstitisse, qualis est revera : nimirum misericordem & justum. Misericordem quidem eos damnatione & interitu liberando & servando, quos in æterno & immutabili consilio suo, 1. promerâ & gratuitâ suâ bonitate, per IESVM CHRISTVM Dominum nostrum elegit, 2. sine ullo [bonorum] operum ipsorum respectu. 3. Justum verò, alios in illo suo lapsu & perditione relinquendo, in quam sese ipsi præcipites dederunt. 4. [Hac ratione declarat se esse misericordem & clementem DEVM ijs quos salvos facit, quibus nihil debebat: uti quoque se declarat justum judicem ostensione justæ severitatis suæ erga reliquos. Atque  
interim



interim illis nullam facit injuriam. Nam quod nonnullos salvos facit, non propterea fit, quod isti alijs sint meliores, cum omnes in exitium certum prolapsi sint, donec DEVS eos discernat, & liberet secundum æternum atque immutabile propositum suum, quod in IESU CHRISTO fundatum est, antequam mundus creatus fuit. Nemo itaque secundum hanc sententiam ad hanc gloriam pervenire per seipsum potest, quoniam à nobis ipsis non sumus idonei ad cogitandum aliquid boni, nisi DEVS per gratiam ac meram bonitatem suam nos præveniat: adeò natura nostra est corrupta.]

---

Contra hunc Articulum doceri videtur.

I. *Consilium DEI de salvando hoc homine non esse certum nec immutabile.*

Ab WELSINGIO, *De Offic. hom. Christ. Fol. B. 2.* Lectorem monemus ex ipsis à nobis allatis testimonijs probari, DEVM velle & curare, ut vivant illi ipsi, qui pereunt, ac proinde posse perire eos, atque adeo evenire ut pereant, quos DEVS vult vivere.

*Ibidem.* Ex quibus constat posse perire eos, quos DEVS salutem destinaverit.

*Ibidem. fol. B. 3.* Nihil mirum videri debet, ex electis aliquando reprobos, & vicissim ex reprobis electos effici.

A IAC. ARMINIO, *Contra Perkins. pag. 195.* DEVS vult serio ut omnes homines salventur, at compulsus pertinaci & incorrigibili malitiâ nonnullorum, vult illos jacturam facere salutis, hoc est, condemnari.

A SIM. EPISCOPIO, *Disp. de vol. DEI, thes. 21.* Ineptum & ridiculum est dicere seriam & veram voluntatem DEI esse nequire, nisi effectum sortiatur.

II. *Per electionis decretum non intelligi propositum DEI, de certis aliquibus hominibus singularibus servandis, sed tantum de certo hominum genere servando, scilicet, fidelium perseverantium.*

A WELSINGIO, *De Offic. hom. Christ. fol. B. 3.* Decretum Electionis communiter loquendo non ad certos ac definitos homines, nominatim hos vel illos, sed ad certum potius hominum genus, sive ad homines generatim quidem acceptos, sed qualitate aliquâ, hoc est, obedientiâ vel inobedientiâ præditos, omninò referri debet.

A IAC. ARMINIO, *Artic. perpend. pag. 21.* Secundum decretum est, quo DEVS statuit resipiscentes & fideles in gratiam recipere, eosque perseverantes salvare in Christo, & per Christum. Illud secundum decretum est prædestinatio ad salutem.

A REMONSTRANTIBVS, *Col. Hag. pag. 34.* Nos aliam prædestinationem ad salutem in Evangelio revelatam non agnoscimus, quam quâ DEVS decrevit, credentes in Filium suum IESVM Christum, & in eâdem fide perseverantes, salvos facere.

*Ibidem. pag. 57.* Perseverantes fideles velle salvos facere, totum est decretum Prædestinationis ad salutem.

A IOAN. ARNOLDO, *contra Tilen. pag. 53.* Decretum Electionis nihil aliud est, quam decretum, quo DEVS statuit, fideles in Christo iustificare & salvare.

A NIC. GREVINCHOVIO, *contra Ames. pag. 111.* Uniformia & conformia mihi sunt Electionis & justificationis decreta.

III. *Causſam electionis ſingularis, ſeu quare DEVS hunc hominem præ illo ab æterno, ſaluti deſtinaverit, non eſſe merum Dei beneplacitum, ſeu meram ipſius & gratuitam bonitatem, ſed fidem ac perſeverantiam hominis, ſeu totam conſummatam fidei obedientiam præviſam. Ac proinde Fidem ac perſeverantiam hominis præviſam Electionem ſingularem præcedere, ut conditionem in eligendis requiſitam, quæ DEVM ad eligendum moveat, non autem fructum eſſe, qui ex electione, tanquam primâ ejusdem cauſâ, promanet.*

A IAC. ARMINIO, *Declar. pag. 47.* Decretum, quo DEVS decrevit, certas quaſdam perſonas ſalvare, inniſtitur præſcientiæ DEI, quâ ab æterno ſcivit, quinam juxta ejusmodi adminiſtrationem mediorum ad converſionem & fidem idoneorum, ex præveniente ipſius gratiâ credituri erant, & ſubſequenti gratiâ perſeveraturi.

A REMONSTRANTIBVS, *Collat. Hag. pag. 35.* Nos rotundè conſitemur fidem in conſideratione divinâ, in eligendo ad ſalutem præcedere : & non ut fructum electionis ſequi.

*Ibidem. pag. 82.* Decretum ejusmodi abſolutum, quo DEVS dicitur in eligendo non reſpexiſſe ad bonas cujuſquam qualitates, quas antè prævidit, non poteſt vel cum naturâ Dei, vel cum Scripturis ipſius conſiſtere.

*Ibidem. pag. 85.* Gratia illa, qua benignus DEVS hominem dignatur, cum verbum ipſi prædicari facit, & eum trahit per Spiritum ſuum ut credat, non manat ex decreto iſto electionis ad ſalutem. Item, Mittit verbum ſuum, quo ipſi viſum fuerit, non ſecundum abſolutum aliquod decretum, ſed propter alias cauſas in homine ipſo latentes.

*Ibidem. pag. 89.* Electio ad ſalutem, inniſtitur præſcientiæ huic, ſecundum quam DEVS novit, quinam in ipſum credituri ſint, quinam non.

*Ibidem. pag. 93. Quæritur an Fides sit fructus ex Electione ad salutem emanans? Fratres affirmant, Nos negamus.*

*Ibidem. pag. 94. Non possumus simpliciter concedere S. Scripturam non ponere aliam causam Electionis, quam DEI propositum & bene placitum.*

*Ibidem. pag. 109. Absurdum est ponere absolutam DEI voluntatem in decreto Electionis pro causa prima, quæ reliquas causas, Christum puta, Fidem, aliasque omnes antecedit.*

A NICOL. GREVINCHOVIO, *contra Ames. pag. 24. Fides est conditio prærequisita in hoc vel illo eligendo. Item. Naturæ legum ac conditionum præscriptarum omninò conveniens est, ut voluntas iudicis à conditione postulata & præstita moveatur ad præmium.*

*Ibidem. pag. 104. Thesis istam ex mente nostra sic informo: Fidem esse necessarium prærequisitum à DEO prævisum in eo, qui ad vitam æternam eligitur.*

*Ibidem. pag. 111. Nego fidem esse medium electioni ad gloriam subordinatum. Ratio negationis in promptu est, quod scriptura fidem perpetuò describit ut conditionem requisitam à DEO, cujus præstationem DEVS velit prius, quam gloriam aut salutem cuiquam præcisè velit aut destinet.*

*Ibidem. pag. 137. Electio peremptoria in objecto prærequirit totam consummatam fidei obedientiam.*

IV. DEVM *neminem relinquere in illâ perditione, in quam sese ipsi præcipites dederunt, sed decrevisse omnes homines salvos facere, atque omnibus hominibus sufficientem gratiam ad salutem dare,*

Ab ADOL. VENATORE, *Declar. pag. 175. Credo DEVM ab æterno decrevisse bonitatem suam declarare, atque eum in finem creaturas producere, ac imprimis hominem ad imaginem suam, ut eum beatitudinis suæ participem, atque omnes homines in æternum salvos faciat.*

A SIM.



A SIM. EPISCOPIO, *Disp. priv. 9. de Repr. thes. 3.* D E V S remini mortalium sufficientem gratiam , cujus beneficio salutem consequi potest, *negare absolutâ voluntate constituit.*

A IOAN. ARNOLDO, *contra Tilen. pag. 379.* D E V S ex voluntate & affectu generali ex æquo omnium hominum salutem desiderat, omnibus Mediatorem dedit, & salutem indiscriminatim ex fide obtinendam ordinat, ideoque omnibus salutem offert, pœnitentiam ac fidem mandat, & ad utramque media administrat.

*Ibidem. pag. 121.* Hæc est Arminij sententia, quæ huc redit, ut neget DEV M præcisâ voluntate aliquos in Adæ lapsu voluisse relinquere, quia scilicet hoc ipsum Scripturis, & constant affectui, quo DEV S omnium salutem & conversionem se desiderare testatur, planissimè adversatur.

## ARTICVLVS XVII.

### *De reparatione generis humani per Filiū DEI.*

CRedimus etiam DEV M nostrum Opt. Maxim. quum cerneret hominem sese ita in mortis & corporeæ & spiritualis damnationem coniecisse, & prorsus miserum atque maledictum effectum esse, mirabili suâ tum sapientiâ, tum bonitate, adductum, ut illum abs se præ timore fugientem & quæret, & benignè consolaretur: promisso illi Filio suo, ex muliere nascituro, qui serpentis caput:



put contereret , & illum beatum redderet.

---

Sunt inter REMONSTRANTES, qui in controversiam aliquando vocarunt, an per semen mulieris, contritum caput serpentis, promissum Gen. 3. 15. sit intelligendus DEUS Filius ex muliere nasciturus.

---

## ARTICVLVS XVIII.

### *De Incarnatione Filij DEI.*

**C**ONfitemur itaque DEVM promissionem Patribus per os sanctorum Prophetarum factam implevisse, quum constituto ab se tempore Filium suum unicum & æternum in hunc mundum misit : *qui formam servi assumpsit, similis hominibus factus, &* veram naturam humanam cum omnibus ipsius infirmitatibus, excepto peccato, verè assumpsit, dum conceptus est in utero beatæ Virginis Mariæ, virtute Spiritus Sancti, absque ullâ maris operâ. Eam porrò naturam humanam non quoad corpus tantum induit, sed etiam quoad animam : fuit enim vera animâ humanâ præditus, ut verus esset homo. Etenim cum anima non minus quam ipsum

ipsum corpus damnationi esset obnoxia, necesse fuit illum & hoc & illam assumere, ut utrumque simul servaret. Idcirco contra Anabaptistarum hæresin, qui negant Christum carnem humanam assumpsisse, confitemur Christum *participem ejusdem carnis & sanguinis fuisse, sicut & pueri: ex lumbis Davidis secundum carnem: factum ex semine Davidis, secundum eandem carnem; fructumque ex utero virginis Mariæ, natum ex muliere: germen Davidis: surculum è radice Jesse: è tribu Juda, atque à Judæis ipsis ortum secundum carnem, & in summâ, verum semen Abrahæ & Davidis, quandoquidem Abrahæ semen assumpsit, & fratribus suis per omnia similis factus est, excepto peccato [genitus ex Mariâ] adeò ut [hac ratione] factus sit reverà noster Emmanuel, id est, DEVS nobiscum. 2.*

---

Contra hunc Articulum doceri videtur.

I. *Non fuisse Filium aliquem DEI æternum, seu substantiam quandam divinam ex ipsâ substantiâ DEI genitam, quæ humanam naturam induerit.*

A WEL SINGIO, De offic. hom. Christ. fol. D. 1. Ex quo sequitur, hominem illum IESVM Nazarenum sine ullâ divine

cujusdam alterius *essentia*, quam ipse habeat, *consideratione*, esse unicum DEI Filium.

*Ibidem. fol. D. 2.* Concludendum est igitur, Filium DEI unigenitum *non esse substantiam* quandam *divinam*, ex ipsâ substantiâ DEI genitam, *quæ humanam naturam induerit*.

Inter REMONSTRANTES sunt qui contendunt, nomen *Emmanuel* Christo attribui, non respectu Personæ, quia constet ex duabus naturis, Divinâ & Humanâ, sed tantum respectu officij, quia DEVM nobis sit reconciliaturus.

## ARTICVLVS XIX.

### *De Vnione Hypostaticâ, seu Personali, duarum Naturarum in Christo.*

CRedimus etiam per hanc conceptionem, Personam Filij conjunctam atque unitam fuisse inseparabiliter cum humanâ naturâ, ita ut non sint duo Filij DEI, nec duæ Personæ, sed duæ Naturæ in unâ eâdemq; personâ unitæ, quarum utraq; proprietates suas retineat, adeò ut sicut Divina natura semper increata & absque initio dierum & sine fine vitæ remansit; cælumq; & terram implens : sic natura Humana proprieta-

proprietas suas non amiserit, sed creatura remanserit, initium dierum & finem vitæ habens, finitæ ac circumscriptæ naturæ existens, atque omnia quæ vero corpori competunt, retinens. Et quamvis illi immortalitatem resurrectione suâ dederit, veritatem tamen humanæ naturæ illi neque ademit, neque commutavit. Salus enim & resurrectio nostra à veritate corporis ipsius dependet. Cæterum duæ istæ naturæ ita sunt simul unitæ & conjunctæ in unam personam, ut ne morte quidem ipsius separari potuerint. Quod igitur Patri suo moriendo commendavit, id verè erat spiritus humanus, à corpore ipsius egrediens: at interim Divina natura semper Humanæ, etiam in sepulcro jacenti, conjuncta remansit: 1. adeò ut Deitas ipsa non minus in ipsò tunc fuerit, quam cum adhuc infans esset, etsi exiguum ad tempus sese non exereret. Quapropter confitemur ipsum esse verum DEVM, & verum hominem: 2. Verum quidem DEVM, ut mortem suâ potentiâ vinceret; & verum hominem, ut in carnis suæ infirmitate pro nobis mortem obiret.

Contra hunc Articulum doceri videtur.

I. *Humana Christi natura cum divinâ naturâ unionem ejusmodi esse, quæ non necessario requirat unitarum naturarum indistantiam, sed quæ tantum consistat in influxu quodam divinæ virtutis in naturam Christi humanam. Ac proinde non esse personalem.*

A CONR. VORSTIO, *Apol. Exeg. pag. 87.* Non ineptè responderi posset unionem duarum in Christo naturarum non in essentiali duarum naturarum indistantiâ, sed in arcano quodam & ineffabili Deitatis τῆς λόγῃ in humanitatem influxu, hoc est, singulari quadam illius in hanc operatione, si-ve gratiosâ hujus ad illam assumptione, aut peculiari appropriatione, revera consistere.

*Ibidem. pag. 88.* Non immeritò aliquis collegerit etiam divinam τῆς λόγῃ hypostasim per arcanum aliquem influxum assumptæ humanitati communicari potuisse, & hanc perpetuò per illius intimam virtutem adhuc sustentari: etiam si fortè localis aliqua inter utramque substantiam conjunctio non intercedat.

*Ibidem. pag. 89.* Sive igitur ad illum arcanum personalitatis τῆς λόγῃ influxum aut illapsum, si-ve ad aliam aliquam singularem Deitatis operationem, per quam humana Christi natura in hypostasi τῆς λόγῃ subsistat, hoc est, ad hypostasim τῆς λόγῃ quasi intime attracta sit, & perpetuò in eâ conservetur ac sustentetur; si-ve ad extraordinariam quandam DEI dispensationem, quâ DEVS olim singulariter in Christo homine habitaverit, animo respiciamus; semper æterna Christi divinitas abundè probari poterit.

II. *Personam Christi non constare ex duabus Naturis, Divinâ & Humanâ, sed tantum ex unâ, scilicet, humanâ.*



A W E L S I N G I O , *De Offic. hom. Christ. Fol. D. 2.* Ex quo etiam liquidò apparet, *humanam naturam in Christo esse ipsius Filij DEI personam*, cum necesse sit, si Filius DEI sit mortuus, ejus personam esse mortuam, & ita *merum somnium* id esse, quod à Papistis acceptum, Evangelici affirmant, Filij DEI personam esse *revera divinam naturam in Christo*, quâ humana sustentetur, quæ ipsa per se in Christo nequaquam sit persona.

---

## ARTICVLVS XX.

*De modo Redemptionis, per declarationem Iustitiæ & Misericordiæ DEI in CHRISTO.*

C R E D I M U S D E V M, qui summè & perfectissimè est tum misericors tum justus,  
 I. Filium suum misisse, ut naturam illam assumeret, quæ per inobedientiam peccarat, ut in ea ipsa natura satisfaceret, atque ut DEVS de peccato per acerbissimam mortem ac passionem Filij sui justas pœnas sumeret. D E V S igitur justitiam suam in proprio Filio, in quem peccata nostra conjecerat, ostendit, & exeruit: Bonitatem verò & Misericordiam suam in nos nocentes & condemnatione dignos, benignè effudit & exeruit, dum Filium suum

suum pro nobis, ex perfectissimo suo erga nos amore, morti tradidit, & eum rursus propter justificationem nostram è mortuis excitavit, ut immortalitatem & vitam æternam per illum consequeremur.

---

Contra hunc Articulum doceri videtur.

I. *Iustitiam DEI non necessario postulare punctionem peccatorum, sed DEVM posse, illasâ iustitiâ suâ, absque ullâ satisfactione, peccata prorsus impunita dimittere: ac proinde non esse summè & perfectissimè iustum.*

A CONR. VORSTIO, *Disp. de Deo, pag. 396.* Non dicitur quòd iustitia hæc DEI judicialis condignam pœnam ob quodvis etiam minimum delictum præcisè ac necessariò exigat.

*Ibidem. pag. 397.* Si absolutâ potestate suâ DEVS uti vellet, peccata, si non omnia, saltem plurima sine irrogatione condigna pœna peccantibus condonare posset.

*Ibidem. pag. 399.* Falsum est quod nullum omninò peccatum per iustitiam DEI possit impunitum dimitti.

*Ibidem. pag. 331.* DEO non minus licitum est de jure suo remittere, quam jus suum retinere, aut persequi. Item. Iustum omninò est apud DEVM tam non punire, quam punire, pro ut ipsi visum fuerit.

*Parasc. ad Piscat. pag. 24.* Thesis hæc consistere non potest, quâ dicitur, non posse DEVM salvâ iustitiâ suâ ullum vel minimum peccatum impunitum dimittere.

*Ibidem. pag. 25.* Naturalis iustitia in DEO revera non est: sive extra hypothesin decreti, nulla uspiam in DEO esse apparet.

*Tractat. de Satisfact. pag. 36.* Quæritur an in DEO sit essentialis

ialis aliqua iustitia, quæ omnino peccata puniri dicitur? ac proinde plenam pro ijs satisfactionem (siquidem ab ijs liberandi sumus) exigit? Respondeo *nullam esse in D E O ejusmodi iustitiam.*

*Epist. ad N. 10. Mart. 1595.* Sic igitur credo: Dominum D E V M pro supremâ suâ autoritate posse, si velit, omnia peccata hominibus condonare, *nulla pro ijs accepta solutione:* hoc est, statuo *nullam esse iustitiam D E I* essentialem, quæ omnino & simpliciter exigit punitionem ob peccata, hoc est, *plenam omnium pœnarum solutionem non esse absolute necessariam,* quasi pendentem à necessitate divinæ naturæ.

*Epist. ad N. & N. 15. Mart. 1598.* D E V S potest peccata condonare, *nulla solutione accepta.*

A S I M. E P I S C O P I O, *Disput. de Dom. D E I, thes. 13.* Quod D E V S ad omnia & singula *peccata puniendum per iustitiam suam* adigatur, id verò nullò modo credere possumus.

A G E R. V O S S I O, *contra Ravensb. pag. 86.* Parentes certè & reges minimè se obstrictos putant, ut *pro omnibus delictis satisfactionem* accipiant, Scio quanto perfectior sit D E I *iustitia,* quam hominum: attamen mens humana impressas habet notitias, *divinæ naturæ imagines.*

*Ibidem.* Si punire, scilicet peccata, *esset naturale,* scilicet D E O (illâ nimirum actione, quæ secum fert necessitatem) non possit actio talis de personâ peccatoris in personam alteram transire.

A S L A T I O, *Epist. ad N. 1608. Mart. 9. & Jun. 30.* Nulla in D E O proprietas est, quæ istam *satisfactionem necessariò postulat.* Iustitia namque naturalis D E I proprietas non est, uti neque misericordia.

## ARTICVLVS XXI.

*De Satisfactione Christi pro  
peccatis nostris.*

**C**Redimus IESVM CHRISTVM summum illum Sacerdotem esse, in æternum cum jurejurando constitutum, secundum ordinem Melchisedeci, qui se nostro nomine coram Patre ad placandam ipsius iram cum plenâ satisfactione obtulit, i. sistens seipsum super altare crucis, & sanguinem suum pretiosum ad purgationem peccatorum nostrorum profudit, sicuti id Prophetæ futurum prædixerant. Scriptum enim est *castigationem pacis nostræ super Filium DEI positam, & livore ejus nos sanatos esse. Item, ipsum tanquam ovem ad mactationem ductum, atq; inter peccatores & iniquos deputatum*, condemnatumq; à Pontio Pilato tanquam maleficum, etsi illum prius innocentē pronuntiasset. *Quæ igitur non rapuerat, persolvit, & justus pro injustis passus est*, idque tum in animâ suâ, tum in corpore: adeo ut sentiens horribilem illam pœnam, quam nos peccatis nostris commem-  
riti

riti eramus, 2. aquam & sanguinem sudaverit: & tandem etiam exclamaverit, *DEVS meus, DEVS meus, cur deseruisti me?* Ea verò omnia pro remissione peccatorum nostrorum pertulit. Quamobrem merito cum divo Paulo dicimus, *nos nihil quidquam scire, nisi IESVM CHRISTVM, eumque crucifixum*: quin etiam omnia pro stercorebus ducimus propter excellentiam cognitionis Domini nostri IESV CHRISTI, ut qui in ejus vulneribus omnis generis consolationem capiamus. Itaq; nihil necesse est ut alias ullas rationes vel optemus, vel ipsi excogitemus, quibus DEO reconciliari possimus, præter hanc solam & semel peractam oblationem, quâ consecrati sunt & perfecti in perpetuum fideles omnes, qui sanctificantur. Atque hæc est causa cur ipse ab Angelo I E S V S vocatus sit, id est, *Servator, quod servaturus esset populum suum à peccatis ipsius.*

---

Contra hunc Articulum doceri videtur.

I. *Christum passione suâ pro peccatis nostris non satisfecisse justitiæ divinæ.*

A WELSINGIO, De Offic. hom. Christ. pag. B. 7. Christi sanguine satisfactum justitiæ divinæ fuisse pro peccatis nostris, nec id usquam extat, & apertè pugnat cum liberali & justâ peccatorum remissione, quam DEVS nobis per IESVM Christum obtulit.



A V O R S T I O , *Epist. ad N. 10. Mart. 1595.* Credo Dominum DEVM liberè decrevisse peccata non condonare , sed severiter ulcisci in omnibus peccatoribus: atque ita solutionem ab ipsismet exigere : contrà verò pœnitentibus & se ad ipsum convertentibus omnia peccata condonare , non acceptâ pro ijs plenâ solutione. Credo I E S V M Christum idcirco potissimum in mundum venisse, ut nobis peccatoribus hanc liberalitatem non modò annuntiaret, & multis modis confirmaret, sed etiam reipsa communicaret: videlicet, quatenus nos à peccatis avertit, & ad DEVM per seipsum convertit. Credo I E S V M Christum ut illius gratia nos participes efficere posset, oportuisse DEO usque ad mortem obedire, & multa acerba perpeti: quæ omnia rationem meriti habent, & ad nostram salutem sunt ordinata. Unde non immeritò Satisfactionis titulo insigniuntur: quia idipsum efficiunt, quod propriè dicta solutio efficere solet: videlicet liberationem nostri ab omni obligatione seu reatu pœnarum. Aliam Christi Satisfactionem ex sacris literis extrui posse non credo.

*Tract. de Satisf. confess. pag. 13.* Si perfectâ solutio fuisset absolute necessaria, non posset DEVS jure à nobis exigere conditiones pœnitentiæ, fidei, &c. ad obtinendam peccatorum remissionem.

*Ibidem.* Fieri non potest, ut ejusmodi absoluta totius debiti nostri solutio consistat cum liberali illâ & munificâ peccatorum condonatione, quam S. literæ passim DEO tribuunt, etiam cum de Christo ejusque λύτρω pro nobis impenso agunt.

*Catal. error. Sibr. err. 66. p. 38.* Idipsum remitti vere non potest, quod plena solutione jam deletum est, & vice versâ, quod verè condonatum est, pro eo plena solutio justè exigi non potest.

*Ibidem.* Plena solutio & vera remissio in eodem debito aut delicto perfecte concurrere non possunt.

A S L A T I O , *Epist. ad N. Mart. 9. & Jun. 30. 1608.* Quæstio octava est: Num Christus propriè pro nobis satisfecerit? Resp. Id insitiamur. 1. Quia nulla in DEO proprietas est, quæ istam satisfacti-

satisfactionem necessariò postulat. Justitia namque naturalis DEI proprietas non est, uti neque misericordia. 2. Quia pugnant, peccatorum debita cuiquam *remittere*, & tamen plenariam *satisfactionem* eorum nomine accipere. 3. Quia fœderi, quo DEVS gratiosam peccatorum remissionem promisit, nec non modo reconciliationis ad-  
versatur. Legitur namque DEVM in Christo mundum sibi reconciliasse. Qui? *Plena satisfactione*? minimè: sed peccata ipsis non imputando. 4. Quia satisfactio ejusmodi in factis literis non legitur. 5. Accedit quod Christus DEVM conciliasse non legitur, ut mundo iratum, sed quod mundum DEO reconciliaverit. 6. Adde quod neque conditionem fidei ab ullo postulare, neque ob peccata quemquam punire posset DEVS.

II. *Christum non esse perpeffum eandem illam pœnam, quam nos peccatis nostris eramus commeriti: ac proinde obedientiâ suâ non plenè satisfecisse justitiæ divinæ pro nobis secundum Legis rigorem, sed secundum peculiare aliquod pactum à Patre cum ipso initum: Patrem verò hanc Filij obedientiam loco perfectæ satisfactionis per acceptilationem gratiosè æstimare.*

A VORSTIO, *Epist. ad N. 10. Mart. 1595. conf. p. 6.* Non possum, si maximè velim, mihi persuadere, IESVM Christum omnes pœnas nobis ob peccatum debitas (inter quas excellit mors æterna, quam ille minimè sensit) in suâ personâ verè sensisse, & hac ratione totum debitum nostrum dissolvissè.

*Ibidem.* DEVS non potest ullam à nobis conditionem, puta fidei, pœnitentiæ, charitatis erga fratres &c. exigere ad obtinendum remissionem peccatorum, *si id totum à Christo recepit, quod nos ei debebamus.*

*Tract. de Satisf. confess. pag. 14.* Si DEVS id totum à Christo accepit, quod nos ipsi debebamus, ita ut nihil amplius exigendum restet, certè nihil de jure suo remisit, nihil sibi

debitum condonavit; quod tamen in omni verâ condonatione fieri necesse est.

*Orat. Apol. pag. 47.* DEVS etiam in ipsâ IESV Christi satisfactione ἐμείξετο quandam, seu *rigoris moderationem* exercuit, hoc est, aliquid de stricto jure suo concessit, nec præcisè totum id, quod nos ob peccatum meriti eramus, à sponfore nostro IESV Christo exegit.

*Catal. err. Sibr. pag. 61.* Dico Christum satisfecisse per acceptilationem quandam, non per rigidam identitatem.

*Ibidem. pag. 31.* Acceptilatio autem illa quam ego hic agnosco, in eo posita est, quod DEVS obedientiam Christi tanquam æquipollentem loco plenissimæ satisfactionis acceptarit: nec interim præcisè id omne à Christo exegit, quod juxta rigorem justitiæ à nobis peccatoribus exigere poterat.

*Parasc. ad Pisc. pag. 25.* Non nego peccata credentium, immò aliquatenus omnium hominum, in Christo sponfore verè punita fuisse: sed ita ut multiplex ἐμείξετο, seu rigidi iuris remissio hic admixta fuerit.

Ab ARMINIO, *Artic. perpend. pag. 33.* Perpendendum est, An justitiæ DEI non potuerit satisfieri, nisi *Legi satisfaceret*. Item. An idem sit iustitiæ DEI in Christo satisfactum esse, & *Legi per Christum* esse satisfactum. Item. An actus obedientiæ à Christo præstitæ, quâ justificamur, non fuerint ipsi impositi secundum peculiare mandatum Patris, & peculiare pactum à Patre cum ipso initum, quo illos actus obedientiæ præscripsit & stipulatus est, additâ promissione, fore ut æternam redemptionem ijs acquireret, & semen videret. quod istâ obedientiâ per scientiam sui, id est, fidem in se justificaret.

*Ibidem. pag. 34.* Perpendendum est, an Electus in Christo pœnam luerit, & obedientiam præstiterit re ipsa, an verò *æstimatio divina* tantum. Et, an æstimatio divina quâ luisse & præstitisse æstimatur, sit actus præcedens justificationem.

## ARTICVLVS XXII.

*De Fide Iustificante, & de Iustificatione Fidei.*

**C**Redimus Spiritum Sanctum per veram magni hujus mysterij cognitionem in cordibus nostris veram Fidem accendere, quæ IESVM Christum cum omnibus suis meritis amplectitur 1. eumq; sibi proprium vindicat, 2. nihilque deinceps extra illum quærît. Necesse enim est, aut omnia quæ ad salutem nostram requiruntur in Christo non esse: aut si sint in eo omnia, eum qui fide IESVM Christum possidet, simul etiam perfectam habere salutem. Itaque horrenda est omninò in DEVM blasphemia, asserere Christum minimè sufficere, sed alijs quoque rebus opus esse. Inde enim sequeretur, Christum ex parte tantùm esse Servatorem. Meritò igitur jureque dicimus cum D. Paulo, *Nos sola fide justificari, seu Fide, absque operibus Legis.* Caterùm nequaquam intelligimus



mus esse fidem ipsam, propriè loquendo, 3. quæ nos justificet, [seu propter fidem nos justificari,] nam illa tantum est velut instrumentum, 4. quo Christum justitiam nostram apprehendimus. Christus igitur ipse nobis imputans omnia sua merita, & tam multa sanctissima opera, quæ pro nobis præstitit, est justitia nostra: 5. Fides vero est instrumentum, quo illi in communionem omnium bonorum ipsius copulamur, atque in eadem retinemur. Adeò ut illa omnia postquam nostra facta sunt, nobis plus quam sufficiant ad nostri à peccatis absolutiorem.

---

Contra hunc Articulum doceri videtur.

i. *Ad Fidem justificantem non necessario requiri cognitionem IESU Christi: sed posse homines sine eius cognitione servari, seu justificari.*

A WELSINGIO, De Offic. hom. Christ. fol. F. 3. Sextus error est, quo existimant Evangelici, eos qui sub V. T. coram DEO justì sunt habiti, propterea tales habitos fuisse, & salutis æternæ nobiscum idcirco fore participes, quod sicut nos in Christum jam exhibitum, sic illi in eundem, quem exhibitum iri sperabant, omninò crediderint. Huic errori universa Scriptura repugnat, quippe quæ fidei in Christum nullam prorsus mentionem, nisi pro eo tempore, quo exhibitus fuit, usquam faciat,

*Ibidem.*



*Ibidem.* Causa hujus erroris est quod creditum fuerit, nullam salutarem & justificantem fidem unquam fuisse, nisi fidem in Christum.

*Ibidem.* Vide autem de fide in DEVM, quæ hominem illâ præditum ipsi DEO gratum facit, & ante Christi adventum, sine ullius in ipsum Christum fidei consideratione idipsum verè præstabat, caput XI. ad Hebræos.

Ab ARMINIO, *Resp. ad 31. Art. pag. 87.* Consideretur descriptio fidei Abrahami ab Apostolo, Rom. 4. prolixè facta, & apparebit in illâ IESV Christi mentionem non expressè fieri, sed illa implicatione, quam explicare non cuivis facile sit.

*Ibidem. pag. 113.* Conferatur quod dicitur Rom. 4. penè per totum caput de fide Abrahami, & ejus fidei objecto, & monstretur ex eo, quod Abraham in promissis istis, quæ fide apprehendit, Christum viderit.

A PETRO BERTIO, *Discept. Epist. pag. 73.* Apostolus ad Hebræos toto capite undecimo, hoc unum ex professò docet, Fide apprehendente res à sensibus humanis remotas Patres olim justitiæ testimonium repurasse, hoc est, justificatos esse. Et pag. 76. Nam de Christo quidem locis ex Epistolâ ad Hebræos allatis disertè nihil.

A VENATORE, *Declarat. pag. 183.* Propter multas rationes salus alligari non potest historicæ de IESV morte & passione fidei. Item. Nam si requiratur externa historicæ cognitio, & sine fide de IESV passione & morte quis DEO gratus esse nequeat: quid fiet miseris Iudæis, quibus eâ de re in omnibus Mosis libris ne ullum quidem verbum disertè manifestatum est?

*Ibidem. pag. 184.* Nunquam legi pium illum Iobum, pœnitescentes Ninevitas, & pium illum centurionem Cornelium ullam litteralem cognitionem seu fidem historicam habuisse de passione IESV, ejusque causa, & tamen DEO grati fuerunt.

*Ibidem.* Multi Ethnicus habuerunt etiam inter ipsos illustria testimonia interni, spiritualis, & veri cultus divini.

*Ibidem. pag. 185.* Nemo potest pervenire ad possessionem gloriæ

gloriæ æternæ sine misericordiâ, de quâ miseri *Ethnici* aliquam habuerunt coruscationem, atque in necessitatibus suis, vel in extremo vitæ agone, *ad gratiam Dei se converterunt*, exclamantes: O Ens entium miserere mei.

*Contra Past. Dordr. pag. 131.* Nego unicam viam ad salutem esse intelligere vitam, passionem, mortem, resurrectionem, ascensionem in cœlos & reliqua omnia, quæ de IESU in novo Testamento descripta invenimus.

Ab EPISCOPIO, *Disput. de Discr. V. & N. T. thes. 21.* Patres crediderunt firmiter promissis divinis, quæ typos & umbras rerum cælestium continebant, quæque Christum, ejusque beneficia, *iuxta intentionem divinam* repræsentabant & præfigurabant: *quâ ratione* in Christum IESUM respexisse fidem illorum statuimus. An verò fides hæc in omnibus & singulis (Prophetas enim & alios nonnullos excipi volumus) conjunctam sibi habuerit *notitiam* & scientiam claram atque apertam *typorum atque umbrarum*, quod videlicet typi atque umbræ essent rerum earum, quæ nobis nunc apparent, & in Christo postmodum evenerunt, disquiri permittimus.

II. *Ad Fidem justificantem non requiri certam fiduciam, quâ fidelis sibi applicat merita Christi, ac certò persuadet peccata sibi propter merita ac satisfactionem Christi esse remissa.*

Ab ARMINIO, *Artic. perpend. pag. 27.* Fides justificans non est quâ quis credit sibi propter Christum esse remissa peccata.

A VORSTIO, *De Satisf. in Confess. pag. 14.* Sequitur eos fallere & falli, qui solam illam specialem, ut vocant, *persuasionem de Satisfactione Christi pro se nominatim præstitâ* Fidem justificantem esse putant.

*Ibidem. pag. 32.* Hæc definitio fidei, quæ statuit eam nihil aliud esse, quam credere peccata nostra esse deleta per ea quæ Christus est passus, *est falsa*, cum talis fides *in Scripturâ sit in-*

*fit inaudita. Item. Certum est Christum id nunquam docuisse, nequidquam ijs, qui hanc fidem haberent, promississe.*

*Catal. error. Sibr. pag. 62. Sacræ literæ docent Fidem idem esse, quod Observatio Christianismi. Item. Credere idem esse, quod observare Christi præcepta.*

Ab EPISCOPIO, *Disp. priv. 15. thes. 5.* Fiducia specialis misericordiæ, quâ credo mihi remissa esse peccata gratis, non est essentialis fidei constituens, sed consequens tantum.

A WELSGIO, *De Offic. hom. Christ. fol. B. 6. 7.* Explicandus autem apertius hîc est ingens Evangelicorum error in definiendo, *quenam sit Fides in Christum, qua justificamur.* Statuerunt meritò contra Pontificiorum sententiam, Fidem istam esse *fiduciam*, atqui interim quæ & qualis sit ista fiducia non animadverterunt. Statuerunt enim hanc fiduciam esse sibi firmiter hoc ipsum persuadere & sic confidere, *quod per Christi mortem deleta fuerint peccata nostra*, quodque DEVS propter ipsum Christum nos acceptos & gratos habeat.

*Ibidem.* Non igitur hæc est illa fides in Christum, seu per Christum in DEVM, quâ justificamur; sed ea quæ verè ac propriè est *fiducia*, nempe Christo, seu DEO per Christum, planè confidere, hoc est, *sub spe ea consequendi*, quæ à DEO per Christum ijs sunt promissa, qui ipsius Christi præcepta ita servaverint, ut meritò obedientes dici possint, *ipsi DEO & Christo obedire*, & sic, ut uno verbo dicam, non secundum carnem, sed secundum spiritum ambulare.

A REMONSTRANTIBVS, *Resp. ad Epist. VVal. pag. 88.* Fides justificans non est, quâ quis credit sibi remissa esse peccata.

III. *Fidem propriè loquendo, seu tò Credere, nos justificare: seu esse justitiam nostram, quâ coram DEO consistimus & justificamur.*

Ab ARMINIO, *Epist. ad Hipp. pag. (. .) 2.* Dico ipsum fidei actum,

actum, id est, tò Credere, imputari in justitiam: idque proprio sensu, non metonymicè.

*Ibidem.* Fides gratiosè pro justitiâ habetur, per gratiosam dignationem DEI.

*Ibidem.* Fides est objectum imputationis divinæ.

*Declar. pag. 65.* Quæstio movetur de verbis Apostoli Pauli ad Romanos cap. 4. hisce videlicet, *Fides imputatur ad justitiam*, utrum nempe ea debeant propriè intelligi, sicut ipsa fides, tanquam actus juxta mandatum Evangelij præstitus, imputetur coram DEO in, sive ad justitiam, idque ex gratiâ, cum non sit ipsamet *justitia Legis*: an verò sic intelligi debeant, ut justitia Christi per fidem apprehensa nobis in justitiam imputetur, id est, figuratè atq; impropriè. Ego priorem sententiam secutus sum in thesibus de Justificatione sub me disputatis.

*Ibidem. pag. 66.* Statuo benè & propriè dici fidem homini credenti in justitiam ex gratiâ imputari.

A VORSTIO, *Catal. error. Sibr. pag. 41.* Fides nobis ad justitiam imputatur formaliter.

*Ibidem. pag. 46.* Nos asserimus fidem imputativè pro justitiâ haberi, seu justitiæ loco nobis duci. Item. Loco perfectæ justitiæ fides nostra nobis imputatur, & à DEO ducitur.

*Confess. pag. 35.* Cum fides nobis dicitur imputari ad justitiam, nihil aliud significatur, quam quod fides loco nostræ justitiæ ducitur nobis.

A BERTIO, *Epist. ad Sibr. pag. 81.* Cum Scriptum fidei tribuat, ut reputetur ad justitiam, ut salvet, ut ex eâ vivamus, sequitur fidem propriè accipiendam esse, pro habitu, sive obedientia illa, quæ præstatur Evangelio, eaque nos propriè, sed tamen gratis justificari à DEO, & servari.

*Ibidem. pag. 85.* Justificare est universalis affectio fidei.

*Ibidem. pag. 48.* Fides substituta est in locum plenæ observationis Legis, ideoque eam per gratuitam ratishabitionem DEI, nullo nostro merito, censerì pro universâ justitiâ Legis.

A IOAN. ARNOLDO. *Contra Gomar. pag. 35.* Fides in Justificatione



catione consideratur tanquam *Lex, postulatam, & conditio*, quam debemus præstare, ut propositum præmium justitiæ consequamur.

*Ibidem.* Arminius dicit DEVM in nostri Justificatione ita spectare fidem, *ut æstimet eam pro obedientia & pro opere* secundum Evangelicam postulationem & Legem præstito. *Item.* Arminius intelligit DEVM fidem nobis *imputare pro obedientia.*

*Ibidem. pag. 41.* Arminius dicit fidem justificare *ut actum*, qui opus illud DEI est, Ioan. 6. atque ipsum *τὸ credere in Christum* nobis in justitiam imputari.

A REMONSTRANTIBVS, *Respons. ad Epist. VVal. pag. 86.* DEVS qui in fœdere Legali exactam mandatorum suorum obedientiam exigebat, nunc in fœdere Evangelico fidem exigit, & illam *gratiosa æstimatione* propter meritum & omnibus numeris exquisitissimam Christi obedientiam *habere loco legalis obedientia.*

IV. *Fidem in negotio justificationis non debere considerari ut instrumentum apprehendens Christi justitiam.*

Ab ARMINIO, *Resp. ad 31. Art. pag. 159.* Fides non qua instrumentum, sed quâ actio imputatur in justitiam.

A IOAN. ARNOLDO, *Contra Gomar. pag. 41.* Arminius dicit ipsum credere in Christum nobis in justitiam imputari, *non ut instrumentum.* *Item.* Arminio displicuit, quod fides dicatur esse *instrumentalis causa* nostræ justificationis.

A SIM. EPISCOPIO, *Disput. priv. de justif. thes. 5. 6.* Fides itaque in negotio justificationis consideranda est, *non tanquam instrumentum* apprehendens justitiam hanc quæ imputatur, sed tanquam apprehendens Christum IESVM, per quem justitia illa impetrata est, *Instrumentum* tamen propriè dici non potest, sed conditio fœdere Evangelico præscripta & requisita.



V. *Iustitiam Domini nostri IESV CHRISTI non esse iustitiam illam, quæ in nostri justificatione nobis à DEO imputetur in iustitiam nostram, quâ coram DEO consistimus, seu justificamur: sed esse tantum causam meritariam, quâ impetratum sit ut iustitia aliqua nobis ipsis inherens in iustitiam nostram à DEO per gratiosam æstimationem imputetur.*

A W E L S I N G I O, *De Offic. hom. Christ. fol. B. 4. 6. Sententia Evangelicorum de Justificatione ejusmodi est, ut mirum videri possit, si quis eam amplexus, vitam tamen homine Christiano dignam interea ducat. Nam invaluit apud eos opinio imputata credentibus justitiæ Christi, quâ scilicet fiat, ut etiam si Christi fideles, & sic justificati coram DEO homines, propriâ sanctitate vitæ non sint præditi, non tamen istâ carere dici possint, quippe quibus DEVS Christi sanctitatem & innocentiam imputer.*

*Ibidem.* Apostolus Rom. 4. affirmat quidem nobis imputari iustitiam, seu credentes in DEVM pro justis haberi: sed quod Christi iustitia nobis imputetur, hoc est, ejus sanctitas & innocentia nostra esse censeatur, de eo nihil prorsus loquitur, vel loqui cuiquam meritò videri potest.

Ab ARMINIO, *Epist. ad Hippol. (. .) 2. Christus & obedientia ejus causa justificationis impetratoria seu meritaria est, at non objectum justificationis seu imputationis divinæ, quasi DEVS Christum ejusque iustitiam nobis imputet in iustitiam, quod fieri nequit.*

*Declar. pag. 66.* Dico me credere peccatores solâ Christi obedientiâ justos constitui: & quod iustitia Christi sola meritaria causa sit, propter quam DEVS credentibus peccatum condonet: & statuo benè & propriè dici fidem homini credenti in iustitiam ex gratiâ imputari. Hanc sententiam Arminij BERTIVS testatur, *Epist. ad Sibr. pag. 119.* meritum Christi excludere.

A V O R S T I O, *Catal.err. Sibr. pag. 41.* Nusquam discretè scriptum est, obedientiam Christi nobis ad justitiam, imputari, aut saltem esse justitiam illam, per quam nos justificamur, puta formaliter, & non effectivè.

*Ibidem. pag. 46.* Obedientia & satisfactio Christi non propriè & formaliter, sed effectivè seu metonymicè justitia imputata dicitur.

*Ibidem. pag. 50.* Christi obedientia consideratur in justificatione nostri ut causa efficiens & meritoria, & obedientia nostra ut conditio sine qua non. Item. Apostolus per justitiam suam non simpliciter eam intelligit, quam revera in seipso haberet, licet à Deo gratis in Christo donatam: sed quam ipse per opera legis sibi ex seipso comparasset.

*Ibidem. pag. 54.* Obedientia Christi non imputatur nobis pro justitia formali, sive ad hoc ut per eam formaliter justifimus. Effectivè tamen imputari nobis & potest & solet.

*Ibidem. pag. 61.* Vera assertio est Fidem justificantem esse illam inherenter justitiam, quam Papistæ urgent, si de fide formatâ sermo sit. Talis enim fides iuxta stylum Scripturæ non malè inherens justitiæ vocari potest: quippe habitus spiritualis ex fide, spe, charitate compositus, quem justitiæ titulo fraudare velle, desipere est.

*Ibidem.* Christi satisfactio nobis non formaliter, sed effectivè imputatur.

A B E R T I O, *Epist. ad Sibr. pag. 69. 70.* Dices ineptum videri nos habitu, sive qualitate nobis inherente justificari & servari. Quid? ineptumne etiam videbitur, si id dicat D E V S?

*Ibidem. pag. 74.* Si ergo fides est qualitas nobis inhærens: hi verò omnes quos commemorat Apostolus, fidè justificati sunt, consequens est eisdem qualitate sibi inherente justificatos esse.

*Item. pag. 75.* Neque enim quemquam ita infantem esse puto, ut post tot, tamque validas *deus deus* dicturus sit, fidem hic correlative (ut loquuntur) significare Christum ipsum & justitiam Christi.

A SIM. EPISCOPIO, *Disput. privat. de iustific. thes. 4.* Non itaque *iustitia propriè Christi*, nedum activa aut passiva, est iustitia illa quæ imputari dicitur, sed id quod Christus utrâque promeruit, & nos per solum Christum IESVM consequimur: *non enim iustitia Christi propriè id est quod imputatur*, sed id propter quod imputatur nobis credentibus in ipsum iustitia.

---

## ARTICVLVS XXIII.

### *De Iustitia nostra qua coram DEO consistimus.*

**C**Redimus beatitudinem nostram sitam esse in peccatorum nostrorû remissione, quæ sit propter IESVM Christum: atque in eâ contineri iustitiam nostram coram DEO: uti nos D. Paulus docet ex Davide, quum pronuntiat *Beatum eum hominem, cui DEVS imputat iustitiam absque operibus.* idem Apostolus ait, *Nos gratis iustificari per redemptionem factam in Christo IESV.* Ac propterea hoc fundamentum [in æternum] firmum retinemus, & DEO gloriam omnem tribuimus, de nobis ipsis quam humiliter sentientes, ut qui probè noverimus qui, qualesque

lesque simus revera. Ideoque de nobis ullifve nostris meritis nihil quidquam præsumimus, sed soli I E S V Christi crucifixi obedientiæ innixi, in eâ prorsus acquiescimus, quæ nostra fit quando in eum credimus 1. Hæc porrò una abūdè sufficit, tum ad omnes nostras iniquitates obtegendas, tum etiam ad nos tutos securosque reddendos adversus omnes tentationes. Illa enim procul à conscientiâ abigit omnem metum, omnem horrorem, omnem denique formidinem, quò propius ad D E V M accedamus, nec primi illius nostri parentis exemplum imitemur, qui præ metu fugiens, ficulneis sese folijs obtegere & occultare conatus est. Et sanè si nobis ipsis, aut ulli alteri creaturæ vel tantillum nitentes coram D E O nos sistere oporteret, certum est nos statim absorptum iri. Idcirco cum Davide nobis singulis potius est exclamandum, *Domine ne intres in iudicium cum servo tuo, quia non justificabitur in conspectu tuo ullus vivens.*

---

## Contra hunc Articulum doceri videtur.

1. *Iustitiam nostram, quâ coram D E O consistimus, non esse iustitiam Christi, quæ extra nos est, sed esse iustitiam nobis ipsis inhaerentem.*

Ab ARMINIO, *Epist. ad Hipp. (..)* 2. Fieri non potest, ut D E V S Christum ejusque iustitiam nobis imputet in iustitiam.

*Ibidem.* Christus cum obedientiâ suâ non est obiectum imputationis divinae.

Ab EPISCOPIO, *Disput. privat. de Iustif. thes. 4.* Iustitia Christi non est proprie id quod imputatur, sed id propter quod imputatur nobis credentibus in ipsum Iustitia.

A BERTIO, *Epist. ad Sibr. pag. 69. 70.* Non est ineptum dicere, cum DEVS ipse id dicat, nos habitu seu qualitate nobis inhaerente justificari.

*Ibidem. pag. 74.* Si fides est qualitas nobis inhaerens: hi verò omnes, quos commemorat Apostolus, fide justificati sunt, consequens est eosdem qualitate sibi inhaerente justificatos esse.

A V O R S T I O, *Catal. err. Sibr. pag. 50.* Apostolus Phil. 3. 9. per iustitiam suam non simpliciter intelligit eam, quam revera in seipso haberet, licet à D E O gratis in Christo donatam: sed quam ipse per opera Legis sibi ex seipso comparasset.

*Ibidem. pag. 61.* Fides quæ per charitatem operatur, non malè inherens iustitia vocari potest; quippe habitus spiritualis ex fide, spe, charitate compositus, quem iustitiæ titulo fraudare velle, desipere est.

*In Anti-Bell. pag. 613.* Cavendum ne quemquam statuamus justificari absque verâ & vivâ fide, quæ fides rectè intelletta est iustitia illa inherens, quam Adversarij semper hic urgent.



## ARTICVLVS XXIV.

*De Sanctificatione, & de bonis  
operibus.*

**C** Redimus veram hanc fidem per auditum verbi D E I & Spiritus Sancti operationem in nobis productam, nos regenerare ac veluti novos homines efficere, ut quos ad novam vitam vivendam excitet, & à peccati servitute liberos reddat. Tantum abest igitur ut fides hæc justificans à rectâ sanctâque vivendi ratione avocet aut tepidiores efficiat I. ut contrà absque illâ nemo unquam quidquam boni ex amore D E I agere atque operari possit, sed tantum ex amore suiipsius & ex metu condemnationis. Fieri itaque non potest, ut hæc fides sancta in homine sit otiosa. Neque enim loquimur de fide inani, sed de eâ tantum, quæ in Scripturâ dicitur *per charitatem operari*, quæque impellit hominem, ut in illis scilicet operibus exerceat, quæ D E V S ipse in verbo suo præcepit. Hæc verò opera à sincerâ fi-

M                      dei

dei hujus radice emanantia , ideò demum bona & DEO grata sunt , quia per illius gratiam sanctificantur : ad nos autem justificandos nullius prorsus sunt momenti 2. Fide enim in IESVM Christum justificamur, & quidem priusquàm bona ulla opera ediderimus 3. Neque enim magis ante fidem opera nostra bona esse possunt, quam fructus arboris esse possunt boni , priusquam arbor ipsa bona fuerit. Facimus igitur bona quidem opera, sed non ut aliquid ijs promeremur. Quid enim promereri nos possimus? Quinimò DEO magis magisque ad bona opera, si quæ facimus, sumus obstricti, non DEVS nobis. DEVS enim is est, qui efficit in nobis, ut & velimus, & ut efficiamus, pro gratuita sua benevolentia. Unde ad illud nobis semper est respiciendum quod scriptum est : *Quum feceritis omnia, quæ præcepta sunt vobis, dicite, servi inutiles sumus, nam quod debuimus facere, hoc fecimus.* Interea non negamus DEVM bona opera in suis remunerari : sed id merâ suâ gratiâ fieri dicimus, ut qui dona sua in nobis coronet, 4. Cæterum quamvis bona opera faciamus, nequaquam  
tamen

tamen ullam salutis nostræ spem in illis collocamus. Nulla enim opera edere possumus, quæ non sint carnis nostræ vitio polluta, ac proinde supplicio pœnisque digna. 5, Quod si etiam aliquod ejusmodi opus proferre quiremus, sola tamen peccati recordatio sufficeret, ad illud è conspectu DEI removen- dum. Itaque semper in dubio essemus, hinc inde fluctuantes, absq; ulla certitudine, & miseræ nostræ conscientiæ semper vexarentur, nisi unico merito mortis & passionis Servatoris nostri niterentur, & in illo acquiesce- rent.

---

Contra hunc Articulum doceri videtur.

*I. Doctrinam, quâ docetur, homines justificari solâ fide, seu solâ justitiâ Christi fide apprehensâ, nobisque gratis imputatâ, reddere homines tepidos ac securos, & à sancti- tatis studio avocare.*

A WELSGIO, *De Offic. hom. Christ. fol. B. 4.* Sententia Evangelicorum ejusmodi est, ut mirum videri possit, si quis eam amplexus vitam tamen homine Christiano dignam interea ducat.

*Ibidem, fol. B. 7.* Cum docetur bona opera ad nos justificandos nihil pertinere, sed tantum esse fructus fidei, quâ homo coram DEO justificatur; quid inveniri potuit aptius ad hominem in uno pluribusve peccatis manentem, in

*eo statu perpetuè conservandum, eumq; planè deterrendum à studio sese à peccatorum laqueis extricandi.*

*Ibidem. fol. 8. DEO & Christo obedire, & non secundum carnem, sed secundum spiritum vivere, ista Evangelicorum fides certè nec in seipsâ, ut deberet, continet, nec etiam vel efficit, vel efficere potest.*

A VORSTIO, *Catal. err. Sibr. pag. 33.* Si certi sumus postquam justificatio semel est impetrata, qualitatem pœnitentiæ certò secururam, persuasio hæc nil nisi profanam carnis securitatem parere potest.

A BERTIO, *Epist. ad Sibr. pag. 99.* Cum extra hominem omnia ponimus in Christo, periculum imminet Ecclesijs nostris à profanitate & securitate.

II. *Opera à sincerâ fidei radice emanantia non excludi à justificatione, sed tantum opera Legis, quæ ex viribus nostris proficiuntur, & quibus perfectâ & continua totius Legis observatio præstatur. Ac proinde nos justificari coram DEO operibus nostris, quæ secundum Evangelium ex fide præstamus.*

A VORSTIO, *Catal. err. Sibr. pag. 49.* Scopus Apostoli, omniâque ipsius argumenta, quæ pro gratuita hominis credentis justificatione illic (Rom. 4.) adducit, satis ostendunt, eum semper hic loqui de operibus Legis; nec istorum nomine quidquam aliud intelligere, quam perfectam & continuam totius Legis observationem.

*Ibidem.* Opposita illa gratiæ & operum, quæ Rom. 4. & II. Ephes. 2. Tit. 3. & alibi extat, non simpliciter & universaliter, nec de quibusvis operibus, etiam fidei & fidelium proprijs, sed limitate de operibus Legis, quæque meritoria esse putantur, accipienda sunt.

*Ibidem. pag. 50.* Apostolus Phil. 3. 9. per justitiam suam non simpliciter eam intelligit, quam revera in seipso haberet, licet à Deo gratis in Christo donatam: sed quam ipse per opera Legis sibi ex seipso comparasset: prout vel

ex solâ antithesi *Legis & fidei* satis ibidem apparet. Lex enim urget *obedientiam ex viribus nostris præstandam*; at fides gratiam Christi hic prædicat.

*Schol. pag. 233.* Nos nostra obedientia, propriè sumpta, coram DEO justificamur, ut conditione prius à nobis implendâ, quam ipsam justitiam, hoc est, veniam peccatorum reipsa obtinere atque impetrare possimus.

*Catal. err. Sibr. pag. 31.* Fateor obedientiam nostram, quæ ex Lege est, à causis justificationis excludendam esse, neque nos ullo modo justitiam & salutem obedientiâ nostrâ promereri; sed hoc nihil ad obedientiam fidei pertinere dico, & Apostoli verba Phil. 3. 9. huc quidquam facere nego.

*Ibidem. pag. 61.* Homo justificatur per præcedentem pœnitentiam, sive per opera à Christo mandata, si sub pœnitentiæ nomine conditio tantum præcedanea: item si per opera metonymicè fides operans accipiat.

*Ibidem. pag. 54.* Operibus justificari, & fide per charitatem operante justificari, opposita interdum sunt, cum videlicet opera Legis, seu meritoria coram DEO, hic intelliguntur, Alioquin falsa est assertio.

*Ibidem.* DEVS ipse non modo possibile, sed & necessarium esse dixit, ut impius per pœnitentiam justificetur.

*Confess. pag. 30.* Via perveniendi ad vitam æternam est observatio mandatorum DEI, si non quatenus per Mōsem, saltem quatenus per Christum explicata sunt.

*Ibidem. pag. 33.* Justificamur per Christum, quatenus DEVS nobis per illum dat respicientiam, vel quod idem est, per eum nos avertit à peccatis nostris. Atque huc pertinent omnia Scripturæ loca, quæ docent sanguine Christi nostra peccata expiari, vel Christum esse pro nostris peccatis expiationem.

*Ibidem. pag. 14.* Nos dicimur expiare peccata nostra, cum ab ijs averti veniam eorum ex DEI liberalitate obtinemus.

*Catal. err. Sibr. pag. 92.* Fides (quâ justificamur) idem est quod observatio Christianismi.

*Plen. resp. fol. B. 1.* Hominem fide justificari, esse idem quod



*observatione Christianismi justificare, si tantum Synecdoche hic notetur.*

A P. BERTIO, *Epist. ad Sibr. pag. 49. & 51.* Opus, si accurato examine rem pensites, duplex est, Legis & Evangelij: Opere Legis nemo salvatur, ut ante positum est, quia nemo *Legem præstat*. Opere verò Evangelico, quod dicitur *obedientia fidei*, obedientia Evangelij, quemquam salvari quis negabit, nisi qui statuit neminem credere?

*Ibidem. pag. 52.* Certè si fides credentis reputatur ei *in justitiam*: fides autem est opus credentis, necesse est *opus credentis reputari*: quidquid contra afferri possit.

*Ibidem. pag. 54.* Eadem est ratio hujus conclusiunculæ: Fides servat. Fides est opus. Ergo *opus servat*. Sed quod opus? *opus Evangelij*, & ut Christus loquitur, opus DEI. Item. Itaque beatus Paulus quotiescunque de operibus in causâ justificationis agit, *non excludit opus fidei* (est enim in eo ut illud astruat) *sed duntaxat opus Legis*.

A REMONSTR. *præfat. Armin. in cap. 7. ad Rom.* Tenendum hic ex Scripturis veram conversionem *præstationemq; bonorum operum esse conditionem prærequisitam ante justificationem*.

III. *Bona opera nostra præcedere nostri justificationem, non autem eam sequi.*

A VORSTIO, *Catal. error. Sibr. pag. 53.* Pœnitentia requiritur à justificandis, tanquam *conditio prævia*.

*Ibidem. pag. 54.* Regula illa, quam Augustinus fortè primus tradidit, qua dicitur, *Bona opera non præcedunt justificandum, sed sequuntur iustificatum*, humanitus tradita est, nusquam autem in S. literis expressa, neque admittenda est, nisi cum nomine justificationis intelligitur conversio à peccatis ad justitiam.

A REMONSTR. *præfat. Armin. in 7. cap. ad Rom.* Præstatio bonorum operum est conditio *prærequisita ante iustificationem*.

IV. *Vitam æternam à DEO nobis dari tantum ut mercedem operibus nostris debitam.*

A RE-

A REMONSTR. *Lejd. Monstr, doct. past. Amstel. fol. E. 2.* Sacra Scriptura proponit nobis vitam æternam tantum ut mercedem nostræ obedientiæ, ut præmium certantium, & coronam iustitiæ.

Ab iisdem contra concion. *Festi Hommij pag. 28. 29.* Qui negat fidelibus licere facere bona opera ex intuitu mercedis operibus nostris debita; ille naturam fidei, omnis Religionis, legislationis divinæ, vitæ, & mortis æternæ, pervertit & negat, Sanctorum imò & Domini nostri IESU CHRISTI obedientiam proscindit, & hominibus persuadet, non esse licitum ut permoveantur ad obedientiam rationibus atque argumentis iisdem, quibus DEVS in verbo suo utitur, atque etiam ipsissimum ponit fundamentum Davidianorum & Libertinorum, qui vitam æternam negant.

V. *Regenitos posse præstare bona opera, quæ ita sint perfecta, ut nullo carnis nostræ vitio sint inquinata, neque ullis pænis digna.*

Ab ARMINIO, *Artic. perpend. pag. 36.* Perpendendum est an de bonis operibus fidelium verè dicatur immunda esse instar panni menstruati, eisque competat dictum illud Esai. 64. *Omnes iustitiæ nostræ &c.*

A REMONSTR. *Præfat. ad Arm. tract. in 7. cap. ad Rom.* Locus Esaiæ, quo fatetur inter cætera iustitias suas ut pannum menstruatum esse, perniciosâ torsione corrumpitur: allegatur enim perpetuò, ac si sensus illius inferret excellentissima quæque præstantissimorum Christianorum opera esse, ut pannum menstruatum, hoc est scæda coram facie DEI.

A VENATORE, *Declar. pag. 183.* Optima etiam Ethnicorum opera non possunt aliter quam dilectioni DEI & proximi conformia censeri.

## ARTICVLVS XXV.

*De abrogatione Legis Ceremonialis:  
& de Conuenientiâ V. & N.  
Testamenti.*

**C**Redimus omnes Ceremonias & figuras Legis, omnes denique umbras cessasse, adventu Christi, adeò ut earum quoque usus inter Christianos jam tolli atque aboleri debeat. Interim tamen manet nobis illarum veritas & substantia in Christo, in quo omnes impletæ fuerunt. Legis verò & Prophetarum testimonijs adhuc utimur, ut nos ipsos in Evangelij doctrinâ confirmemus: 1. & omnem vitam nostram honestè ad DEI gloriam juxta ipsius voluntatem, componamus 2.

---

Contra hunc Articulum doceri videtur.

1. In V. T. nullas extare Evangelicas promissiones de vitâ aternâ: ac proinde doctrinam Evangelij non posse confirmari testimonijs Prophetarum.

A WELSINGIO, De Offic. hom. Christ. fol. E. 6. Septimus error Evangelicorum est, quod credant vitam æternam non

non demùm ac primùm in N. T. sed *antea quoque in V. fuisse promissam, & ex ipso Dei promisso à fidelibus ejus temporis expectatam. Quo vix quidquam potest inveniri divinis testimoniis, & oraculis magis contrarium.* In illis siquidem, quemadmodum vitæ æternæ, à D E O hominibus ipsique populo suo promissæ, pro eo tempore quod Christi adventum præcessit, nulla prorsus fit aperta mentio, sic aperitissimè commemoratur atque inculcatur, vitam æternam demùm per I E S U M Christū promissam fuisse, & per ejus Evangelium hominibus patefactam, cum ea prius apud D E U M lateret: ac denique novum fœdus in melioribus promissionibus quam vetus fuisse sancitum.

A VORSTIO, *De autor. S. Script. pag. 58.* Promisit Moses omnibus, Legem divinam quam ipse dedit, conservantibus, multa felicia in hac vita esse eventura. *Ibidem. pag. 59.* Nullo modo hac in parte Moses cum I E S U Christo conferendus est.

Ab ARMINIO, *Disput. de Leg. & Evang. comp. thes. 6.* Discrimen inter Legem quatenus per Mosē data est, & Vetus Testamentum appellatur, & Evangelium, quā Novi Testamenti nomine venit, tertium est in materiā mandatorum & promissionum. Promissiones enim in V. T. plaræque corporales fuerunt & terrenam hæreditatem veteri homini convenientem, spondentes: Evangelium verò continet promissionem hæreditatis cœlestis, novo homini congruentis.

Ab EPISCOPIO, *Disput. de Conven. & Discr. V. & N. Test. thes. 5.* Secunda differentia V. & N. Test. in speciali materia promissionum consistit. Legis enim promissiones beatitudinem cœlestem præfigurantes, temporales & de terrenâ felicitate fuerūt. Evangelium vero, melioris spei introductio vocatur. Hebr. 7. 19. & 8. 6. promissa continere dicitur maxima & pretiosa 2. Pet. 1. 4. plenariam nimirum peccatorum remissionem, Spiritus S. copiosam donationem, vitamq; æternam aliquando in cœlo degendam.

*Ibidem. thes. 20.* Pactum Vetus & Novum differunt secundo, in speciali promissorum & præceptorum materiā. Pro-



missiones enim pacti cum Abrahamo initi cœlestem hæreditatem adumbrabant, quemadmodum cap. 17. Gen. & Epist. ad Gal. cap. 3. vers. 17. percurrenti perspicuum esse potest. Ibi enim promissiones Abrahamo factæ tribus hisce capitibus comprehendi posse videntur: ut primum sit de possidenda terra sælicissima Canaan, vers. 8. Secundum de consequendo semine præter & supra naturæ ordinem & censum. Vers. 16. 17. & c. Tertium de seminis benedictione in numero & sælicitate. vers. 7. & Gen. 22. 17.

*Ibidem. thes. 21.* Fideles V. T. crediderunt bona animalis huius vitæ ex promisso ad se pertinere.

*Disput. privat. 19. de sæd. cum populo V. T. inito. thes. 12.* Promissiones a. pleræque V. T. carnales & terrenæ fuerunt. *Ibidem. Disput. 45. De promissis N. sæderis. thes. 2.* Promissa novi fœderis duum generum sunt: alia pertinent ad vitam supernaturalem tantum, alia ad naturalem hanc sive animaleam etiam. Primi generis duo sunt, *justitia*, sive justificationis à peccatis, cui conjuncta necessario est præmij remuneratio, sive vitæ æternæ donatio. Alterum Spiritus Sancti.

*Disput. privat. 13. de sæd. vet. thes. 5.* Promissa verò omnia V. T. sunt carnalia & temporalia ad præsentem hanc vitam solummodò pertinentia.

*Ibidem. Disput. 14. de novo sæd. thes. 8.* Promissa novi fœderis duo sunt, *Vita æterna*, quæ remissionem peccatorum & resurrectionem ex mortuis sibi præcedanea habet, & Spiritus Sancti.

II. *In novo Testamento à Christo alia perfectiora, ac præstantiora præcepta moralia esse præscripta, quam quæ tradita sunt in Lege morali à Mose & à Prophetis, ac proinde nos hodie in N. Test. non posse vitam nostram instituere secundum voluntatem DEI, si eam instituamus secundum testimonia seu præcepta moralia Legis & Prophetarum.*



A WELSINGIO, *De Offic. hom. Christ. fol. D. 4.* Alius Evangelicorum error est, quod non differant precepta moralia N.T. à preceptis T.V. similiter moralibus, hoc est, ad mores pertinentibus. *Ibidem.* Ex hoc ipso errore est natus alius error quo credunt in V.T. vel iussa vel vetita fuisse, quæ tamen non fuerunt. Idcirco ita credunt, quia utrumque Testamentum eadem plane, quod ad mores attinet, præcipere ac prohibere statuunt. Et Propterea verba illa Christi, *Matth. 5.* toties repetita, *Audivistis quod dictum est antiquis, &c. Ego autem dico vobis, &c.* ita interpretantur, ac si Christus Scribarum ac Phariseorum perversas Legis Mosaicæ interpretationes reprehenderet, atque corrigeret; non autem Legi Mosaicæ quidquam adderet, eamque ad præstantiorem exactioremque formam adduceret.

*Ibidem.* Per antiquos, non recte seniores illi intelliguntur, quorum traditiones alibi à Domino rejiciuntur, sed illi potius intelligendi sunt, quibus initio Lex Moysi in deserto tradita fuit: ac proinde non dictum est ab antiquis, sed (ut Græca dictio simpliciter sonat) dictum est antiquis, videlicet in ipsâ Lege Moysi, omninò interpretandum est.

A VORSTIO, *Confess. pag. 29.* Queritur, quid significet illud ἐπὶ τῶν δεσποτῶν? Resp. Dictum est antiquis videlicet in Lege Moysi, non dictum est ab antiquis videlicet Rabbinis: Nam Christus hoc loco sua precepta etiam ipsi Legi, non autem Phariseorum tantum commentis opponit.

*Ibidem.* In V.T. licita erant divortia, etiam extra casum adulterij: In N.T. autem prohibita sunt, quippe in quo major sanctimonie ac charitatis perfectio requiritur.

*Ibidem.* In V. Testam. licitum erat facile jurare in votis & promissionibus, vindictam adversus proximum expetere, extraneos & hostes populi odisse, &c. in Novo Test. ista non licent.

Ab ARMINIO, *Disput. de Legis & Evang. comp. thes. 6.* Tertia differentia Legis & Evangelij consistit in materiâ mandatorum. Mandata enim Legis pleraque carnalia fuerunt. Evangelium vero est spirituale, mandata continens spiritualia.

A SIM. EPISCOPIO, *Disp. de conven. & discr. V. & N. T. thes. 20.*  
 Secunda pacti veteris & novi differentia consistit in speciali praeceptorum materiâ.

---

## ARTICVLVS XXVI.

### *De intercessione* CHRISTI.

**C**Redimus nos nullum ad DEVM accessum habere, nisi tantum per unicum Mediatorem atque advocatum IESVM CHRISTVM justum, qui hanc ob causam homo factus est, & cum divinâ naturâ personaliter unitus, ut nos homines per ipsum ad divinam Majestatem accessum haberemus: alioquin nobis hic aditus erat præclusus, [haud secus uti spinæ ad ignem accedere non possunt. Nos sola ipsius voce absorpti fuissetus, sicuti in Adamo apparet, qui tremebundus à Domino profugiebat: atque in Israëlitis ad montem Sinai, qui mediatorem postulabant, ex metu ne propter vocem Domini morerentur.] Hic Mediator, quem Pater inter ipsum & nos ordinavit, non debet nos propter majestatem suam deterrere, ut alium mediatorem, prout nobis visum fuerit,

rit,

rit, quæramus: nemo enim est ex omnibus creaturis in cœlo aut in terris, quæ nos impensius amet, quam IESVS CHRISTUS, qui *tametsi esset in forma DEI, seipsum tamen exinanivit, forma servi accepta, similis factus hominibus, ac fratribus suis per omnia.* [Ipse qui dives erat, nostra causa pauper factus est.] At verò si alius nobis Mediator esset quærendus, qui benè erga nos esset affectus, quem invenire possemus, qui nos magis diligat, quam qui vitam suam pro nobis posuit, etiam tunc quum essemus ipsius inimici? Sin autem nobis quærendus aliquis est, qui potentiâ atque autoritate valeat, quis est qui tanta polleat, quanta is qui *ad dextram DEI Patris sui consedit*, atque *omnem auctoritatem habet in cœlo & in terra*? Quis est qui facilius exaudietur, quam proprius & unicè dilectus filius? Sola itaque diffidentia hanc consuetudinem invexit, quod Sancti ignominia afficiantur, dum illos honorare volunt, ejusmodi illis exhibentes honorem, quem illi ipsi nunquam desiderarunt, sed semper constantissimè, prout officium etiam eorum exigebat, respuerunt, uti ex scriptis eorum patet. Neque hic profe-

rendum illud est, quod nos non simus digni: hic enim non quæritur de precibus nostris propter dignitatem nostram DEO offerendis, sed tantum propter excellentiam & dignitatem IESV Christi, cuius iustitia est nostra per fidem. Quapropter Apostolus hunc stultum metum, seu potius diffidentiam nobis eximere volens, meritò nobis dicit, *IESVM Christum fratribus suis per omnia similem esse factum, ut misericors esset & fidelis Pontifex in ijs quæ apud DEVM agenda forent, ad expiandum peccata populi. Nam ex eo quod perpeßus fuit, cum tentatus est, potest & ijs, qui tentantur, succurrere.* Et paulò post, ut in nobis tanto maiorem [ad ipsum accedendi] fiduciam accendat, addit: *Habentes igitur Pontificem magnum, qui penetravit cælos, IESVM Filium DEI, teneamus hanc professionem: non enim habemus Pontificem, qui non possit affici sensu infirmitatum nostrarum, sed tentatum in omnibus similiter absque peccato. Accedamus igitur cum fiducia ad thronum gratiæ, ut consequamur misericordiam, & gratiam inveniamus ad opportunum auxilium.* [Commutat hic tremendum gloriæ thronum in thronum gratiæ, ut nos faciat ad ipsum



ipsum accedere.] Idem Apostolus docet, nos habere libertatem ingrediendi sacrarium per sanguinem IESU. Accedamus itaque, ait, cum certa persuasione fidei, &c. Item, Christus habet perpetuum sacerdotium: Unde & servare prorsus potest eos qui per ipsum accedunt ad DEUM, semper vivens ut interpellet pro ijs. Quid amplius desiderari poterit, cum Christus ipse palam testetur, Ego sum via, veritas, & vita: Nemo potest ad Patrem venire, nisi per me? Quem in finem quæremus alium advocatum, [cum per ipsum solum accessum habeamus ad Patrem?] Cumq; DEO placuerit nobis Filium suum dare, ut esset advocatus noster, ne illum relinquamus, ut nobis alium sumamus, vel potius ut alium quæramus, & nūquam inveniamus. Quum enim DEVS eum nobis donaret, probè sciebat nos esse peccatores. Quare præceptum Christi sequentes, Patrem cœlestem invocamus per Christum unicum Mediatorem nostrum, quemadmodum ipse nos docuit in Oratione Dominica, certò persuasi, quidquid Patrem petierimus in ipsius nomine, nos esse id ipsum impetraturos.

---



## ARTICVLVS XXVII.

*De Ecclesiâ Catholicâ.*

**C**Redimus & confitemur unicam Ecclesiam Catholicam, seu Vniversalẽ, quæ est sancta congregatio seu cœtus omnium fidelium Christianorum, qui totam suam salutem ab uno IESV CHRISTO expectant, abluti ipsius sanguine, & per Spiritum ejus sanctificati atque obsignati. 1. Hæc porrò Ecclesia ab initio mundi fuit, & usque ad finem ejus est perduratura: quemadmodũ hoc velex eo apparet, quod Christus Rex æternus est, qui nunquam sine subditis esse potest. 2. Cæterũ hanc Sanctam Ecclesiam DEVS contra omnem mundi furorem & impetum tuetur: quamvis ad aliquod tempus parva admodum, & quasi extincta in conspectu hominum appareat: quemadmodum tempore illo periculosissimo Achabi, DEVS sibi septem millia virorum reservasse dicitur, qui non flexerant genua coram Baal. Denique hæc Ecclesia sancta nullo est aut certo loco sita & circumscripta, aut ullis certis personis

sonis astricta aut alligata: sed per omnem orbem terrarum sparsa atque diffusa est, quamvis animo ac voluntate in uno eodemque spiritu, virtute fidei, tota sit simul conjuncta atque unita.

---

Contra hunc Articulum doceri videtur.

1. *Ad Ecclesiam Catholicam etiam pertinere multos, qui nullam cognitionem de Christo habent, & qui proinde salutem suam ab uno I E S U Christo non expectant.*

**A V E N A T O R E**, *Declar. pag. 168.* Credo Ecclesiam esse cœtum evocatum ad audiendum ea quæ divina & spiritualia sunt, & quæ ad salutem pertinent: seu esse societatem, & multitudinem, evocatam & congregatam ad intelligendam & exercendam unam aliquam religionem.

*Ibidem. pag. 183.* Salus non alligatur cognitioni historiae de Christi passione & morte.

*Ibidem. pag. 184.* Multi probi *Ethnici* illustria habuerunt testimonia internæ & spiritualis veri cultus divini.

*Contra Pass. Dord. pag. 130.* Nego absolute & sine exceptione esse necessarium, ut omnes illi qui salutis per Christum participes futuri sunt, intelligere debeant, quæcunque de ipso Evangelistæ & Apostoli prædicarunt & scripserunt.

*Ibidem. pag. 134.* Cur igitur me oporteret tam esse severum, ut miseros *Ethnicos*, quibus hæ manifestationes & tam claræ doctrinæ, quas Apostoli habuerunt, ne in minimò quidem factæ sunt, & quibus ne verbum quidem de Christo manifestatum est, & tamen vitam piam duxerunt, (hoc enim est quod simul intelligi semper volo) condemnarem, & crederem **DEVM** cum ipsidem secundum rigorem acturum, atq; ipsis

ita immisericordem futurum. Cur sentire deberem, DEVM esse ab aliquo plus postulaturum, quam quod ipsi dedit? Cui parum datum est, an ab ipso plus quam illud parum exigetur? Nequeo concipere quænam ibi foret justitiæ proportio.

*Ibidem. pag. 135.* Posse homines sine plenâ fide historiæ de Christo servari, *etiam postquam fides Christiana ei revelata est*, intelligi facile potest, si examen instituamus quantam cognitionem adulti singuli inter Christianos habeant.

*Ibidem. pag. 137.* Dico Ethnicos talem habuisse fidem, qualis postulat, scilicet, DEVM esse, & præmia largiri ijs qui ipsum diligunt. Imò purum & sincerum divinum cultum animarum docuerunt. Quinimò excepto eo quod historiam de Christo ignorarunt, DEVS illustra testimonia veritatis, accepti cultus divini, atque etiam veræ dilectionis DEI & proximi, inter ipsos, saltem inter multos, distribuit.

*Ibidem. pag. 138.* Nego hanc propositionem, Nemo potest, salvus fieri, qui Christo per veram fidem non est insitus.

*Ibidem. pag. 141.* Credo multos fide de historiâ Christi præditos Christum nunquam induisse, & contrâ multos Christum induisse, atque in se habuisse, qui ejusmodi plenam de historia Christi cognitionem non habuerunt.

*Ibidem. pag. 145.* DEVS Ethnicis poterit respondere, etsi permitto ut ad lucem Lunæ, aut stellarum ambuletis, tantum tamen lucis habetis, ut viam vestram ambulare possitis.

*Ibidem. pag. 147.* Quamvis simplex carentia historiæ de Christo non necessariò condemnet, tamen Religio Christiana admodum utilis est, & quando DEVS eam manifestari & credi vult, planè necessaria.

*Ibidem. pag. 148.* Quamvis Ethnici infernali igne non punirentur, tamen Christiani majorem gloriam in regno cælorum possent habere, quam ipsi, cum Theologi ferè omnes doceant ibi diversos fore gloriæ gradus.

II. Totam atque universam Ecclesiam in terris deficere posse: neque necesse esse ut Christus Rex & caput Ecclesiæ  
semper

*semper Ecclesiam aliquam veram in terris habeat.*

Ab EPISCOPIO, *Disput. priv. de Eccl. thes. 10.* Addimus, quod tamen ex eo [scilicet Ecclesiam quamlibet deficere posse] necessariò sequitur, *totam & universam Ecclesiam in terris deficere posse.*

*Ibidem. thes. 11.* Neque verò necesse esse credimus ad hoc, ut Christus Rex & caput maneat, in terris Ecclesiam aliquam veram semper esse.

## ARTICVLVS XXVIII.

*De communione Sanctorum cum  
verâ Ecclesiâ.*

CRedimus quòd cum sanctus hic cœtus & congregatio sit eorum qui servari debent: & salus nulla sit extra eam; neminem cujuscunque dignitatis aut nominis is fuerit, sese ab eâ subducere aut segregare debere, ut sua tantum consuetudine contentus, solus ac separatim vivat. Sed omnes ac singulos teneri huic cœtui se adungere atque uniri, Ecclesiæ unitatem sollicitè conservare, seseq; illius tum doctrinæ, tum disciplinæ subjicere, collum denique Christi jugo sponte subjicere, ac tanquam communia ejusdem corporis membra

ædificationi fratrum inservire, prout DEVS unicuiq; sua dona fuerit largitus. Porro ut hæc melius observentur, omnium fidelium partes sunt, sese juxta DEI verbum ab ijs omnibus disiungere, qui sunt extra Ecclesiam constituti, huicque fidelium cœtui ac congregationi se adungere, ubicunque illam DEVS constituerit: etsi id contraria Principum vel Magistratum edicta prohibeant, indicta etiam in eos capitis & mortis corporeæ pœna, qui id fecerint. Quicunque igitur à vera illa Ecclesia recedunt, aut se illi aggregare recusant, apertè DEI mandato repugnant.

---

## ARTICVLVS XXIX.

### *De Notis vera Ecclesiæ.*

**C**Redimus summa tum diligentia, tum prudentia, ex verbo DEI esse inquirendum ac discernendum, quænam sit illa vera Ecclesia: quandoquidem omnes sectæ, quotquot hodie in mundo vigent, Ecclesiæ titulum noménque usurpant atque prætexunt.



xunt. Nequaquam verò de hypocritarum cœtu nunc loquimur, qui bonis in Ecclesiâ sunt permisti, [ & simul hoc Ecclesiæ titulo sunt tecti, ] sed ad Ecclesiam propriè non pertineant, licet in eâ corpore præsentés sint: sed de distinguendâ veræ Ecclesiæ congregatione ab omnibus alijs sectis, quæ se Ecclesiæ membra esse falsò gloriantur. Notæ quibus vera Ecclesia à falsâ discernitur, hæ sunt: 1. Si Ecclesia utatur purâ Evangelij prædicatione, & sincerâ Sacramentorum administratione, secundum Christi institutionem: si Disciplina Ecclesiastica rectè utatur ad corrigenda vitia: 2. si denique (ut uno verbo cuncta complectamur) ad normam verbi DEI omnia exigit, & quæcunq; huic adversantur, repudiet: Christumq; unicum caput agnoscat. Hisce notis certum est veram Ecclesiam dignosci posse, à qua fas non sit quemquam disjungi. Quæ autem sint veræ hujus Ecclesiæ vera membra ex communibus Christianorum omnium notis poterit judicari, qualis est Fides; atque hinc cognoscuntur, quod Christum unicum Servatorem fide apprehendant, peccatum fugiant &

justitiam confectentur: verum etiam DEVM  
& proximum diligant, neque ad dextram  
neque ad sinistram deflectentes, carnemque  
suam cū ipsius operibus crucifigentes: quod  
quidem ita minime est intelligendum, quasi  
nulla amplius in illis sit infirmitas, sed quod  
adversus eam per omne vitæ tempus virtute  
Spiritus pugnent, confugientes semper ad  
sanguinem, mortem, passionem, & obedien-  
tiam Domini nostri IESV Christi, in quo so-  
lo remissionem peccatorum suorum habent,  
per fidem in ipsum. Quod ad falsam vero  
attinet Ecclesiam, illa sibi suisque institutis  
& traditionibus plus semper autoritatis at-  
tribuit, quam verbo DEI: illa Christi jugo  
se subjici recusat; illa Sacramenta non ad-  
ministrat prout Christus in verbo suo præ-  
scripsit: sed illis pro arbitrio modo addit ali-  
quid, modo detrahit. Præterea hominibus  
illa semper plus quàm Christo nititur, eosque  
qui sanctè ex præscripto verbi DEI vitam  
suam componere student, quique vitia il-  
lius, atque imprimis avaritiam & idoloma-  
nias taxant, ac reprehendunt, hostiliter per-  
sequuntur. Ex his igitur facile est utram-  
que

que Ecclesiam agnoscere atque à se invicem discernere.

Contra hunc Articulum doceri videtur.

I. *Nullas notas dari posse, aut ut dentur opus esse, per quas in cognitionem veræ Ecclesiæ perveniatur.*

Ab EPISCOPIO, Disput. priv. de Notis Eccl. Thes. 2. Cum nota omnis semper notior esse debeat eâ re, cujus nota est, & ad quam tanquam obscuram & ignotam notificandam adhibetur: ei verò, qui, quæ doctrina salutaris sit, rectè intelligit, nihil omnino desit, quo Ecclesia cognosci queat. relinquitur etiam *nullas notas dari posse, aut ut dantur opus esse, per quas in cognitionem Ecclesiæ veniatur.*

*Ibidem. Thes. 5. Ullas esse circumstantias per quas tanquam notas in veræ Ecclesiæ certam & infallibilem cognitionem deveniatur, impossibile esse statuimus.*

*Ibidem. Thes. 6. Imò quod magis est hanc ipsam de certis & infallibilibus Notis, extra hanc Doctrinæ salutaris professionem, assignandis quæstionem, præcipuum gradum fuisse credimus, per quem & veræ Ecclesiæ, sive salutaris doctrinæ solida cognitio deturbata, & Antichristi solium evectum atque exaltatum, quinimò pura veritatis ignorantia introducta est, adserere non dubitamus.*

II. *Notas veræ Ecclesiæ non esse puram prædicationem Verbi divini, sinceram Sacramentorum administrationem, & Disciplinæ Ecclesiasticæ legitimum usum, sed si nota aliqua est statuenda, eam esse unam, scilicet salutaris doctrinæ professionem, ad quam pura verbi divini prædication non pertineat.*

Ab EPISCOPIO, Disput. priv. de Not. Eccl. Thes. 8. Quod si quæ tamen Ecclesiæ nota statuenda est, ea alia esse non potest, quam una salutaris doctrinæ professio.

*Ibidem.*

*Ibidem. Thef. 11.* Ad hanc salutaris doctrinæ professionem] non pertinet prædicatio verbi divini, quippe quæ Pastoris actio potius quam Ecclesiæ est, & non tam necessaria, quam utilis est ad ædificationem illius, postquam Scriptura omnibus & singulis legenda data est, ut ex suo pte marte discat quisque quantum satis est.

A VENATORE, *Declar. pag. 170.* Qui DEVM & Christum confitetur, & ejus vocem audit, & de fidei dogmatibus paratus est confiteri & sentire quæ de ijs rotundè Scriptura loquitur, etsi nec possit nec velit recipere, quod ab his aut illis Concilijs, Synodis, Patribus, & Ecclesijs fortè sit decretum, ut utatur his aut illis verbis aut phrasibus, in quocunque etiam fuerit fidei dogmate, quæ plerumque per curiositatem hominum sunt inventæ, & causæ acerborum schismatum, & horribilium persecutionum ac cædium inter Christianos fuerunt, sed qui dicit: Verba, quibus ipse Christus usus est, mihi sufficiunt, ego ea emendare non possum, atque etiam credo te non esse Præceptore tuo sapientiorum ad describendas res spirituales: quis talem virum non agnosceret pro membro Ecclesiæ? & talem cætum pro Ecclesiâ?

*Ibidem.* Nullum est convenientius medium ad diminuédas sectas, atque ut omnes Christiani in unam Ecclesiam, in fraternâ unitate, colligi possint: quam ut singuli phrasés in dogmatibus fidei vel à se inventas, aut ab alijs confictas, à se autem receptas, omittant, & ut unusquisque in sensu suo abundet, *explicationes*, descriptiones & sensus [verborum Scripturæ] sibi servando.

## ARTICVLVS XXX.

*De Regimine Ecclesiæ.*

**C** Redimus veram hanc Ecclesiam debere regi ac gubernari spirituali illa politia, i. quam nos Deus ipso verbo suo edocuit: nimirum ut sint in ea Pastores ac Ministri, qui purè & concionentur & Sacramenta administrent 2. Sint quoque Seniores & Diaconi, qui Presbyterium, seu Ecclesiæ Senatum constituent 3. ut his veluti medijs vera Religio conservari, verâque doctrina passim propagari & retineri possit: hominésque vitijs dediti spiritualiter corripi & emendari, ac veluti fræno quodam Disciplinæ cohiberi: pauperes item & afflicti auxilio & consolatione pro cuiusque necessitate sublevari possint. Tunc enim omnia ritè & ordine fient in Ecclesiâ, cum viri fideles ac pij ad ejus gubernationem deligentur, juxta D. Pauli præscriptum, quod habetur. i. Tim. 3. & Tit. 1.



## Contra hunc Articulum doceri videtur.

1. *Regimen Ecclesiæ non pertinere ad Pastores, Seniores, & Diaconos, sed ad Magistratum, si Christianus est.*

A IOAN. W TENBOGARDO, *De Offic. Christ. Magistr. in Eccl. pag. 84.* Oportet itaque Christianum Magistratum necessariò agnoscere pro Magistratu sub Christo, etiam in Ecclesiâ, & in rebus ad Ecclesiam spectantibus, ad eam regendam ac gubernandam secundum verbum ejus.

A CASP. BARLÆO, *Dissert. pag. 14.* Tantum abest ut Principibus summa in Ecclesiæ negotijs iuris dicundi potestas denegari meritò debeat, ut plerique veterum, tum in DEI populo ante Moïsis & Aaronis tempora, tum etiam apud gentiles duo hæc munera conjuncta habuerint, *Sacerdotium inquam & Regnum.* In Melchisedeco res plana est, & quæ regni cujusdam habebant speciem, in Patriarcharum familijs. Inter Ethnicos Diotogenes Pythagoricus tria in legitimo Rege requirit, ut belli dux sit, ut judex, ut sacerdos. Augustus pontificatum maximum imperio adjunxit, eumque secuti Principes idem fecere.

A SIM. EPISCOPIO, *Disput. de jure Magistr. Thes. 11.* Magistratus non simpliciter opus habet consilio ipsorum, quibus sacrorum administratio demandata est, in conficiendis decretis suis, aut in ijs roborandis & stabiliendis autoritate, cum sufficienter à Scripturâ consilij instructus, & plenariâ potestate, quâ omnia solus, quando vult, exequi potest, desuper à Deo donatus sit.

- II. *Administrationem Sacramentorum non pertinere ad solos Pastores, sed licere etiam cuilibet privato ea administrare.*

Ab EPISCOPO. in *Disput. publ. 14. Jul. 1618.* Hæc est mea sententia, licere etiam cuilibet privato Christiano administrare Cœnam Dominicam.

III. *Ecclesiam non debere regi per tales Presbyteros, seu Seniores, quales hodie sunt in Reformatis Ecclesijs Belgicis, qui in verbo non laborant.*

Ab HVG. GROTIO, *Pietat. Ord. Holl. pag. 88.* Presbyteri autem isti (ne quis antiquitatis magis quam moris nostri gnarus in eâ voce hallucinetur) non sunt qui verbum DEI predicant, aut Sacramenta exhibent, sed pauci numero electi ex populo, Pastorum *συνέδοροι*, qui unâ cum Pastoribus Ecclesiam regunt. *Ibidem. pag. 112.* Pastores ac Presbyteri ipsi debebunt saltem *συνέδορος* illos suos, quos Presbyteros vocant, utpote suum *ἐνσημα*, eligere.

---

## ARTICVLVS XXXI.

### *De vocatione Ministrorum Ecclesie.*

**C**Redimus Ministros, Seniores, & Diaconos debere ad functiones illas suas vocari & promoveri legitimâ Ecclesiæ vocatione i. adhibita ad eam seriâ DEI invocatione, [atque adhibitis Ecclesiæ suffragijs, ac postea confirmari in muneribus suis per impositionem manuum] eo ordine & modo, qui nobis in verbo DEI præscribitur. Debent autem imprimis singuli cavere ne illi-

citis medijs sese ad hæc munia ingerant. Expectandum est enim omnibus, donec à DEO ipso vocentur, ut certum habeant vocationis suæ testimonium, sciantque eam esse à Domino. Cæterùm omnes verbi DEI Ministri, ubicunque sint locorum, eandem habent omnes atque æqualem tum potestatem, tum auctoritatem, ut qui sint æque omnes Christi unici illius Episcopi universalis & capitis Ecclesiæ Ministri. [Ac proinde nulla Ecclesia habet auctoritatem ullam, sive dominium in alteram, ut illi domineatur.] Porro ne sancta hæc DEI ordinatio, aut violetur aut abeat in contemptum, debent omnes de verbi Ministris & Senioribus Ecclesiæ, propter opus cui incumbunt, honorifice sentire, atque cum ijs pacem colere: & à rixis ac contentionibus, quantum fieri potest, invicem abstinere.

---

Contra hunc Articulum doceri videtur.

1. *Ministros verbi DEI, Seniores, & Diaconos non debere eligi ab Ecclesiâ, sed à Magistratu.*

A IOAN. W TENBOGARDO, *De Offic. Christ. Mag. in Eccl. pag. 92.* Officium Magistratus in regimine Ecclesiæ specia-

speciatim se extendere ad vocationem atque institutionem Ministrorum Verbi, & reliquorum ministeriorum Ecclesiasticorum, probatur ex exemplis Moſis, qui quâ Magiſtratus, Aaronem & filium ejus Eleazarum conſtituit ſacerdotes: & Salomonis, qui Abjatharum removit à ſacerdotio, & Sado-kum in ejus locum ſubſtituit.

*Ibidem. pag. 94.* Quod in Novo Teſtamento poſt Apoſtolos, Evangeliſtas, & Prophetas, poſtea Paſtores & Doctores vocati & conſtituti fuerunt per ſuffragia Eccleſiæ Chriſtianiæ, & impoſitionem manuum Presbyterij, ita ut Magiſtratus eo tempore in hoc negotio nullæ fuerint partes, factum fuit quoniam Eccleſia tunc ſub cruce erant, & à Magiſtratu non tantum protegebantur, ſed etiam perſecutionibus gravabantur: inde ſequi Magiſtratum, Chriſtum ejusque veritatem jam amplectentem, in vocatione Miniſtrorum nullas habere partes, verè & ſine magnis abſurditatibus dici non poteſt.

## II. Miniſtros Verbi D E I non debere eſſe æqualis poteſtatis atque autoritatis.

A B H V G. G R O T I O, *Pietat. Ord. Holl. pag. 118.* Infirmi-tatem hanc Puritani putant eſſe magnam, quod Eccleſiæ regantur per Episcopos. Quid boni multi in noſtra Eccleſiæ regimine deſiderent, quibus modis putent vitia ad ἀναγ-χίων accedentia commodiſſimè poſſe ſanari, diſſerere hic non inſtitui. Neque tamen me contineo, quin fontem & originem tum hujus, tum aliarum πλημελειῶν indicem. Exiſtimamus tanto nos puriores fore, quanto longius ab omnibus Eccleſiæ Romana inſtitutis receſſerimus: nullo diſcrimine: neque volumus animadvertere inter multos il-lius corporis morbos aliquas tamen manſiſſe ſanioris avi-reliquias. Exceſſit medicina modum.

*Ibidem. pag. 120.* In Synodo Emdanâ multa Miniſtri de regendis Eccleſijs decrevere. Primum caput eſt, Ne Ec-cleſia una in alteram dominatum exerceat, inò ut omnes à ſuſpici-ione quavis & occaſione dominatus ſibi caveant. Quanquam

autem *Episcopalis eminentia dominatus non est*, his tamen vocibus eam indicari satis manifestum est. *Item.* Imò verò quot fuere Synodi, toties illis ipsis Emdanæ Synodi verbis stabilita est *invariabilis*.

---

## ARTICVLVS XXXII.

### *De Potestate Ecclesiæ in condendis Legibus Ecclesiasticis, & in administrandâ Disciplinâ.*

**I**Nterim credimus quamvis utile quidem sit, ut Gubernatores, qui Ecclesijs præfunt, aliquem inter se ordinem constituent, ad conservationem corporis Ecclesiæ, i. tamen studiosè cavere eos debere, ne quo pacto ab ijs deflectant, declinentve, quæ Christus ipse, unicus Magister noster semel constituit. Quapropter rejicimus omnia humana inventa, omnésque leges, quæ ad DEI cultum sunt introductæ, ut ijs conscientiæ ullo modo illaqueentur, aut obstringantur. Recipimus itaque eas solas, quæ idoneæ sunt vel ad fovendam, alendamque concordiam, vel ad nos in DEI obedientiâ retinendos.



dos. Ad id verò imprimis necessaria est Excommunicatio, ex præcepto verbi DEI usurpata: & aliæ illi annexæ disciplinæ Ecclesiasticæ appendices..

---

Contra hunc Articulum doceri videtur.

1. *Non ad Gubernatorum, qui Ecclesijs præsunt, sed ad Magistratus munus pertinere, ordinem constituere ad conservationem corporis Ecclesiæ:*

A IOAN. W TENBOGARD, *De Offic. Mag. in Eccl. pag. 68.* Officium Magistratus in regimine Ecclesiæ speciatim se etiam extendit ad condendum leges & Constitutiones Ecclesiasticas.

*Ibidem. pag. 99.* Potestatem leges Ecclesiasticas condendi, figendi, & refigendi ad Magistratum pertinere docent exempla piorum Regum, Davidis, Solomonis, Ezechiæ, Iosifæ, & aliorum.

Ab ARMINIO, *Artic. perpend. pag. 38.* Penes Magistratum est, leges de politiâ Ecclesiasticâ condere.

---

## ARTICVLVS XXXIII.

### *De Sacramentis:*

**C**Redimus DEUM habitâ nostræ habitudinis atque infirmitatis ratione, Sacramenta nobis instituisse, ut promissa sua in nobis obsignaret, & ut essent Divinæ erga  
nos.

nos benevolentiae, gratiae, donorumque ejus certissima nobis pignora, ad fidem nostram fovendam, & sustentandam comparata 1. Addidit verò illa ad verbum Evangelij, ut tam ea ipsa quæ nobis externè verbo suo declarat, tum ea etiam quæ ille ipse in cordibus nostris internè operatur, efficacius sensibus nostris proponeret: ac denique ut salutem, quam nobis communicare dignatur, magis magisque in nobis confirmaret. Sunt enim Sacramenta signa, ac symbola visibilia rerum internarum & invisibilium, per quæ, ceu per media, DEVS ipse virtute Spiritus Sancti in nobis operatur. Itaque signa illa minime vana sunt, aut vacua: nec ad nos decipiendos aut frustrandos instituta. Ipsorum enim veritas est ipse IESVS CHRISTVS, sine quo nullius prorsus essent momenti. Præterea sufficit nobis is Sacramentorum numerus, quem Christus ipse verus & unicus Doctor noster instituit. Sunt vero illa duo duntaxat, nimirum Sacramentum Baptismi, & sacrae Cœnæ Domini nostri Iesu Christi 2.

Contra hunc Articulum doceri videtur.

I. *Proximum & maximè proprium Sacramentorum finem non esse obsignationem gratiæ DEI, & confirmationem fidei nostræ, sed solemnem tantùm Christi commemorationem.*

A WELSINGIO, *De Offic. hom. Christ. fol. D. 5.* Error est Evangelicorum, cum tribuunt cœnæ Dominicæ quod fidem nostram confirmet, quodque in memoriam nobis redigat mortem Christi pro nobis.

*Ibidem.* Sacra hæc ceremonia in eum finem à Christo est instituta, ut solemnis ipsius commemoratio fiat; quatenus, videlicet corpus suum pro nobis tradidit, & sanguinem suum pro nobis fudit.

*Ibidem. fol. D. 6.* Nusquam apud sacros scriptores indicium ullum extat, quod ad fidem in nobis confirmandam hic sacer ritus institutus fuerit.

Ab ARMINIO, *Artic. perpend. pag. 38.* Perpendendum, an proximus & maximè proprius ideoque immediatus finis Cœnæ Dominicæ, tum quâ institutus, tum quâ usurpatus, non sit memoria seu commemoratio vel annuntiatio mortis Domini, & quidem cum gratiarum actione, pro eo quod Deus Filium suum pro nobis in mortem dedit.

A VENATORE, *Theol. vera & mera, pag. 16.* Cœna Domini est exercitium ad significandam communionem Sanctorum, hoc est, ad commemorationem dilectionis Iesu erga omnes fideles, atque ad præstationem officij debiti & charitatis mutuæ.

II. *Tria esse Sacramenta Novi Testamenti, Baptismum, Cœnam Dominicam, & Lotionem pedum.*

A VENATORE, *Theol. vera & mera, pag. 13.* Quæst. An non Iesus Discipulis suis etiam instituit ac mandavit externum aliquod & visibile Sacramentum humilitatis,

& mutuorum officiorum? Resp. *Lotionem pedum*: uti nobis prolixè hoc describit Ioannes, cap. 13. à vers. 1. ad 18.

---

## ARTICVLVS XXXIV.

### *De Baptismo.*

**C**Redimus & confitemur IESVM CHRIS-  
 TVM (*qui finis legis est*) omni alij san-  
 guinis effusioni ad propitiationem peccato-  
 rum adhibendæ finem proprio suo sangui-  
 ne effuso jam imposuisse: & abolitâ Circum-  
 cisione, quæ fiebat per sanguinem, Baptis-  
 mum illius loco instituisse, 1. quo in Eccle-  
 siam DEI recipimur, & à cunctis alijs gen-  
 tibus & peregrinis alijs religionibus segrega-  
 mur, utpote illi soli consecrati, cuius sym-  
 bolum & insignia gestamus. Est denique  
 Baptismus nobis testimonio, illum ipsum  
 nobis fore DEVM in æternum, qui & Pater  
 nobis est propitius 2. Omnes igitur, qui sui  
 sunt, iussit Dominus aquâ purâ Baptizari in  
 nomine Patris, & Filij, & Spiritus Sancti: ut  
 significaret sanguinem Christi per Spiritum  
 Sanctum idem præstare & efficere internè  
 in anima, quod aqua externè operatur in  
 corpo-

corporibus. Sicuti enim aqua in nos effusa, & super corpus baptizati eminens ipsumque irrigans, sordes corporis abluat : sic & sanguis Christi animam abluens, à peccatis illum emundat, nósque filios iræ in filios D E I regenerat. Non quod aqua hæc materialis ista efficiat, sed aspersio ipsa pretiosissimi sanguinis Filij D E I, qui nobis est ceu mare illud rubrum, per quod transeundum est, ut è tyrannide Pharaonis, id est, Diaboli, egredi, & in spiritualem terram Chanaan introire possimus. Itaque Ministri quidem præbent nobis Sacramentum, & rem visibilem : at Dominus ipse exhibet quod Sacramento significatur, nimirum dona & gratias invisibiles, abluens, purificans, & mundans animas nostras à cunctis sordibus & iniquitatibus suis : renovans item, & replens corda nostra omni consolatione : largiens denique nobis veram paternæ suæ bonitatis certitudinem, 3. novo homine nos induens, & vetere exuens cum omnibus operibus ejus. Præterea credimus omnem hominem, qui vitam æternam consequi cupiat, debere semel Baptizari, [atque unico



hoc Baptismo contentū esse.] qui nunquam postea sit iterandus, cum ne nasci quidē bis possimus. Neque tamen hic Baptismus eo duntaxat momento prodest, quo aqua nobis inhæret, aut quo eâ tingimur: sed per totum vitæ nostræ tempus: [alioquin necesse foret nos caput nostrum semper aquâ tinctum habere.] Anabaptistarum itaque errorem hic detestamur, qui non modò unico & semel suscepto Baptismo contenti non sunt: sed & Baptismus infantium è fidelibus parentibus natorum damnant 4. Nos vero eos eadem ratione baptizandos, & signo fœderis obsignandos esse credimus, quâ olim in Israël parvuli circumcidebantur, nimirum propter easdem promissiones infantibus nostris factas. Et revera Christus non minus sanguinem suum effudit, ut fidelium infantes, quam ut adultos ablueret. Ideoq; signum seu Sacramentum rei, quam Christus eorum causa est operatus, illos recipere convenit: quemadmodum in Lege iubet Dominus Sacramentum mortis & passionis Christi communicari pueris recens natis, offerendo pro ipsis agnum, qui Sacramentum

mentum erat Christi venturi. Prætereà quod Circumcisio præstabat populo Iudaico, idem infantibus fidelium nunc præstat Baptismus. Atque hæc caussa est, cur Paulus Baptismum vocet *Circumcisionem Christi*.

Contra hunc Articulum doceri videtur.

I. *Baptismum fuisse tantum ritum temporarium, ex nullo præcepto Iesu Christi ab Apostolis usurpatum.*

A SIM. EPISCOPIO, Disput. privat. de Baptismo. coroll. 1. Negamus nulla solidatione demonstrari posse, Baptismum ceremoniam & ritum fuisse tantum temporarium, ex nullo præcepto Iesu Christi ab Apostolis tantum usurpatum atque exercitum.

II. *Baptismi finem non esse gratiæ Dei de remissione peccatorum per sanguinem Christi obsignationem, sed tantum significationem: nec fidei nostræ de gratiâ Dei confirmationem, sed tantum professionem.*

A WELSINGIO, De Offic. hom. Christ. fol. E. I. Error Evangelicorum circa Baptismum est, quod affirmant eo obsignari divinitus peccatorum remissionem, id quod Cœnæ Domini quoque tribuunt, & quemadmodum per Cœnam Domini, sic per Baptismum adultorum qui baptizantur, fidem confirmari credunt, cum tamen per Baptismum non quidem obsignetur, sed tantum adumbretur peccatorum remissio.

Ibidem. De fidei confirmatione, quæ adultis ex Baptismo, quem suscipiunt, contingat, nihil attinet amplius dicere, quam nec ullum indicium huius rei in divinis literis extare.

Ab EPISCOPIO, Desp. privat. de Bapt. thes. 8. Finis Baptismi est sola tantum divini gratiæ & professionis nostræ significatio.

III. *Neminem sine speciali revelatione in hac vitâ posse habere hanc de paternâ DEI bonitate certitudinem, DEVM sibi propitium Patrem fore in æternum, quoniam omnes verè fideles ex fide & gratiâ DEI totaliter & finaliter possint excidere.*

AREMONSTRANTIBVS, Coll. Hag. pag. 340. Non videmus doctrinam istam de Perseverantiâ in fide eorum, qui semel crediderunt, esse fundamentum consolationis filiorum DEI, sed existimamus suâ naturâ atque indole idoneam esse ad ingenerandam hominibus securitatem, ut in medio cursu peccatorum ipsis sit loco pulvinaris, quo semetipsos molliter fovere, suaviterque demulcere, atque ita consolari possint.

*Ibidem. pag. 346. Dubitare utrumne semper ij futuri si mus, qui nunc sumus, non est noxium, sed laudabile cum primis atque utile est.*

*Ibidem. pag. 423. Necessariò sequitur, eum qui semel fidem adeprus est, posse eam amittere: ac propterea nullum fidelem posse citra specialem revelationem certum esse, se semper in fide perseveraturum.*

*Ibidem. pag. 297. 302. Doctrina de certâ verè fidelium perseverantiâ ex se vera pietati & bonis moribus noxia est, tum in ijs qui eam docent, tum in ijs qui eam audiunt: & fideles commonesactiones Spiritus Sancti adversus periculosas technas & machinationes Diaboli inutiles & inefficaces reddit.*

*Ibidem. pag. 302. Crebra in Scripturis occurrunt exempla eorum, qui in fide non perstiterunt, sed totaliter & finaliter ab ea defecerunt.*

A I A C. ARMINIO, Artic. perpend. pag. 31. Perpendendum, An verè fideles possint excidere totaliter & finaliter, Item. An reipsa nonnulli totaliter & finaliter à fide excidant. Item. Sententia, quæ negat verè fideles & regenitos vel reipsa excidere à fide totaliter & finaliter, nunquam fuit ab Ecclesiâ, ab ipsis Apostolorum temporibus ad hæc nostra se-

stra secula, pro Catholicâ habita, neque quæ contrarium affirmat, pro hæreticâ æstimata: imò verò affirmans semper plures in Christianismo adstipulatores habuit, quam negans.

*Ibidem.* Perpendendum, An quis Fidelis *certus esse possit se à fide non defecturum citra specialem revelationem.* Item. An Fideles credere teneantur, se à fide non defecturos. Affirmatio utriusque quæstionis nunquam pro Catholico dogmate habita fuit in Ecclesiâ Christi: nunquam etiam negatio utriusque istius quæstionis hæresis judicata est ab Ecclesiâ Catholicâ.

*Ibidem. pag. 32.* Persuasio quâ quis Fidelis sibi *certò persuadet se à fide deficere non posse, saltem se non defecturum à fide,* non tam solatio servit adversus desperationem seu dubitationem, Fidei & spei adversam, quam *securitati ingenerande,* quæ saluberrimo timori, quo salutem nostram operari jubemur, & qui in hoc tentationum loco magnoperè est necessarius, directè adversetur.

A NICOL. GREVINCHOVIO, *contra Ames. pag. 138.* Sensum Electionis ad gloriam in hac vitâ nullum agnosco, qui sit *absolutis certitudinis,* sed tantum conditionatæ. Item. Qualis est *certitudo perseverantiæ nostræ, talis & Electionis:* utramque verò conditionatam esse qui negaverit, ipsum quoque Evangelium negabit.

A PETRO BERTIO, De Apostasiâ Sanctorum, per totum librum. *Præfat.* Iudico *sententias istas,* quibus docetur, 1. Solis illis gratiam à DEO dari, qui absoluto & inconditionato decreto à DEO essent ad vitam electi, cæteris verò non dari. 2. Et dari illis per vim quandam irresistibilem. 3. Ita ut semel accepta nunquam postea rejici aut excludi possit; *esse Sacris Scripturis, naturæ DEI, & bonis moribus inimicas.*

*Ibidem.* Enimverò si nulla est alia *Perseverantia,* quam quæ *fictitio decreto inconditionata Electionis nixa est,* profiteor palam, & meo more, propositum mihi esse non tantum illam *oppugnare,* sed etiam *evertere,* ut quæ *divino verbo*



verbo advesetur, & sollicitudinem omnem, curamque salutis, mortalibus eripiat.

*Ibidem.* pag. 7. Controversia ista sunt, 1. An qui credit possit fidem suam deserere. 2. An quæ deseritur, fuerit vera fides. Nos ad utramque quæstionem respondebimus affirmative.

A SIM. EPISCOPIO. *Disput. publ. de Pecc. act. corol. 1.* Negamus aliquod peccatorum horum (inter quod etiam est peccatum in Spiritum Sanctum) dari, in quod is qui verè semel credidit in Christum Iesum, suapte culpâ incidere nequeat.

*Ibidem.* corol. 2. Affirmamus eum, qui semel verè credit eâ fide, quæ justificans à quibusdam dici solet, ita peccare posse, ut à fide illâ suâ, & consequenter à gratiâ & salute æternâ, totaliter & finaliter excidat.

IV. *Infantes fœderatorum non esse baptizandos, sed tantum adultos, qui doceri, & fidem profiteri possunt.*

A WELSINGIO, *De Offic. hom. Christ. fol. D. 3.* Error Evangelicorum est, cum statuunt infantium baptismum esse divinam ordinationem, aut certè rem divinæ ordinationi consentaneam.

*Ibidem.* Neque verò ullum baptizati infantis exemplum usquam in S. literis extat. *Item. fol. B. 1.* Nullum divinum præceptum infantes baptizandi, sed ne exemplum quidem ullum alicujus baptizati infantis in sacrâ historiâ extat,

A VENATORE, *Theol. mera & vera, pag. 12. Quæst.* An Iesus ordinavit ut prius doceantur homines, & postea baptizentur? Resp. Omnino.



## ARTICVLVS XXXV.

*De Cænâ Domini.*

**C**Redimus etiam & confitemur D. Jesum Christum Servatorem nostrum, sacrosanctum Cænæ suæ Sacramentum instituisse, ut in ea nutriat, ac sustentet eos, quos jam regeneravit, & in familiam suam, nempe Ecclesiam insevit. Qui verò regenerati sunt, duplicem in se vitam habent: unam quidem carnalem & temporariam, quam secum à prima nativitate sua attulerunt, & hæc communis est omnibus hominibus: alteram spiritualem & cœlestem, quæ illis donatur in secunda illa nativitate, quæ fit per verbum Evangelij in unione corporis Christi, & hæc vita non est communis nisi solis Electis DEI. Sicuti verò DEVS panem terrenum & materiale ad hujus vitæ carnalis & terrenæ sustentationem idoneum constituit, qui ut & ipsa vita, omnibus est communis; ita & ad conservationem illius vitæ spiritualis, & cœlestis, quæ fidelium

R                      propria

propria est , D E V S panem vivificum misit , qui de cœlo descendit , nempe Iesum Christum : is nutrit & sustentat vitam fidelium spiritualem , si comedatur , id est , applicetur & recipiatur spiritu per fidem . Ut autem panem hunc spirituales & cœlestem Christus nobis figuraret , sive repræsentaret ; instituit Panem & Vinum terrenum & visibilem in Corporis & sanguinis sui Sacramentum : ut ijs nobis testificetur , quam verè accipimus & tenemus manibus nostris hoc Sacramentum , illudque ore comedimus ( unde & postmodum vita hæc nostra sustentatur ) tam verè etiam nos fide ( quæ animæ nostræ est instar & manus & oris ) recipere verum corpus & verum sanguinem Christi , in animis nostris , ad vitam spiritualem in nobis fovendam 2. Certissimum verò est , Christum non sine causâ tam sollicitè hoc suum Sacramentum nobis commendare , utpote qui perficiat in nobis revera , quæcunque ipse nobis his sacris signis repræsentat : quamvis modus ipse ingenij nostri captum superet , nec percipi à quoquam possit : quod videlicet operatio Spiritus Sancti  
occulta

occulta sit & in comprehensibilis: [ interim nequaquam erraverimus si dicamus fieri per fidem. ] Dicimus itaq; id quod comeditur esse ipsissimum Christi corpus naturale, & id quod bibitur verum ipsius sanguinem: at instrumentum seu medium quo hæc comedimus & bibimus non est os corporeum, sed spiritus ipse noster, idque per fidem. Christus itaque semper ad dextram Patris in cœlis residet, nec ideo minus se nobis per fidem communicat. Porro hæc Cœna mensa est spiritualis, in quâ Christus seipsum nobis cum omnibus bonis suis participandum offert, efficitque ut nos in illâ, tam illo ipso, quam merito passionis mortisque ipsius fruamur. Animam enim nostram miseram & afflictam, omnique consolatione destitutam, carnis suæ esu ipsemet nutrit, roborat & consolatur: sanguinis item sui potu eam sustentat ac recreat. Præterea quamvis Sacramenta sint conjuncta rei ipsi significatæ, ambæ tamen res istæ non ab omnibus recipiuntur. Impius enim recipit quidem Sacramentum in suam condemnationem, at rem seu veritatem Sacramenti non recipit. Verbi

gratia, Iudas & Simon Magus receperunt quidem ambo Sacramentum: Christum verò ipsum, qui illo significabatur, minimè, quoniam solis ille fidelibus communicatur. Postremò huic nos Sacramento sacrosancto in cœtu populi DEI cum summa humilitate & reverentia communicamus, memoriam mortis Christi Servatoris nostri cum gratiarum actione sanctè celebrantes, & fidei, Religionisque Christianæ confessionem publicè ibi profitentes. Nemo itaque ad hanc mensam se sistere debet, qui prius se non probaverit, ne de hoc pane edens, & de hoc poculo bibens iudicium ipse sibi & damnationem manducet, ac bibat. Vsu porò hujus Sacramenti accenditur in nobis flagrantissimus amor tum in DEVM ipsum, tum in proximum. Itaque nos hic quidem merito omnes hominum ludificationes, & damnanda commenta ( quæ illi Sacramentis addiderunt & admiscuerunt ) tanquam veram profanationem rejicimus: affirmamusque omnes pios unico illo ordine, & ritu, quem Christus & Apostoli nobis tradiderunt, contentos esse, atque de mysterijs eodem



codem modo loqui debere, quo & illi locuti sunt.

---

Contra hunc Articulum doceri videtur.

1. *Non omnes qui vita spiritualis per regenerationem participes sunt, esse Electos DEI, sed hanc vitam etiam communem esse multis Reprobis : quoniam verè regeniti à verâ fide & regeneratione totaliter & finaliter excidere possint, & multi etiam exciderint atque excidant ; & Electus nemo sit, vel haberi possit, quamdiu ad finem usque vita in fide non perseveraverit.*

A R E M O N S T R A N T I B V S, Coll. Hag. pag. 303. In sacrâ scripturâ invenimus diversa exempla eorum, qui in fide non perseverarunt, sed totaliter & finaliter ab eâdem exciderunt.

*Ibidem. pag. 304. Verè fideles, quia possunt eò prolabi ut opera carnis faciant, possunt etiam fidem amittere & quum opus carnis faciunt, eandem amiserunt ad tempus, si post se convertant, & in perpetuum, si se non convertant.*

*Ibidem. pag. 384. Non est ineptum dicere hominem bis posse regenerari.*

A B E R T I O, De Apostasiâ Sanctorum, pag. 21. 22. Scripturæ narrant, verè justos, fideles, & sanctos à verâ justitiâ, fide, & sanctitate defecisse, & hoc factum in Angelis, in primis nostris parentibus, in Saule, in Hymenæo & Philetto, in Dema, in Nicolao, atque etiam in ipso Salomone librorum Canonicorum autore, Templi dedicatore, & typo Christi.

A N I C O L. G R E V I N C H O V I O, contra Ames, pag. 136. Electio ex fide prævisâ includit perseverantiam in fide. Item. Quoties fidelee statuimus objectum Electionis, toties nos fidem & perseverantiam in fide conjungimus. Item. Fideles



denominamus ab eâ fide, quæ totum fidei apotelesma, initium, progressum, & finem ambitu suo comprehendit.

*Ibidem.* In Scripturis dupliciter dicuntur *Electi*. 1. in completè, secundum statum præsentem, quâ tales, pura fideles hoc tempore, excepto ultimo vitæ termino, in quo 2. *Electio* completur.

*Ibidem.* pag. 137. Qui justificationis participes sunt nondum sunt idoneum Electionis peremptoriæ objectum.

*Ibidem.* Electio peremptoria in objecto prærequirit totam consummatam fidei obedientiam. Item. Electio peremptoria actu suo versatur circa fidelem in fide morientem.

*Ibidem.* pag. 138. Sensus Electionis ad gloriam in hac vitâ nulum agnosco, qui sit absolutæ certitudinis.

*Ibidem.* pag. 141. Multi reprobi ejusdem cum electis, justificationis, sanctificationis, pacis conscientie &c. ad tempus consortes fuerunt.

II. *Finem proximum & maximè proprium Cœnæ Domini non esse ob signationem communicationis beneficiorum Christi, ad confirmationem fidei nostræ, sed professionem tantum hujus communicationis, & commemorationem solemnem mortis Christi.*

A WELSINGIO, De Offic. hom. Christ. fol. D. 5. Esus & potus in hac sacrâ ceremoniâ pertinet ad declarandum eos, qui ex illo pane comedunt, & ex vino illo bibunt, *palam & constanter & profiteri* animam suam in spem vitæ æternæ Christi corpore pro nobis fracto & sanguine fuso non minus ali & sustentari, quam pane & vino corpus ad caducam hanc vitam alatur & sustentetur. Vnde factum est ut Paulus Apostolus dixerit, *panem quem frangimus esse communicationem Christi corporis, & poculum, cui benedicimus, communicationem esse ejus sanguinis, hoc est, professionem hujus communicationis.*

*Ibidem.* Error Evangelicorum est, cum tradunt finem Cœnæ Domini esse, ut fidem nostram confirmet, & ut in memoriam nobis redigat mortem Christi pro nobis.

*Ibidem.*

*Ibidem. fol. D. 6.* Nusquam apud sacros scriptores indicium ullum extat, quod ad mortem Christi in nobis renovandam, *vel ad fidem in nobis confirmandam*, fuerit hic sacer ritus institutus.

*Ibidem. fol. E. 1.* Cum Cœna domini celebratur, *non* quidem obsignatur remissio peccatorum, sed illam olim per mortem Christi obsignatam fuisse *commemoratur ac prædicatur.*

Ab ARMINIO, *Artic. perpend. pag. 38.* Perpendendum an proximus & maximè proprius, ideòque immediatus finis Cœnæ Domini, tum quâ institutus est, tum quâ usurpatur, non sit memoria, seu commemoratio, *vel annuntiatio mortis Domini*, & quidem cum gratiarum actione pro eo quod DEVS Filium suum pro nobis in mortem dederit, ejusque carnem edendam, & sanguinem bibendum dedit per fidem in illum.

A SIM. EPISCOPIO, *Disput. privat. de Cœna Domini, thes. 10.* Finis celebrationis Cœnæ est *sola tantum representatio & significatio* mortis, ac beneficij illius ingentis, quod per mortem nobis partum atque comparatum est, per quam fides etiam ipsa nobis excitari & confirmari solet, animusque noster veluti cibo atque potu quodam nutriri & educari spe vitæ æternæ.

A VENATORE, *Theol. vera & mera, pag. 16.* Cœna Domini est ritus ad significandam & commemorandam dilectionem Iesu, erga omnes fideles, & ad debitum dilectionis officium, erga nos mutuò præstandum.

## ARTICVLVS XXXVI.

*De Magistratu.*

**C**Redimus DEVM Optimum Maximum  
ob generis humani corruptelam ac  
depravationem, Reges, Principes & Magi-  
stratus constituisse: velléque ut Mundus hic  
legibus ac certâ politiâ gubernetur, ad coer-  
cenda hominum vitia, & ut omnia inter ho-  
mines recto ordine gerantur. Idcirco Magi-  
stratus ipsos gladio armavit, ut malos qui-  
dem plectant pœnis, probos verò tuean-  
tur i. Horum porrò est non modò de civili  
politiâ conservandâ esse sollicitos, verum  
etiam dare operam ut sacrum Ministerium  
conservetur, omnis idololatria & adulteri-  
nus DEI cultus è medio tollatur, Regnum  
Antichristi diruatur, Christi verò Regnum  
propageretur. Denique horum est efficere,  
ut sacrum Evangelij verbum ubique prædi-  
cetur, ut singuli purè DEVM colere & vene-  
rari ex præscripto verbi ipsius liberè possint.  
Cæterùm cuncti homines, cujuscunque  
sint

sint vel dignitatis, vel conditionis, ac status, legitimis Magistratibus subijci debent, illisque vectigalia ac tributa pendere, & ijs in omnibus obsequi ac obedire, quæ verbo DEI non repugnant: preces etiam pro ijs fundere, ut eos DEVS in omnibus ipsorum actionibus dirigere dignetur, nos verò vitam tranquillam ac quietam sub ipsis, cum omni pietate & honestate, ducere possimus. Quamobrem Anabaptistas & turbulentos omnes detestamur, qui superiores Dominationes & Magistratus abjiciunt, jura ac judicia pervertunt, bona omnia communia faciunt, ac denique ordines ac gradus, quos DEVS honestatis gratiâ inter homines constituit, abolent ac confundunt.

---

Contra hunc Articulum doceri videtur.

I. *Magistratui Christiano non licere fontes gladio, seu pœnâ capitali punire: neque licere Christianis in bello sanguinem humanum fundere.*

A WELSGIO, De Offic. hom. Christ. fol. 1. Cum Christi præceptis pugnat, quod apud Evangelicos conceditur, ita vim vi repellere, ut etiam hominem interficere liceat, si aliter vis repelli nequeat: præsertim verò cum bellum injustum nobis infertur.



*Ibidem.* Antiquissimum ac severissimum DEI præceptum *humani sanguinis non fundendi*, quod habetur Gen. 9. 5. nihil in totâ Christi & Apostolorum ejus doctrinâ immutatum invenitur.

*Ibidem.* Si dixerint, sub V. T. ubi non minus, quam sub N. præceptum *humani sanguinis non fundendi* vigeat, licuisse tamen vim hostium, etiam cum ipsorum occisione, propulsare. Resp. Id propterea tum licuisse, quod DEVS multis modis declaraverat, se id *tum temporis* non improbare.

*Ibidem.* DEVS populo suo sub V. T. vel promiserat, vel jam assignaverat, & dederat, *terrenum regnum, terrenamque possessionem*, quam ab ipsis defendi & conservari volebat: quod fieri non potuisset, si hostes in se irruentes *armis propulsare*, & ad internecionem etiam interdum *interficere* non licuisset. At sub. N. T. nullam suo populo *terrenam possessionem dedit*; imò terrâ posthabitâ cælum eos inquirere iussit, & propterea nullâ ratione unquam, vel per Christum, vel per ejus Apostolos declaravit, se *hostium invadentium propulsationem cum ipsorum nece conjunctam* approbare.

*Ibidem.* Remanet hîc firmissimum, nec ullâ ex parte immutatum sub Evangelio præceptum *humani sanguinis non fundendi*, præsertim cum Christus præcepta addiderit, quibus non modò *ipsorum etiam hostium sanguinem fundere vetat*, sed illis benefacere jubet.



## ARTICVLVS XXXVII.

*De Iudicio extremo, Resurrectio-  
ne carnis, & Vita  
eterna.*

**P**ostremò credimus ex DEI verbo, Do-  
minum nostrum IESVM CHRISTVM,  
quando tempus à DEO præstitutum, quod  
omnibus creaturis est ignotum, advenerit,  
& numerus Electorum completus fuerit i. è  
cœlo rursus venturum, idque corporaliter  
& visibiliter, sicuti olim illuc ascendit, cum  
summâ gloriâ & Majestate, ut se declaret  
judicem vivorum & mortuorum: veterem  
hoc mundo igne & flammâ succenso, ut il-  
lum purificet. Tunc verò omnes creaturæ,  
tam viri quam mulieres & infantes, quot-  
quot inde ab initio usque ad finem mundi  
extiterint, coram summo hoc iudice com-  
parebunt, eò nimirum voce [ & tremendo  
clamore Angelorum ] & Archangeli, & tu-  
bâ DEI evocati. Omnes enim antea mor-  
tui è terrâ tunc resurgent, animâ singulo-  
rum

rum conjunctâ atque unitâ proprio suo corpori, in quo vixerat 2. Qui porrò ultimo illo die superstites erunt, nequaquam morientur more reliquorum, sed in momento & jactu oculi, immutabuntur, à corruptione videlicet in incorruptam naturam. *Tunc aperientur libri* ( nimirum conscientiae ) & *mortui judicabuntur* secundum ea, quæ in hoc mundo egerint, sive bona sive mala. Quinetiam tunc *reddituri sunt homines rationem de omni verbo otioso, quod locuti fuerint*, etsi id mundus nunc pro ludo & joco reputet. In summa omnis tunc hominum hypocrisis & abstrusa quæque cordis eorum palam coram omnibus detegentur. Ac propterea sola judicij istius memoria impijs & reprobis meritò est horrenda & formidabilis: pijs verò & electis summè exoptanda, & ingentis consolationis. Tunc enim redemptio ipsorum plane perficietur, & suavissimos laborum & dolorum suorum, quos in hac vitâ pertulerunt, fructus, consequentur: innocentia ipsorum tunc aperte ab omnibus agnoscetur, ipsique vicissim horrendam vindictam conspicianturi

cturi sunt, quam Dominus de ijs sumet, qui eos varijs tormentis & molestijs in hoc mundo tyrannicè affligerunt. Impij porrò proprio conscientiae suae testimonio convicti erunt, & immortales quidem reddentur, sed eâ conditione ut *in igne aeterno, qui Diabolo & angelis eius paratus est*, in sempiternum crucientur. Contra verò fideles & Electi coronâ gloriæ & honoris donabuntur: & *Filius DEI eorum nomina coram DEO Patre & [sanctis eius atque electis] Angelis confitebitur: & abstergetur omnis lachryma ab oculis eorum.* Causâ itaque eorum, quæ non hæreses & impietatis à Magistratibus, & iudicibus damnatur, causâ Filij DEI esse tunc agnosceatur. Et Dominus eos tantâ gloriâ gratis remunerabitur, quantum nullus hominum animo concipere unquam possit. Magnum erga illum Domini diem [retributionis] summo cum desiderio expectamus, ut rebus omnibus à DEO promissis plenissimè in Christo Iesu domino nostro læti potiamur, & in æternum perfruamur.

Apocal. 22. 20. *Etiam veni Domine IESV.*

---

Contra hunc Articulum doceri videtur.

I. *Non esse certum aliquem numerum Electorum, qui compleri debeat.*

A W E L S I N G I O, De Offic. hom. Christ. fol. B. 3. Decretum Electionis non ad certos ac definitos homines, nominatim hos vel illos, sed potius ad certum hominum genus referri debet.

A S I M. E P I S C O P I O, Disput. privat. de Prædest. opere, thes. 2. & 4. Falsa est atque erronea sententia, quæ statuit D E V M ab æterno certum quendam numerum, sine ullo fidei aut obedientiæ respectu, ex reliquâ turbâ seligere, ut in ijs salvandis misericordiam suam declararet.

Ibidem. Disput. de Eccl. thes. 12. Electio quarundam singularium personarum ad Ecclesiam Christi spiritualem constituentem adhiberi rectè non potuit, nec adhibita fuit.

II. *Homines non resurrecturos cum ijsdem corporibus in quibus vixerunt, sed in futurâ vitâ habituros alia corpora, quæ, quoad substantiam, spiritualia erunt.*

A C O N R. V O R S T I O, Disput. de DEO, pag. 200. Si & nos spirituale corpus habituri sumus in futuro seculo, quanto magis D E V M spiritum esse censendum est. Spiritus autem carnem & ossa non habet, nec videri nec tangi potest. Ex quo apparet D E I substantiam prorsus esse spirituales, & ab omni materiâ, seu crassâ corpulentâ penitus alienam.

Ibidem. In futuro seculo jam non amplius caro & sanguis erimus: sed ἰσάγγελοι, & spirituales.

F I N I S.

Omissa

*Omissa pag. 95.*

Contra Articulum xxv doceri videtur.

VI. *Hominem regnitum posse in hac vitâ legem D E I, seu præcepta omnia moralia, perfectè servare.*

Ab ARMINIO, *Resp. ad 31. Artic. pag. 164. 165.* Non repugno isti sententiæ Augustini, quâ statuit hominem sine peccato esse posse in hac vitâ.

*Respons. ad 9, Artic. pag. 176.* Præstatio legis secundum mentem postulantis est æstimanda: qui cum aut rigidè velit in summo perfectionis gradu illam observari, aut secundum ἐπιείκεια tantum, respondebitur bifariam, ad quæstionem, *An fideles sub gratiâ N. T. possint in hac vita Legem DEI perfectè servare?* Nempe, si postulet secundum ἐπιείκειαν, & vires quas contulit proportionatæ sint postulato, non posse hominem talem Legem D E I perfectè præstare, si consideretur ut præstanda juxta rigorem. Si verò postulet secundum ἐπιείκειαν, & vires collatæ sint proportionatæ, quod dicendum est, cum Evangelico sædere postulet; *respondendum est posse perfectè præstari.*

*Artic. perpend. pag. 30.* Qui dicit regenitos posse per Christi gratiam Legem perfectè præstare in hac vitâ, ille non Pelagianus est, neque gratiæ DEI facit injuriam, neque justificationem ex operibus stabilit.

A VORSTIO, *Apolog. Exeg. III.* Obedientia in Lege D E I requisita secundum, quid & per accidens, nobis est impossibilis, nempe quatenus extra gratiam D E I, tum justificantem, tum regenerantem, adhuc versamur: & quamdiu ita pro ut jam corrupti sumus, in nobis ipsis spectamus. Interea verum manet, D E V M nihil omnino præcipere quod non per illam integram ipsius D E I voluntatem eatenus saltem præstare possimus, ut DEVS ipse gratiose in hac obedientiâ tandem acquiescat.

*Ibidem.*



*Ibidem. pag. 112.* DEVS in nobis efficit, ut, nisi sponte nobis desimus, *praecepta ipsius*, per hanc ejusdem gratiam, *præstare & possimus & velimus*, adeoque reipsa *præstemus*: ita saltem ut DEVS in hac præstatione clementer acquiescat.

A VENATORE, *Declar. pag. 174.* Non credo DEVM jure posse ab hominibus exigere, *quod à nativitate ipsa præstare non potuerunt* : atque ad hoc præstandum vires dare non velle, & quod tamen propterea velit eos condemnare, quod bonum impossibile non præstiterint, & peccatum inevitabile non omiserint.

*Ibidem. pag. 177.* Nullo modo assentiri possum DEVM ab homine exigere *quod præstare non possit*, & ad quod præstandum vires non conferat, neque unquam conferre velit.

F I N I S.



HARMO-

HARMONIA  
SYNODORVM BELGICARVM,

*sive*

CANONES

REGIMINIS ECCLESIASTI-

CI IN SYNODIS NATIONALIBVS,

à Reformatione in BELGIO celebratis,

constituti , & in Reformatis Ecclesijs

Belgicis hætenus observati, brevi-

ter in ordinem digesti per

S. R.

## SYNODI NATIONALES

A Reformatis Ecclesijs Belgicis tum extra Belgium propter persecutionem Hispanicam, tum in Belgio celebratae fuerunt,

- |                   |            |
|-------------------|------------|
| I. WESALIÆ,       | Anno 1568. |
| II. EMDÆ,         | Anno 1571. |
| III. DORDRECHTI,  | Anno 1574. |
| IV. DORDRECHTI,   | Anno 1578. |
| V. MIDDELBVRGI,   | Anno 1581. |
| VI. HAGÆ-Comitis, | Anno 1586. |

Ab eo tempore nulla Synodus Nationalis in Belgio haberi potuit: Septima autem, ex decreto Illustr. & Præpotent. ORDINVM GENERALIVM BELGICÆ, celebrabitur (volente DEO, qui eidem clementer benedicat,)

*DORDRECHTI ad Kal. Novembr.*  
*Anno 1618.*

In cuius usum hæc eduntur.

HARMO-

# HARMONIA

## SYNODORVM BEL-

## GICARVM.

**Q**uatuor potissimum Ministerij Ordines in Ecclesiâ sunt, nimirum, Ministrorum, Doctorum, Seniorum & Diaconorum.

C A P. I.

*De Ministris verbi Dei.*

I.

Ad verbi Ministerium nemo admittatur, sine legitimâ Vocatione, Electione, justoque Examine doctrinæ, vitæque antea actæ.

II.

Cavendum sibi est à νεοφύτοις, & Monachis vel Presbyteris à Papatu conversis, ne admittantur ad S. Ministerium, nisi seria & diuturna præcesserit exploratio.

III.

Vt autem idonei ad hoc munus reperiantur viri, hoc agant Ecclesiæ, ut adolescentes ingenui, & bonæ spei in studio Theologico educantur.

IV.

Ad Electionem Ministri requiruntur sequentia, ut 1. Celebraretur jejunium. 2. Nominetur à Presbyterio & Classe. 3. Examinetur ab utrisque. 4. Sistatur coram Magistratu & totâ Ecclesiâ, ut intra dies quatuordecim tacitis fidelium suffragijs comprobetur. 5. Subscribat Catechismo Heydelbergenſi & fidei Confessioni Hispaniarum Regi Anno 1578. exhibitæ. 6. Confirmetur coram Ecclesiâ cum oratione ad Deum, manuum impositione, ( si ita ferat consuetudo ) &

exhortatione ad populum; postquam ad ista interrogata publicè responderit.

I. An se legitimè sentiat ad hoc ministerium vocatum.

II. An sola Biblica scripta pro Dei verbo recipiat.

III. An ea fideliter populo prædicare velit, vitâ inculpata præeundo.

IV. An se subiciat Ecclesiasticæ Disciplinæ.

V.

Qui semel legitimè in S. Ministerio sunt confirmati, illud dum vivunt non deferent, nisi legitima incidat occasio, de quâ judicium erit penes Synodum Provincialem vel Nationalem.

VI.

Nemo ab aliâ vocatus Ecclesiâ ad eam se conferet, nisi cum Ecclesiæ suæ consensu & Classis approbatione.

VII.

Fidi Pastoris & Ministri officia sunt:

1. Verbum Dei cum reverentiâ & simplicitate prædicare.
2. Sacramenta administrare.
3. In Oratione perseverare.
4. Disciplinam Ecclesiasticam exercere.
5. Et procurare ut omnia decenter & ordine peragantur.

VIII.

Si Minister donum habet aliquid ad ædificationem conscribendi, illud typis non mandabit, quin prius à Classe examinetur & proberur.

IX.

Honesta & justa merces Ministro danda est.

X.

Si quis senio vel morbo fiat ad Ministerium inutilis, ab Ecclesiâ nihilominus alendus est.

XI.

De Ministrorum viduis & orphanis similiter habenda est ratio.



## XII.

Cæcus in Ministerio non est confirmandus : attamen si confirmatus sit, non idèò deponendus.

## XIII.

Studioſi Theologiæ cum bonâ Claſſis veniâ , publicè quandoque exercitij cauſâ concionari poterunt , non tamen Sacramenta adminiſtrare, donec in miniſterio plenè ſint confirmati.

## XIV.

Nullus Miniſter in Miniſtros alios primatum aut dominatum obtinebit, ſed æqualiter Eccleſiaſticum onus ferent.

## XV.

Si miniſter in S. hoc munere ſe non condignè geſſerit, adeò ut infamiæ notam ſibi inuſſerit, à Miniſtro ſuſpendatur vel deponatur, idque Magiſtratus conſenſu.

## C A P. II.

*De Doctõribus & Scholis.*

## I.

Hæc Eccleſiarum ſit cura , ut in Academiâ ſint Doctores Theologiæ, eruditionis & pietatis nomine præſtantes.

## II.

Habeat unaquæque Eccleſia ad erudiendam iuventutem ſuos Ludimagiſtros.

## III.

Præſcribat Eccleſia Ludimagiſtris preces in Scholis concipiendas , & libros ad institutionem puerilem maximè idoneos.

## C A P. III.

*De Senioribus.*

## I.

Eligantur Seniores à verbi Miniſtris & conventu Eccleſiaſtico , cum jejunio & oratione ad Deum , & confir-

mentur in Ecclesiâ consuetis interrogationibus.

## II.

Munus Seniorum est: 1. Cum verbi Ministris gregi invigilare, 2. Ecclesiæ membra invisere. 3. Ægros consolari. 4. Scandala ad consistorium deferre. 5. Cum verbi Ministris de scandalis judicare, & quantum poterunt, ex Ecclesiâ tollere.

## III.

Numerus Seniorum sit pro arbitrio & necessitate cujusque Ecclesiæ.

## IV.

Seniores electi ex Ecclesiæ consuetudine, munus illud in se recipere non recusent, nisi gravis subsit causa.

## V.

Singulis annis dimidia pars Seniorum Electione renovabitur: quamvis magis è re Ecclesiæ esset in prædicto munere continuatio, siquidem commodè id fieri posset.

## CAP. IV.

*De Diaconis.*

## I.

Diaconi sunt eligendi & confirmandi eo modo quo Seniores.

## II.

Diaconorum munus est. 1. Eleemosynas & alia pauperum bona diligenter colligere. 2. Fideliter & discretè distribuere. 3. Pauperes & ægros amanter invisere & consolari. 4. Ne inutiliter Eleemosynæ consumantur prospicere vigilantiter.

## III.

Collectæ & expositæ pecuniæ rationem singulis mensibus coram Synedrio Ecclesiastico reddent.

## IV.

Mulieres ætate provectæ, spectatâ fide ac probitate ad hoc

hoc etiam munus Apostolorum exemplo rectè adscisci possent.

## C A P. V.

*De Prophetiâ. Ex Synodis Wefaliensi  
& Embdanâ.*

## I.

In omnibus Ecclesijs sive nascentibus, sive vegetis, Prophetiæ ordo ex Pauli instituto observetur.

## II.

Ad hoc collegium cooptentur, non modo Ministri, sed etiam Doctores, ac ex Senioribus & Diaconis, atque adeò ex ipsa plebe, si qui sint qui donum suum à Domino acceptum in communem Ecclesiæ utilitatem conferre velint: Ita tamen ut prius Ministrorum atque aliorum probentur iudicio.

## III.

In hoc Collegio ad ædificationem omnium liber aliquis Scripturarum rato ordine explicetur. Vbi autem is, cujus erunt partes, vices suas expleverit, licebit ijs qui subsellijs eum insequuntur, siquidem visum erit, adjicere quod ad ædificationem pertineat: Actum demum, conceptâ oratione, ab eo, cujus erunt partes, cætus claudatur.

## IV.

Prophetandi forma, quæ quæstionibus & responsionibus constat, à Pauli instituto est aliena, & simulatum contentionumque persæpè est occasio.

## C A P. VI.

*De Ecclesiasticis Conventibus.*

## I.

Ecclesiasticus conventus est quadruplex. 1. Cujusque Ecclesiæ Consistorium. 2. Classis. 3. Synodus Provincialis. 4. Synodus Nationalis.

## II. Hi

## II.

Hi Conventus oratione ad Deum inchoentur, & gratiarum actione terminentur.

## III.

In hisce conventibus nullæ nisi res Ecclesiasticæ tractentur idque Ecclesiastico modo.

## CAP. VII.

*De Consistorio.*

## I.

Vnaquæque Ecclesia suum habeat Consistorium, ex verbi Ministro vel Ministris, & Senioribus dictæ Ecclesiæ consistens; qui singulis septimanis ad minimum semel conveniant, ad res incidentes pertractandum.

## II.

Verbi Ministri per vices præsideant, designetur Scriba, qui notatu digna scripto consigner.

## III.

Sint etiam in Ecclesiâ libri chartacei, in quibus scribantur nomina eorum, qui Sacro Baptismate tinguntur, nec non parentum & patrimorum nomina. Item eorum, qui nomen dant Ecclesiæ, matrimonio junguntur, & moriuntur.

## IV.

Præsidis officium est. 1. Ex ordine sententias rogare. 2. Loquacibus silentium imponere. 3. Et ex collectis suffragijs res concludere.

## V.

Ecclesiæ membra, quæ alio se conferre volunt, à Consistorio testimoniales litteras petant.

## VI.

Quod in Consistorio commodè terminari non potest, ad Classicum conventum deferatur.

## C A P. VIII.

*Classis, seu Synodus Diœcesiana.*

## I.

Classicalis Conventus consistat ex verbi Ministris, & Senioribus vicinarum aliquot Ecclesiarum.

## II.

Fiat initium ab oratione ad Deum, per Ministrum qui præfederat conventui præcedenti, vel per Pastorem loci.

## III.

Oratione finitâ fiat Electio Præsidis & Scribæ, secretis suffragijs.

## IV.

Præsidi tradantur literæ missionis seu testimoniales cujusque Consistorij, legantur Acta præcedentis Colloquij, & tempus locusque conventui designetur.

## V.

Huic conventui, Ministris & Senioribus etiam non designatis interesse liceat, & sententiâ dicere, Interim designatorum sententiæ suffragij vim tantum obrineant.

## VI.

Quod in conventu Classicali commodè decidi non poterit, ad Synodum Provincialem deferatur.

## C A P. IX.

*Synodus Provincialis.*

## I.

Synodus Provincialis est conventus vicinarum Classium.

## II.

Ex unaquaque Classe duo Ministri & Seniores duo designentur, qui singulis annis ad minimum semel conveniant.

## V

## III. Qui



## III.

Qui superiori conventui præfuit, aut qui Loci est Pastor, preces concipiat ad Præsidis, Assessoris & Scribæ electionem.

## IV.

Præsides electus 1. Habebit preces ad totam actionem accommodatas. 2. Literas testimoniales postulabit. 3. Suffragia colliget. 4. Majoris & sanioris partis sententiam exponet. 5. Eam Scriba excipiet; exceptam discretè leget, ut omnium calculis proberetur. 6. Omnes sessiones gratiarum actione claudet.

## V.

Quæ ad Doctrinam primùm, deinde quæ ad Disciplinam Ecclesiasticam pertinebunt, distinctè scriptis consignabuntur, & legentur.

## VI.

Præsidis officium est: 1. Iubere ut quisque ordine suo loquatur. 2. Silentium contentiosis & acrioribus imperare. 3. Nisi taceant ut egrediantur præcipere, & fratrum judicio condignè reprehendere.

## VII.

Totius conventus Provincialis consensu eligitur Ecclesia proximo conuentui commoda.

## VIII.

Absolutis Synodi negotijs celebrabitur Sacra Cœna inter Ministros & Seniores, qui ad Synodum convenerunt, & Ecclesiam loci in quo collecta est.

## IX.

Ecclesiæ, in quâ Synodus habetur, cura incumbet, ut ad proximam Synodum acta seu constitutiones illius Synodi mittat vel adferat.

## X.

Quod in Synodo Provinciali commodè decidi non poterit, ad Synodum Nationalem deferetur.

## C A P. X.

*De Synodo Nationali.*

I.

Synodus Nationalis est conventus à Belgij Provinciis designatorum.

II.

Eadem in hac Synodo, ut supra, est observanda ratio.

III.

Vnaquæque Provincia ad Synodum mittet duos verbi Ministros, & Seniores duos.

IV.

Aderunt etiam ab Ecclesijs Belgij Wallonicis deputati.

V.

Quin etiam summi Magistratus delegati sunt postulandi, ut in ipsorum præsentia eorumque suffragio Synodi acta concludantur.

VI.

Hoc autem, si fieri potest, agendum est, ut singulis trienniis dicta Synodus celebretur.

VII.

Vt ritè instructi veniant designati, unaquæque Provincia tempestivè monebitur.

## C A P. XI.

*De Exercitijs Ecclesiasticis in sacro conventu peragendis.*I. *Leſſio.*

Cultus divinus in Ecclesiâ à lectione unius aut alterius Capituli ex Scriptura incipiendus est.

I I.

Fiat hoc per Seniores vel Diaconum, vel alium quemvis ad hoc ab Ecclesiâ constitutum.

V 2

III. Con-

III. *Concio.*

Concio sacra à Psalmore cantu , & precibus ad Deum devotis inchoabitur.

## IV.

Vtile erit certum Sacræ Scripturæ librum ordine pro concione explicare, idque ex Synedrij consilio.

## V.

Conciones funebres nusquam introducendas , & ubi in usu sunt commodè tollendas censet Synodus.

## VI.

Concionibus nimis prolixis auditorum memoria ne oneretur, sed (si fieri potest ) ad unius horæ spatium sermo temperetur.

VII. *Psalmi.*

In Cantu Ecclesiastico retinebuntur Psalmi à Petro Datheno conversi per omnes Belgij Ecclesias.

## VIII.

Vtile erit aliquem designare cantorem qui populi cantum moderetur, & Psalmodiâ præeat.

## IX.

In Ecclesiæ cuiusque arbitrio erit , Psalmos ordine continuo, vel pro re natâ decantare.

## X.

In hebdomade dies, pro cuiusque Ecclesiæ commodo, solennibus precibus consecrabitur , quo publica ac submissa peccatorum pro populo fiat deprecatio ante vel post concionem.

## XI.

Minister preces vel dictante Spiritu, vel certâ sibi propositâ formulâ concipiet.

XII. *Ieiunia.*

Tempore Belli, Famis, Pestis, Persecutionis & afflictionis gravioris dies ieiunij publicè Domino sanctificabuntur, Magistratus auspicijs & consensu.

XIII. *Cate-*

XIII. *Catechesis.*

Catechizandi consuetudo ab Apostolis accepta in omnibus Ecclesijs observanda censetur.

## XIV.

Belgicis Ecclesijs commendatur Heydelbergensis formula, ut cum Ecclesijs Germanicis unanimis & Christiana declaretur consensus.

## XV.

In explicandâ Catechesi sermone familiari & ad juniorum captum accommodato est utendum.

## XVI.

Parentes & Ludimagistri sunt monédi, ut domi & in scholis juventutem diligenter in Catechesi instituunt, & simul ac ætas liberorum paritur Ecclesiæ catechizandos offerant.

## C A P. XII.

*De Sacramento Baptismi.*

## I.

Sancti Baptismi Sacramentum, non ab alio quam à verbi Ministro ritè conferri posse censetur.

## II.

Hoc gratiæ sigillum etiam ad Christianorum liberos pertinet, eoque sine diuturniori dilatione Ecclesiæ sistentur baptizandi.

## III.

Initio nascentis Ecclesiæ infirmorum habenda est ratio, eoque ad evitandum scandalum pueros valetudine afflictos domi Baptizare licebit, præsentibus ut minimum quatuor aut quinque fidelibus.

## IV.

Administretur baptismus formâ usitatâ, & in Ecclesiasticis constitutionibus expressâ.

## V.

Vnica vel trina tinctio censetur ἀνάφορα.

## VI.

Parentes & Testes, qui ad Baptismum pueros adferent, ijs verbis, quæ in formâ Baptismi expressa sunt, interrogabuntur.

## VII.

Curandum est ut Testes sint iustæ ætatis & sanæ Religionis.

## VIII.

Infantibus non sunt danda nomina Divina, Barbara, Superstitiosa, sed in sacris literis (quantum fieri potest) expressa, & à sanctis usitata.

## IX.

Nomina Infantum, Parentum, ac Testium publicis tabulis consignari tum Ecclesiæ, tum Reipub. conducet.

## X.

Si adultus nondum Baptizatus Baptismum postulet, is prius publicam confessionem fidei suæ reddet in Ecclesiâ.

## CAP. XIII.

*De Sacramento Cœnæ Dominicæ.*

## I.

Sacra Domini Cœnæ à solis verbi Ministris est administranda.

## II.

Cœnæ celebrandæ tempus ante quartum decimum diem ad populum referri judicatur utile: tum ut Ecclesiæ membra se maturè præparent; tum ut Seniores suas vices obeant, & infirmiores moneant & consolentur.

## III.

Nemo ad Cœnam Dominicam admittatur, nisi qui fidei confessionem ante reddiderit, & Disciplinæ Ecclesiasticæ se subjecerit, & vitæ inculpatæ testes fideles produxerit.

## IV.

Sub utrâque specie Panis sc. & vini S. Cœna est celebranda.

V. Panis



## V.

Panis sit communis, non peculiaris quis azymus, aut qui superstitionem respiciat.

## VI.

Fractio panis (quia à Christo manifestè est instituta, ab Apostolis totâque Ecclesiâ vetustiori observata) necessaria omninò censetur.

## VII.

Verba S. Cœnæ Christi præcepto & Apostoli Pauli declaratione consentanea sunt retinenda.

## VIII.

Liberum est stando, sedendo, veleundo Cœnam celebrare, non autem geniculando ob *ῥῆπλατρίας* periculum.

## IX.

Vtile erit tunc pro concione de S. Cœna argumentum tractare, à Concione formulam constitutam Ecclesiæ prælegere, & dum Cœna celebratur S. Scripturam legi, vel Psalmos decantari.

## X.

Ecclesiæ Belgicæ in Pace constitutæ singulis bimestribus Cœnam celebrabunt, quod liberum relinquitur Ecclesijs sub Cruce gementibus.

## XI.

Ante Cœnæ Dominicæ diem fiat concio præparatoria, & à concione inter Ministros, Seniores & Diaconos fraterna exerceatur Censura.

## XII.

Siquis literis testimonialibus ab aliâ Ecclesiâ venerit, sine confessione fidei iteratâ admittendus est.

## C A P. XIV.

*De Disciplina Ecclesiasticâ.*

## I.

Vigilandum est ne ulla Ecclesia, neglectâ Ecclesiasticâ Disciplinâ, instituat.

## II. Ne-

## II.

Neceſſitas Diſciplinæ docetur ex Domini noſtri inſtituto, ex Apoſtolorum & vetuſtioris Eccleſiæ uſu, & quotidiana rerum experienciâ.

## III.

Conſtat autem Diſciplina, tum in Cenſurâ doctrinæ, tum in legitimâ morum correptione, id eſt, in juſto Clavium à Domino Eccleſiæ datarum uſu.

## IV.

Hæc Cenſura & Correptione nequaquam delinquentem liberat, à Civili judicio, & Magiſtratus gladio.

## V.

Si quis in Doctrinæ puritate ſive morum ſanctitate peccaverit, ſi occultum id ſit, & à Scandalo publico remotum, obſervabitur Regula quam præſcribit Chriſtus, Matth. 18. niſi ſit in caſu proditionis aut pernicioſi publicæ.

## VI.

Si privatâ admonitione fratrem lucratus es, noli ejus crimen ad Conſiſtorium deferre. Sed ſi duos aut tres fideliter admonentes non audierit, deferatur, ut in viam reducatur.

## VII.

Peccata ſuâ naturâ publica, aut per admonitionis privatæ contemtū publicata, ex Conſiſtorij totius arbitrio, modo & formâ ad ædificationē maximè accōmodatis ſunt corrigēda.

## VIII.

Qui pertinaciter Conſiſtorij admonitiones rejecerit, à S. Cœnæ communionē ſuſpēdetur.

## IX.

Si ſuſpenſus poſt iteratas admonitiones nullū pœnitentiæ ſignum dederit, ad Excommunicationem procedet Eccleſia.

## X.

Proceſſus autem ad Excommunicationem hic erit.

1. Miniſter è ſuggeſtu (peccatoris nomine occultato) quid cum gravi quodam peccatore actum ſit, ſignificabit, & Eccleſiam, ut pro peccatore impœnitente ſedulo oret monebit.

2. Pecca-

1. Peccatoris impœnitentis nomen pro Cætu publicabit.
3. Significabit nisi resipiscat, Excommunicandum esse.
4. Si ne sic quidem ad resipiscentiam adduci potest, coram Ecclesiâ pertinacis ejusmodi peccatoris, à corpore Ecclesiæ fiet Excommunicatio & abscissio.
5. Monebuntur fideles ne familiarem & non necessariam cum excommunicato consuetudinem habeant, sed ejus consortium vitent, hoc præcipuè consilio, ut pudore suffusus Excommunicatus de resipiscentiâ seriò cogitet.

## XI.

Qui gravia & Ecclesiæ probrosa commisit peccata, etiam si verbis pœnitentiam testetur, à Cœnæ tamen communione aliquot vicibus pro Consistorij arbitrio suspendetur.

## XII.

In recipiendo excommunicato seriò resipiscente, ea observanda est ratio, quæ ad cujusque Ecclesiæ ædificationem maximè faciet.

## XIII.

Si Minister, Senior, aut Diaconus publico aliquo crimine (quod Deus avertat) se contaminaverit, ab officio erit movendus: Si autem crimine aliquo occulto teneatur, à Claustro conventu Censuram expectet pro criminis magnitudine vel levitate.

## XIV.

Crimina quæ in Ministris nequaquam tolerari debent, ea ferè sunt hujusmodi, Hæresis, Schisma, Manifestus ordinis Ecclesiastici contentus; Blasphemia manifesta & animadversione civili digna, Simonia, inhonestus ambitus ad alterius locum invadendum, Desertio sui muneris. suæque Ecclesiæ, sine legitimo consensu: Crimen falsi, Perjurium, Scortatio, Furtum, Ebriositas, Vis armata, omnisque vis correctione civili digna; Fœnus illicitum; Alea, cæteri que ludi inhonesti, ac legibus interdicti: Manifesta affectatio tyrannidis in Ecclesiam ac Collegas, cætera que alia hujusmodi, quæ vel inurunt infamiam, vel separationem ab Ecclesiâ merentur.

## XV.

Delicta quæ quidem tolerantur, sed tamen reprehensioni & censuræ sunt obnoxia, ea ferè sunt ejusmodi, inanis quædam quæstionum inutilium curiositas: ingenij ostentatio in tempestivis allegorijs: in scripturarum studijs remissio: novarum consuetudinum quarundam pro libidine introductio: facetiæ indecoræ: verbum contumeliosum: temeritas: inanis gloriolæ cupiditas: plus æquo acres objurgationes, &c. quæ verbi divini Ministerium dedecent.

## XVI.

In levioribus vitijs, quæ ne judicio quidem confessus digna videbuntur, servetur ea quæ est in cæteris omnibus à Christo præscripta ratio.

## XVII.

Ut hic Censuræ ordo commodius observetur, utile erit in binos, vel ut minimum in ternos menses, Classis cuiusque conventum haberi, in quo de huiusmodi rebus diligens fiat.

## XVIII.

Classis conventus non semper uno est habendus locus: tum ut Ecclesiarum alterius in alteram dominatus impediat, tum vero ut singularum Ecclesiarum exploratio fiat diligentior, de verbi doctrinâ, vitâ, Ceremoniis ac disciplinæ ratione.

## CAP. XV.

*De Matrimonio.*

## — 1.

Matrimonium initiari debet inter marem & foeminam ætatis justæ ex Reip. legibus. 2. Consensu mutuo & Parentû, Tutorum vel aliorum, quorum interest. 3. In præsentia ministri verbi, nominis divini invocatione. 4. Verbis de præsentis & obligatorijs, quæ omnes excludunt conditiones.

## II.

Clandestina promissa, & contra voluntatem Parentum præstita, illegitima sunt & nullius valoris.

## III. Ver-

## III.

Verbi Minister ab initiandis in matrimonio interrogabit.  
 1. An sint ab omni promissione liberi. 2. An parentes consentiant. 3. An non sint consanguinei. 4. An sint Ecclesiæ membra, aut saltem Reformatæ religioni addicti, eoque Ecclesiæ nomen dabunt.

## IV.

Si parentes Religionis odio, aut alijs de causis iniustis se difficiles præstiterint, penes Consistorium erit, aut Magistratum, rem explorare & diiudicare.

## V.

Peregrini & ignoti in matrimonio non sunt initiandi, nisi prius legitimo testimonio probent se ab omni promissione alienâ esse liberos. Si pars alterutra vel utraque antè matrimonio iuncta fuerit, de morte priorum coniugum testimonium exhibebit legitimum.

## VI.

Sponsalia legitimè contracta ne utriusque quidem partis consensu dissolui poterunt.

## VII.

Matrimonio conjungendorum nomina Tabulis publicis consignabuntur, & trinis diebus Dominicis, aut alioquin per tres vices iustis intervallis pro concione edentur, iisimprimis locis ubi habitant & noti sunt.

## VIII.

Quovis die matrimonia confirmari & celebrari poterunt, modo concio ad populum habeatur, exceptis Cænæ diebus, & ieiunio sacratís.

## IX.

Si matrimonij vinculum adulterio fuerit ruptum, ut partium fiat reconciliatio, seriò est laborandum: Quod si frustra tentetur, & pars innocens alio velit iungi matrimonio, declarabit Synedrium (ubi adulterium coram Magistratu fuerit probatù) ex verbi Dei norma illud ipsam esse legitimum.



x.

Viduæ (imprimis iuniores) ante quartum cum dimidio  
menſem novo non iungantur coniugio: poſtulat autem hoc  
neceſſitas & muliebris verecundia.

*Concluſio.*

Articuli hi ad legitimum Eccleſiæ ordinem ſpectantes, ita  
mutuo conſenſu ſunt conſtituti, utſi utilitas Eccleſiarum  
aliud poſtulet, mutari, augeri, & minui poſſint & debeant.

Non erit tamen privatæ alicuius Eccleſiæ id facere, ſed  
dabunt omnes operam, ut illos obſervent, donec Synodo  
aliter conſtituatur.

F I N I S.



